


# ঋতুপর্ণ

ও

কয়েকটি গল্প



শ্রীমণীন্দ্রলাল বসু

শ্রীগুরু লাইব্রেরী

২০৪ কর্ণওয়ালিশ স্ট্রীট

কলিকাতা

প্রথম সংস্করণ, অগ্রহায়ণ, ১৩৪৪

:

দাম এক টাকা

শ্রীজনার্দন কর কর্তৃক ২৬, কর্ণওয়ালিস ষ্ট্রীট, রামকুমার  
মেসিন প্রেস, কলিকাতা হইতে মুদ্রিত ও শ্রীগুরু লাইব্রেরী,  
২০৪ কর্ণওয়ালিস ষ্ট্রীট কলিকাতা হইতে শ্রীভুবনমোহন  
মজুমদার কর্তৃক প্রকাশিত

পরম পূজনীয়া

শ্রীমতী কিরণ বাল্য বন্দ্যোপাধ্যায়

শ্রীচরণেষু

শ্রীমণীন্দ্রলাল বসু লিখিত

উপন্যাস :

রমলা ( তৃতীয় সংস্করণ )

জীবনায়ন

ছোটগল্প : •

নায়াপুরী ( দ্বিতীয় সংস্করণ ষষ্ঠ )

সানার হরিণ ( দ্বিতীয় সংস্করণ )


• রক্তকমল

কল্পলতা

ছেলোম্বাই :

অজয় কুমার

সোনার কাঠি



## ঋতুপর্ণ

অন্ধকার ধীরে তরল হইয়া আসিল—তাহার সম্মুখে এক বৃহৎ ধূসর পটভূমিকা, পটভূমিকার উপর আলোকের রেখাপাতে অপক্লপ চিত্রের গ্ৰাৱ দিব্য দৃশ্য ফুটিয়া উঠিল।

গগনচূষী মহান্ পর্বতশ্রেণী, কৃষ্ণপ্রস্তরময় ; তর উপরিভাগে নিবিড় অরণ্য, মধ্যে গুহার পর গুহার , নিম্নে স্বচ্ছ-তোয়া খরস্রোতা নদী। নদীর নাম হিরণ্যতী। তাহার একদিকে বিচিত্র শৃঙ্গশোভিত পর্বত, অপরদিকে তরঙ্গায়িত প্রান্তরে কয়েকটি গ্রাম।

—গুহাগুলি বিচিত্র সুন্দর, কোনটি সূর্য্য-বাতায়নসমন্বিত, কোনটি কারুকাম্যময় প্রস্তরস্তম্ভশ্রেণীশোভিত, বৌদ্ধবিহা, বৌদ্ধ-চৈত্য।

গুহাগুলির শেষে হিরণ্যতী নদী অর্দ্ধচন্দ্রাকৃতি হংগা বাঁকিয়া গভীর খাতে প্রবেশ করিয়াছে, যেন কোষমুক্ত তরবারিকে কে নিকষপর্বতে বিদ্ধ করিয়া দিয়াছে। খাতের উপর পর্বতশৃঙ্গ কাটিয়া সমতল করিয়া শিব-মন্দির নিম্নিত হইতেছে। সে এক অলৌকিক ব্যাপার! পর্বতগাত্র হইতে এক বিরাট প্রস্তর খণ্ড

কাটিয়া লওয়া হইয়াছে, দৈর্ঘ্যে দেড়শত গজ, প্রস্থে এক শত গজ ও উচ্চতায় মাট গজ হইবে। সেই প্রস্তরখণ্ড কাটিয়া, ক্ষোদিত করিয়া মহান্ শিবমন্দির গঠিত হইতেছে। অগণিত স্থপতি, ভাস্কর, শ্রমজীবী নিজ নিজ কাৰ্য্যে রত। দ্বাদশ শত শিল্পী তিন বৎসর ধরিয়া এ মন্দির-নিৰ্ম্মাণে নিযুক্ত, মন্দির শেষ করিতে আরও দ্বাদশ বৎসর লাগিবে। সেই 'দ্বাদশ শত শিল্পীগণের সঙ্গে সে-ও রহিয়াছে : ভারতের কোন 'গৌরবনয় প্রাচীন যুগে, কোন মহান্ অপূৰ্ণ শিবমন্দির-নিৰ্ম্মাণে সে-ও ভাস্কর ছিল।

মন্দির-সম্মুখে দ্বিতল মণ্ডপ বিপুলকার সিংহ, হস্তী, মূর্তিগুলির উপর সুরক্ষিত ; অশোকমঞ্জরী উৎকীর্ণ অধিরোহণীর উপর সে বসিয়া আছে। তলেই কক্ষ্মে ময়, সে কিন্তু স্তম্ভ বসিয়া উদাস-ভাবে কি ভাবি ! মণ্ডপের দক্ষিণদিকের দেওয়ালে প্রবেশ দ্বারের পার্শ্বে হরিদ্রাভ প্রস্তরের উপর ভগীরথের গঙ্গাবতরণ-দৃশ্য ক্ষোদিত করিবার ভার তাহার উপর। দৃশ্যটি সে কি ভাবে উৎকীর্ণ করিবে তাহাই পরিকল্পনা করিতেছে, পুণ্যসলিলা গঙ্গার সে কি রূপ দিবে ?

— অদূরে <sup>১</sup> স্তম্ভ, সুবিশেষ, পূর্ণদত্ত, তাহার নানা বন্ধু ভাস্করগণ শিবের আবনের নানা দৃশ্য ক্ষোদিত করিতেছে। কেহ আঁকিতেছে মহাদেবের মদন-দহনের চিত্র,—নগরাজ হিমালয় বসন্তসমাগমে বিচিত্র পুষ্পশোভিত, পলাশ-পিয়াল-অশোক-তরু-মঞ্জরীর বর্ণোচ্ছ্বাসে, ক্রৌঞ্চ-চক্রবাক-পক্ষিকুলের কৃৎসনে চতুর্দিকে বসন্ত-লক্ষ্মীর লীলা-উৎসব, তাহারি মধ্যে কৃষ্ণসার-চন্দ্রপরিহিত

## ঋতুপর্ণ

ভূজঙ্গমবেষ্টিত জটাজুটধারী মহাদেব দেবদারু-তরুতলে ব্যাঘ্রচর্মের উপরু দ্যানে আসীন ছিলেন : কন্দর্পের শরাঘাতে তাঁহার তপস্যা ভঙ্গ হইল, ক্রোধে ললাটস্থিত তৃতীয় চক্ষু জ্বলিয়া অগ্নিশিখা কর্হগত হইতেছে, নীনকেতু বজ্রাঘাতে অশোকতরুর গায় দগ্ন হইয়া বাইতেছে ।

কেহ আঁকিতেছে,—কৈলাস পর্বতে হরপার্বতী বিহার করিতেছেন ; চারিদিকে কিঞ্জর অপ্সরোগণ, হংস দাত্যহ শতপত্র নানা বিচিত্রাঙ্গ পক্ষী স্মধুর গান করিতেছে । বলগন্ধিত রাবণ কৈলাসপর্বত তুলিতে বাইয়া তাহার নীচে চাপা পড়িয়াছে ।

এ সকল মামুলী দৃশ্য ক্ষোদাই করিতে তাহার ভাল লাগে না । সে আঁকিতে চায় মানব জীবনের সুখদুঃখের ছবি, সে বলিতে চায় মানব অন্তরের বেদনা, আশা, স্বপ্নের কথা । নবপরিণীতা বালিকাবধূ পিতৃগৃহ হইতে চতুর্দোলায় চড়িয়া স্বামিগৃহে চলিয়াছে, তাহার হৃদয়ে আজন্মপরিচিত মাতৃস্নেহপূর্ণ গৃহত্যাগের বেদনা, স্বপ্নভরা স্বামিগৃহে গমনের অজানা আনন্দ, অজানা পথ প্রান্তর হ্রদী পার হইয়া তাহার চতুর্দোলা চলিয়াছে ; তরুণ পুত্রকে মাতা যুদ্ধক্ষেত্রে যাইবার পূর্বে আশীর্বাদ করিতেছে, পিয়বিচ্ছেদ কাতরা প্রেমিকা বধার সন্ধ্যায় উদাসীন ; এমান কত দৃশ্য,—কমললোচনা সূকেশিনী উষ্মিলা পদ্মবনতীরে পুষ্পিত কদম্বতরু-তলে লক্ষ্মণবিরহকাতরা ক্ষীণনিতম্বিনী ; বিদর্ভরাজহিতা পদ্ম নিভেক্ষণা নলবিচ্ছেদবিধুরা দময়ন্তী ব্যাঘ্রভল্লুকসঙ্কুল গহন অরণ্যে একাকিনী পথহারা ।

## ঋতুপর্ণ

তাহার মন মানববেদনার কোন গভীর রহস্যলোকে চলিয়া  
গিয়াছে। মহাসা সে কাহার আস্থানে চমকিয়া চাহিল,—ঋতুপর্ণ!

তাহার না ঋতুপর্ণ!

ঋতুপর্ণ দেখিল, সম্মুখে স্থপতিশেখর রুদ্ৰদাস দাঁড়াইয়া আছেন।  
নৃপতি নরসিংহের এ শিবমন্দির তাহার পরিকল্পনা, তাহার  
তত্ত্বাবধানে এ মন্দির নিৰ্মিত হইতেছে। অসিত হইয়া দাঁড়াইয়া  
ঋতুপর্ণ স্থপতিশেখরকে প্রণাম করিল।

রুদ্ৰদাস মুচু হাসিয়া বলিলেন, ঋতুপর্ণ, আজ তোমার অন্তর  
বড় উদাস দেখছি। ঋতুপর্ণ লজ্জিত-ভাবে উত্তর দিল  
আচার্য্যদেব, আমার মন সত্যই আজ চঞ্চল, গঙ্গাবতরণের দৃশ্য  
কিরূপে ক্ষোদিত দেব, আমি ঠিক পরিকল্পনা করতে পারছি না।

স্থপতিশেখর বলিলেন, বিষয়টি কঠিন, তা'ছাড়া তুমি চির-  
প্রথামতে আঁকতে চাও না, নবদৃষ্টিতে অপূৰ্ণভাবে গঙ্গার রূপ  
দেখতে চাও। খুবই প্রশংসনীয়। আমি কোন বাধা দিতে  
চাই না। তবে তোমার পরিকল্পিত দৃশ্যের একটি রেখাচিত্র  
আগে আমার দেখিও, তারপর পাথরে ক্ষোদিত করো। দে ,  
এ স্থান পুষ্ক কাটার শব্দে পূর্ণ, মনন করার পক্ষে উপযুক্ত  
নয়। তুমি বরঞ্চ নদীতীরে বা পাহাড়ের মাথায় কোন বর্ণার  
ধারে গিয়ে বিষয়টি চিন্তা করো। যতক্ষণ না তোমার দৃষ্টির  
সম্মুখে চিত্রটি পরিপূর্ণভাবে রেখা-ছন্দোবদ্ধ হয়ে উদ্ভাসিত হয়ে  
উঠেছে, ততক্ষণ তুমি কিছু আঁকতে বা ক্ষোদাই করতে চেষ্টা  
করো না। এ কথা জেনো, রূপ-ধ্যানে দিব্যদৃষ্টিতে সমগ্র চিত্রকে



আগে দেখা দরকার, তারপর তুমি পটে বা পাথরে যা আঁকবে তা স্তম্ভে দিব্যদর্শনের ছায়া মাত্র।

ঋতুপর্ণ বিনীত-ভাবে বলিল, আমি সেই দিব্যদর্শন দেখাবাই প্রয়াস করছি।

রুদ্ৰদাস ধীরে বলিলেন, দেবতাগণের লোচনানন্দদায়িনী সুরধুনীকে মানবনেত্রে দেখা অসম্ভব, তবে আরাধনা করলে তিনি ধ্যানে দেখা দিতে পারেন। তাঁর মূর্তি কোন মানবশিল্পী ধারণা বা অঙ্কিত করতে পারে না। তুমি আমাদের শাস্ত্র-বর্ণিত দৃশ্যটি কল্পনা করো—সুরতবঙ্গিনী ব্রহ্মার কমণ্ডলু হতে দেবাদিদেব মহাদেবের মস্তকে পতিত হয়ে জটীর ভিতর ৮০০ ভ্রমণে নেমে এসেছেন; মহেশ্বর নীলকণ্ঠ ভিন্ন এ গগনমণ্ডলে অন্য মন্দাকিনীর তুর্কীবর্ণীয় বেগ ধারণ করতে কে সমর্থ হবে? এই লোকপূজ্যা গঙ্গার সম্মুখে ভগীরথ করযোড়ে পথ দেখাবার জন্য দাঁড়িয়ে। ছবিটি কি চোখের সামনে ফুটে উঠেছে?

রুদ্ৰদাসের পদধূলি লইয়া ঋতুপর্ণ বলিল, আপনার আশীর্বাদে কালই একটি রেখাচিত্র দেখাতে পারব।

স্বপতিশেখর চলিয়া গেলেন। ঋতুপর্ণও মণি-স্বাদন পার হইয়া, সিঁড়ি দিয়া নানিয়া নদীর দিকে চলিল।

চন্দন বর্ণা-হিরণ্মতী, বর্ষার গৈরিক সলিলশ্রোতে ছুকুল ভরা; শীত্রে শুভ্র কাশ-বন, ঘন সবুজ বেগুন সত্ত্ব প্রস্ফুটিত কৃটজ-পুষ্প-

## ঋতুপর্ণ

রাশিতে পাণ্ডুবর্ণ, যেন কোন সৌমত্বিনী কেশে কণিকার মালা  
জড়াইয়া, তিস্তে কৈতকীর কাঞ্চীদামে শোভিত হইয়া, হিরণ্য  
অঞ্চল ঝল: করিয়া চকিত-চরণে চলিয়াছে ।

কা. সতুর কাণায় জল উঠিয়াছে । ঋতুপর্ণ ধীরে সেতু  
পার হইল । গ্রামে তাহার গৃহের দিকে গেল না । গ্রামের  
এক বিজন পথ দিয়া চলিল । আকাশে মেঘ ও রৌদ্রের লীলা,  
চতুর্দিকে হিল্লোলিত শারদ-শ্রী ।

সহসা বৃষ্টি আসিল । তাহার ইচ্ছা হইল, ভাদ্রের বর্ষাধারায়  
ভিজিয়া ভিজিয়া চলে । সম্মুখে এক বৃহৎ সল্লকী বৃক্ষ দেখিয়া  
তাহার নীচে দাঁড়া ল । রেশমের উত্তরীয়ে ভাল করিয়া দেখ  
জড়াইয়া বারি বর্ষা দখিতে লাগিল ।

পথের অপরদিকে এক স্থলপদ্মের গাছ, শ্বেতপদ্মগুলি রক্তাভ  
হইয়া আসিতেছে ; তাহার পাশে পুঞ্জিত সপ্তপর্ণ বৃক্ষ ।

ঋতুপর্ণ চমকিত হইয়া চাহিল,—স্থলকমলকুঞ্জের পার্শ্বে এক  
যুবতী দাঁড়াইয়া, কোন গিরিপল্লীবালা হইবে, হিরণ্যতীতে স্নান  
করিয়া আলিঙ্গন আঁকা মাটির কলসী নদীর জলে ভরিয়া গৃহে  
চলিয়াছে । বাণ্যময়ী মূর্তি দিব্যস্বপ্নের মত । দীপ্তজিহ্ব  
ভুজঙ্গমগণের গায় কৃষ্ণ কেশদাম জলসিক্ত অঞ্চলে এলায়িত,  
হরিচন্দনবর্ণের গাত্রবস্ত্র, স্ন-ক্র-তলে কমল-নয়ন কখনও স্নেহে স্নিগ্ধ  
কখনও উৎকণ্ঠায় চঞ্চল ; চন্দ্রাননা চারু-নিতম্বিনী, স্বর্ণবলয়-মণ্ডিত  
দক্ষিণ হস্তে চিত্রিত জলপূর্ণ কুন্ত ধরিয়া, পীনোরত-পয়োধরা,  
শঙ্খবলয়-শোভিত বামহস্তে নবীন ধাতুমঞ্জরী ; শুভ্র কুন্দের মত

## ঋতুপর্ণ

বারিবিন্দু কুন্তলে কর্ণে ঝলমল করিতেছে; অলক্তক-রাগরঞ্জিত  
চরণ রক্তকমলের মত; জলধারা তাহাকে ঘেরিয়া মুক্তার মালার  
ন্যায় ঝরিতেছে।

নবোদগত কদম্বপুষ্পের মত ঋতুপর্ণের চিত্র  
উঠিল।

শরতের বারিধারা ঝামিল। ঋতুপর্ণ সবিস্ময়ে দেখিল,  
নিমেষের মধ্যে সে অপক্লপা যুবতী মূর্তি অন্তহিত। ঋতুপর্ণ  
পথের চারিদিক দেখিল, স্থলকমলকুঞ্জ খুঁজিল, কোথাও সে  
যুবতীকে খুঁজিয়া পাইল না। এ কি তাহার দৃষ্টিভ্রম? অথবা  
কোন দেবী চলনা করিতে আসিলেন?

দেবীমূর্তির দর্শন আর পাইল না বটে, কিন্তু তাহার অন্তর এক  
অনাস্বাদিত গভীর-আনন্দে পূর্ণ হইয়া গেল, চিত্তের বিষণ্ণতা  
আর রহিল না। আকাশ, বাতাস, আলোক, পৃথিবী, নদীধারা,  
পর্বতমালা, চারিদিক আনন্দপূর্ণ মধুময়!

ঋতুপর্ণ নদীতীরে এক বনে প্রবেশ করিল। মধুক, মন্দার  
দেবদারু নানাজাতীয় বৃক্ষ চারিদিকে। কোথাও ময়ূরী  
নাচিতেছে, কোথাও হরিণশাবক খেলা করিতেছে। বনের মধ্যে  
এক হ্রদ শালবনবেষ্টিত—হংস সারস, চকোর নানা পক্ষীর কলরবে  
পূর্ণ।

নিজ্ঞন এক স্থানে কালো এক পাথরের উপর ঋতুপর্ণ স্থির হইয়া বসিল। হৃদের জলে নীলাকাশের শুভ্রমেঘের সুবুজ বনের ছায়া। বনশুলী। গঙ্গাবতরণ-দৃশ্যটি কিরূপে ক্ষোদিত করিতে সে ভাবিতে চেষ্টা করিল। কোন পরিকল্পনা করিতে না। সপ্তপর্ণ বৃক্ষতলে বারিধারাবেষ্টিত লাবণ্য-ময়ী নারীমূর্তি বার বার মানসপটে ভাসিয়া উঠিল।

ভাবিতে ভাবিতে সে সহসা চমকিয়া লাকাইয়া উঠিল, আনন্দে নৃত্য করিতে লাগিল।

যে গঙ্গার পরিকল্পনা করিতে এত মনন করিতেছে, তাহারি দিব্যমূর্তি ত সে স্থলপদমুকুঞ্জের ধারে দেখিয়াছে! এই সত্যকার গঙ্গামূর্তি—কল্যাণীন্দরী, স্নেহময়ী মাতা, অপকৃপা স্নন্দরী! ব্রহ্মার কমণ্ডলু নয়, শিবের জটা নয়, দিগন্তমেখলা জ্যোতির্ময়ী সুর-ভরঙ্গিনী নয়, স্তম্ভদুঃখময় মানবগৃহের প্রেমময়ী নারীর রূপ, মাতৃ-রূপিনী গঙ্গা। আবার সে হতাশ-ভাবে পাথরের উপর বসিয়া পড়িল। কিন্তু স্থপতিশেখর কি এ মূর্তি উৎকীর্ণ করিতে আদেশ দেবেন? এ যে মানবীর রূপ! এই ত পুণ্যসলিলা নদী, তৃষ্ণা-জল ক্ষুধার যোগাইয়াছে, দেশকে শস্যশামল সুন্দর সমৃদ্ধিশালা করিয়াছে, তাহার এক হস্তে জলপূর্ণ কুম্ভ অপর হস্তে ধাত্য-মঞ্জরী।

ঋতুপর্ণ যখন গৃহে ফিরিল, তখন সন্ধ্যা হইয়া গিয়াছে। দেখিল

গৃহাঙ্গনে বন্ধুজীব-বৃক্ষের নীচে রক্তপ্রসূরবেদিকাম চিত্রসেন তাহার প্রতীক্ষায় বসিয়া আছে।

চিত্রসেন উজ্জয়িনীবাসী এক যুবক চিত্রকর, চিত্রশিল্প-দর্শন-পাঠে তাহার অধিক অনুরাগ। সে বেঙ্গল-সীমা-কাঠ-করিবার জন্ত এখানে এক বৌদ্ধ বিহারে বাস করিতেছে। বিহারে তাহার কোথায় একটি গভীর দুঃখ আছে, সে জন্ত সে সংসার ত্যাগ করিয়া আত্মার শান্তির আশায় ভারতের নানা স্থানে ঘুরিয়াছে। এখন সে মনস্থ করিয়াছে, সে বৌদ্ধ ভিক্ষু হইবে ; কিন্তু তাহার গুরু ভিক্ষু উদয়ন তাহাকে প্রব্রজ্যাগ্রহণ করিতে উৎসাহ দিতেছেন না। তিনি বলেন, তাহার বয়স তরুণ, এখনও ভিক্ষুজীবন-যাপনের উপযুক্ত মন হইবে না। তিনি তাহাকে গৃহা-বিহারের প্রসূরগাত্রে বুদ্ধদেবের জীবন চিত্রিত করিতে বলিয়াছেন ; সে চিত্রকর, ভগবান বুদ্ধের জীবনের নানা ঘটনা অঙ্কিত করিয়াই সে যথার্থ ধর্মপথে অগ্রসর হইতে পারিবে।

চিত্রসেন বলিল, ওহে ঋতুপর্ণ, তোমাকে আমি সারাদিন খুঁজছি। নন্দিরে পেলুম না, নদীতীরে তোমার সেই প্রিয় স্থানেও পেলুম না, অপরাহ্ন হতে তোমার গৃহে বসে আছি। তোমার মুখ বড় মলিন দেখাচ্ছে, শারীরিক কুশল ত ?

—হ্যাঁ, শরীর আমার ভালই আছে ; কিন্তু আজ আমার মন বড় বিক্ষিপ্ত, সে জন্ত কাজে মন লাগল না ; তা'ছাড়া স্থপতি-শেখর যা খোদাই করতে বলেছেন, সে দৃশ্যটি আমার ঠিক

মনোমত নয়। নীরবে একটু চিন্তা করবার জন্তে রামগিরির  
হৃদে গেলুম।

শচ্য! আমার চিত্তও আজ বড় চঞ্চল, আমার  
ছবি সতুর মোটেই মন লাগল না, সে জন্তে তোমার সন্ধানে  
বেরুলুম। ইচ্ছা ছিল, তোমাকে নিয়ে অপরাহ্নে নদীতীরে  
একটু বেড়াব; তোমার সঙ্গে একটি বিষয় গভীরভাবে আলোচনা  
করতে চাই।

—তুমি ভাই একটু অপেক্ষা কর, আমি হাত মুখ ধুয়ে সাক্ষ্য-  
পূজা শেষ করে নি।

—বেশ, আমিও সাক্ষ্যের আরাধনা, ভগবান বুদ্ধের নাম  
করি।

সাক্ষ্যের পূজা শেষ করিয়া যখন দুই বন্ধু বন্ধুকবক্ষতলে বসিল,  
শুক্রাচতুর্দশীর চন্দ্র পূর্ব গগনে উঠিয়াছে, মধুক-পুষ্প-গন্ধ  
বাতাস ধারে বহিতেছে। গৃহকোণে একটি মৃৎ-প্রদীপ মিটিমিটি  
জলিতেছে।

চিব্বসেন বলিল, ওহে ঋতুপর্ণ, ঘরে খাবার কিছু আছে কি?  
আহারটা সমাধা করেই আমাদের আলোচনায় বসলে ভাল হয়।

—কেন, তোমার কি ক্ষুধার উদ্বেক হয়েছে? আমার ঘরে  
ত খাবার কিছু নেই, পাচকটি আবার অসুস্থ, আজ রাতে

আর রান্না হচ্ছে না, তবে গুড়ের পায়ের, দধি ও মধু থাকতে পারে। আর আমি ত ভেবেছি, আজ রাত উপবাসে চাটাব, তাতে মন কিছু স্থির হবে ও চিন্তা দাও বাড়বে

—সে আমি জানি, তোমার ঘরে কিছু থাকে না, চিন্তার কারণ নেই, আমিও বিশেষ ক্ষুধিত নই, তবে একেবারে উপবাসী থাকা উচিত নয়। আমি আসবার সময়ে কিছু ফল নিয়ে এসেছি, এই পর্ণপুটে আছে, তুমি তোমার পায়ের, দধিও মধু বা'র করো।

—এ যে অনেক ফল, অসময়ে এ স্থানে এ সব ফল কোথা থেকে পেলো?

—প্রাংশু আজ প্রভাতে উজ্জয়িনী থেকে এসেছে, সে এসব ফল নিয়ে এল, আঙুরগুলি বেশ রসাল। দেখ, তোমার পাথর ক্ষোদাই কাজে মানসিক পরিশ্রমের চেয়ে দৈহিক পরিশ্রম বড় কম হয় না, অনাহারে থাকা তোমার উচিত নয়।

—আঁহার শেষে দুই বন্ধু বাহিরে বেদিকায় আসিয়া বসিল। চিত্রসেন বলিল, ওহে, ভুলেই গেছলুম, এই একটি মূল্যবান পুঁথি, তোমার চন্দনকাঠের পেটিকাতে সযত্নে রেখে দাও।

—কি পুঁথি?

—আমাদের কবি কালিদাস 'মেঘদূত' বলে একটি কাব্য লিখেছেন, সেই কাব্যেরই কিয়দংশ—

—কে কালিদাস?

—আমাদের উজ্জয়িনীর কালিদাসের নাম তুমি শোন নি ?  
এখন তাকেই আমরা অবন্তীর শ্রেষ্ঠ কবি বলি—

—আমরা মনে পড়েছে, “শকুন্তলা” নামে তাঁর এক নাট্য  
দেখা চলুক। লোকটি লেখেন ভাল, উপমাগুলি চমৎকার।

—এ কাব্য, পুঁথিটা সম্বন্ধে রেখো ; আমার আবার এ  
সব জিনিষ বিহারে রাখবার জো নেই। ভিক্ষু উদয়ন একেই  
ত বলেন, আমার মন এখন সংসারাসক্ত ; তারপর এইসব  
কবিতার বিরহ-কাব্য পড়তে দেখলে বলবেন, আমার হৃদয়ে রমণী-  
প্রেমের প্রতি কামনা, নারীসৌন্দর্যের প্রতি লালসা  
রয়েছে, ভিক্ষু হবার চিন্তা করা আমার পক্ষে  
দুরূহ।

—তা, তোমার ও কবির কাব্যপাঠ ধর্মসাধনার খুব অনুকূল  
বলতে পারি না। আমার ও মনে হয়, কালিদাসের লেখা প্রাচীন  
শাস্ত্রসম্মত নয়, বড় আধুনিক ভাব ঘেঁসা, শাস্ত্রজ্ঞ পণ্ডিতেরা  
নিশ্চয় পছন্দ করেন না।

—সে আর বলতে, সভাপণ্ডিতেরা ত কবির বিরুদ্ধে  
দল তৈরী করেছেন ; তাঁরা বলেন, কালিদাসের কাব্য  
পড়ে উজ্জয়িনীর সকল যুবক যুবতীর অন্তরে কাম-চাঞ্চল্যের সৃষ্টি  
হচ্ছে, এতে নৈতিক অবনতি হবে। বিদ্যার্থীদের আর শাস্ত্র-  
পাঠে মন নেই।

—এ বিষয়ে আমি পণ্ডিতদের সঙ্গে একমত।

—বল কি ! আমার কিন্তু কাব্যটা পাঠ করবার ইচ্ছা হচ্ছে ;



এই চন্দ্রালোকিত শারদ রাত্রি অবশ্য বর্ষা-বিরহ-কাব্য-পাঠের পক্ষে ঠিক সময় নয়—

—তা'ছাড়া, আমাদের মন এখন চঞ্চল, চিত্তভার ; অনুকূল মন না হলে কবির কাব্যপাঠ করা উচিত নয়। তাতে রসগ্রহণের ব্যাঘাত ঘটে, কবিনু প্রতি অবিচার করা হয়।

—ঠিক বলেছ, আচ্ছা, তুমি পুঁথিটি পেটিকাতে রেখে এস !

—আচ্ছা, তুমি যে আমার পেটিকার চারধারে ছবি এঁকে দেবে বলে, তার কি হল ?

—ছবিটি আমি কল্পনা করেছি। আচ্ছা, খঞ্জনপক্ষী তোমার ভাল লাগে, ধরো একদল নৃত্যরত খঞ্জন-পক্ষী—

—কিন্তু শাস্ত্র-পুঁথি রক্ষা করবার পেটিকাতে পাখীর নৃত্যের দৃশ্য—

—দেখ, তুমি যাই বল আমি কোন দেবীর মূর্তি আর আঁকতে পারব না, ফুল-লতা-পাখী এই সব দিয়ে তোমার একটি সুন্দর চিত্র এঁকে দেব। চৈতোর দেওয়ালে সারা স্নান কেবল বুদ্ধ-বুদ্ধ এঁকে আমি শ্রান্ত, ধ্যানী বুদ্ধ, তপস্কারত বুদ্ধ, মারের সহিত সংগ্রামকারী বুদ্ধ, ধর্মপ্রচারক বুদ্ধ, কেবল সংঘাত, সংগ্রাম, সন্ধান—বুদ্ধমূর্তি এঁকে এঁকে আমি ক্লান্ত !

—আজ তোমার মন কেবলমাত্র বিক্ষিপ্ত নয়, বিদ্রোহী দেখছি।

—ঠিক বলেছ, আমার অন্তরে একটা বিদ্রোহ ঘনিয়ে আসছে, সেই জন্টেই তোমার কাছে এলুম। সমস্যার সমাধান খুঁজে পাচ্ছি না। তোমার মধ্যে দেখি, পরমা শান্তি আছে,

তুমি যেন জীবন-সমস্যার একটি শান্তসুন্দর সমাধান করেছ—  
সে জন্য এ বিদ্রোহী চিত্ত নিয়ে তোমার কাছে এলুম।

আমি, যিনি জনকে নিজ জীবনের সমস্যা নিজে মীমাংসা  
করতে হবু, এ বিষয়ে বন্ধু সাহায্য করতে পারে, কিন্তু সমাধান  
করতে পারেনা। নিজ জীবনের বেদনা অশ্রু দিয়ে জীবন-প্রশ্নের  
উত্তর দিতে হয়।

—ঠিক বলেছ। কিন্তু প্রশ্নটা তোমার সঙ্গে আলোচনা  
করলে, আমি হয়ত পথ খুঁজে পাব।

ঋতুপর্ণ “মেঘদূত” পুঁথিটি রাখিয়া আসিলে, চিত্রসেন বলিল,  
আমি স্থির করছি, ছবি আঁকা ছেড়ে দেব, এই চিত্রকলার  
চর্চা ধর্মজীবন-লাভের পরিপন্থী। তোমার কি মনে হয় ?

—আমি প্রথমেই বলেছি, নিজ-জীবনের প্রশ্নের উত্তর জীবনের  
দুঃখসাধনা তপস্যার দ্বারা দিতে হবে। তবে তোমার সমস্যা  
সম্বন্ধে আমি তোমাকে কয়েকটি প্রশ্ন করিতে চাই, ছবি আঁকে  
তুমি কি আনন্দ পাও ?

—ছবি আঁকতে আমার আনন্দ, আমি বসে বসে কল্পনা  
কল্পনা করি ; কিন্তু বর্তমান চৈতন্যে যে ছবি আঁকছি তাতে  
আনন্দ নেই।

—আশ্চর্য্য, এই দ্বন্দ্ব আমার মধ্যেও জেগেছে। আর  
দেবদেবীর মূর্ত্তি করতে ভাল লাগে না, আমি চাই মানবজীবনের  
হাস্যদীপ্ত অশ্রুস্নিগ্ধ সৌন্দর্য্যদৃশ্যগুলি পাথরে ফোটাতে—

—আমারও তাই ইচ্ছা করে। আমার আঁকতে ইচ্ছে করে,

শৈশবের কপকথা,—রাজপুত্র ঘোড়ায় চড়ে চলেছে রাজকণ্ঠার সন্ধ্যানে, গভীর বন, অন্ধকার রাত তারায় বিম্ব বিম্ব করছে, মল্লয়াবনের মাথায় চাঁদ উঠেছে ; অথবা যৌবনে—  
—শিপ্রানদীতে যুবক-যুবতীর স্নানলীলা, বারিষিক্ত সূর্য্যালোক-দীপ্ত তনুতে আনন্দের বালক, বেঁচে থাকার সহজ—এমন কি ছোট ছেলে ঘুড়ি ওড়াচ্ছে, এক ছোট মেয়ে মাথায় শাকের ঘুড়ি নিয়ে হাতে চলেছে, এক জ্ঞানবৃদ্ধ নদীর ধারে ছিপ নিয়ে বসে আছে—এমনি সব দৃশ্য আঁকতে ইচ্ছে করে ।

—বেশ, তাই আঁক । বৌদ্ধ গুহা-মন্দিরে ছবি নাই আঁকলে, উজ্জয়িনী, দ্বারাবতী, বিদিশা, বারাণসী যেখানেই যাবে, শ্রেষ্ঠিরা তাদের নৃত্যপ্রাসাদ সূচিত্রিত করবার জন্যে বহু অর্থ দিয়ে তোমায় নিযুক্ত করবে, তুমি আজ সুপরিচিত ।

—কিন্তু প্রশ্ন তা' নয়, চিত্রকলার বিষয়-বস্তু নিয়ে আমার সমস্যা নয় ; আমি জানতে চাই, আমার এই চিত্রকলার চর্চা আমার ধর্ম্মলাভের পক্ষে অন্তরায় নয় কি, এ পথে কি আমি মোক্ষ পাব ?

—দেখ, ভগবান বুদ্ধ মোক্ষলাভের যে পথ নির্দেশ করেছেন সে সাধনপ্রণালী আমার সম্পূর্ণ অজ্ঞাত, সে পথ আমি বুঝি না, এ বিষয়ে কোন মত দিতে চেষ্টা করা আমার পক্ষে বাতুলতা হবে ; তবে আমি নিজ-জীবনে অনুভব করেছি, আমার ভাস্কর-জীবন আমার আত্মাকে বিকশিত, উন্নত করে তুলেছে ।

—কিন্তু নির্বাণ-লাভ এ পথে হবে কি ?

ঋতুপর্ণ বলিল, নির্ঝাণ কাকে বলো, আমি জানি না।  
 সৃষ্টিকৃৎ হিরণ্যগর্ভ আমার বোধের অগম্য, আমার বুদ্ধির  
 ধা আমি দেখছি, অরূপ আপনাকে 'প্রকাশিত করে  
 চলেছেন নূনব রূপ-ধারায়। এ বিরাট ব্রহ্মাণ্ডের রূপ-মাধুরীতে  
 আমি ইচ্ছা করলেই এ মোহ দূর করতে পারব কি না,  
 জানি না। আমার শিব আজ 'মেতেছেন সৃষ্টির আনন্দে, তাঁর  
 ললিত নৃত্যের ছন্দে প্রলয়-পয়োধিজল থেকে পৃথিবী উঠে এল,  
 সে ছন্দে অনন্ত গগনে সূর্য্য-চন্দ্র-তারা ঘূর্ণিত হচ্ছে, সপ্তসমুদ্রে  
 বারিরাশি আলোড়িত হচ্ছে, সাগর-মেথলা সুন্দরী ধরণীতে,  
 ভূগে, বৃক্ষে, শত সহস্র জীবপর্যায়ে প্রাণ বিকশিত, হিল্লোলিত,  
 রূপ হতে রূপান্তরিত; চারিদিকে কি অপূর্ব প্রাণোচ্ছ্বাস, কত  
 সুন্দর রূপ, কত বিচিত্র ভঙ্গী! চেয়ে দেখ, নীলস্ফটিকসম গগন-  
 তলে চন্দ্রমা, অরণ্যময় পর্বতক্রোড়ে নদীজলরেখা, তরঙ্গায়িত  
 শস্যক্ষেত্রে সবুজের প্রশান্তি, কিংশুক-কণিকা-বৃক্ষের পুষ্পস্তবকে  
 বর্ণোৎসব, আর এই প্রকৃতির মধ্যে কি সুন্দর নরনারীদেহ! এ  
 রূপ-মাধুরীতে বিমুগ্ধ হয়ে সৃষ্টির প্রকাশের বেদনা অন্তরে অনুভব  
 করেছ কি? তা যদি না ক'রে থাকো, তা'হলে চিত্রকলা চর্চা  
 করো না। আজ বিশ্বস্রষ্টার সঙ্গে সৃষ্টির লীলায় মাততে হবে।  
 তারপর যেদিন তিনি তাণ্ডব নৃত্যে সমস্ত সৃষ্টি ধ্বংস করবেন,  
 সেদিন আবার তাঁহার মধ্যে বিলীন হয়ে যাব।

চিত্রসেন নির্ঝাকৃ হইয়া জ্যোৎস্নারাত্রির দিকে চাহিয়া রহিল।  
 কিছুক্ষণ নীরবতার পর ঋতুপর্ণ ধীরে বলিতে লাগিল, আমার



দ্বারমুক্ত করে দেবো, সে পৃথিবীতে স্বপ্রকাশিত হবে ! চিত্রসেন,  
আমায় কী বুলতে পারছ ?

ঋতুপর্ণের পর্য্যন্ত দুই বন্ধুতে আলোচনা চলিল ।

মথারাত্রিতে ঋতুপর্ণ আবার গৃহ ছাড়িয়া বাহির হইল । মন্দির  
শিলা তাহাকে আকর্ষণ করিতেছে, লৌহকে যেমন চুম্বক আকর্ষণ  
করে । ওই শিলামধ্যে কোন্ লাবণ্যময়ী নারী ক্রন্দন করিতেছে,  
তাহাকে মুক্তি দিতে হইবে ।

ঋতুপর্ণ দিশাহারা হইয়া চলিল । পাথর ক্ষোদিত করিবার  
শিল্প-সরঞ্জাম দুই হস্তে । দূরে গিরি বনভূমি শুরু ; ঝিল্লীরবে  
পাণ্ডুবর্ণ আকাশ রিমঝিম করিতেছে, জ্যোৎস্নাধৌত নদীজলরাশি  
দুই তীরে মত্ত আবেগে আছড়াইয়া পড়িতেছে । গুহাগুলি সুষুপ্ত ।

মন্দির-মণ্ডপের সম্মুখে আসিয়া সে স্থির দাঁড়াইয়া রহিল না ।  
গঙ্গাবতরণের জন্য যে প্রস্তরখণ্ড নিদ্দিষ্ট ছিল, সে প্রস্তর লৌহ  
ছেদনী দিয়া কাটিতে লাগিল । ব্রহ্মার কমণ্ডলুতে নয়, শিবের  
জটায় নয়, হিমালয়ের তুষারশ্রোতে নয়, ওই কৃষ্ণশিলার মধ্যে গঙ্গা  
বন্দিনী, তাঁহার কারাগারের অগল-দ্বার খুলিতে হইবে ।  
উন্মত্তের মত ঋতুপর্ণ প্রস্তর ক্ষোদিত করিতে লাগিল । মাঝে  
মাঝে আনন্দে নৃত্য করিয়া উঠিল । সে শুধু যত্নী, গঙ্গামুক্তি আপনা

হইতে বিকশিত হইয়া উঠিতেছে, আজ দ্বিপ্রহরে সপ্তপর্ণ বৃক্ষতলে ধারাবর্ষণে সে যে লাবণ্যময়ী যুবতী দেখিয়াছে, তাহারি ত মূর্তি !

কমলনয়নী, পীনোল্লত-পরোধরা, চাক্রানিতম্বিনী হস্তে মঞ্জলজলপূর্ণ কলস, অপর হস্তে স্তবর্ণবর্ণা ধাত্যমঞ্জ । ছয় ঋতুর পুষ্পে দেহ বিভূষিতা,—কেশে হেমন্তের কুন্দ, নিদাঘের শিরীষপুষ্প, কণ্ঠে বসন্তের নবকুরবক-মালা, কটিতে শীতের লোধ-পুষ্পের কাঞ্চী, সীমন্তে বর্ষার নবকদম্ব, চরণে শরতের রক্ত শ্বেত পদুরাজি ।

মূর্তি ক্ষোদিত করিতে ঋতুপর্ণ নিমগ্ন । কখন চন্দ্র অস্ত গেল, শুকতারা নিভিয়া গেল, সে জানিতে পারিল না । উষার রাঙা আলো যখন তাহার নবোৎকর্গ গঙ্গা-মূর্তির উপর আসিয়া পড়িল, তখন সে চরণতলে পদুর পর পদু ফুটাইতেছে ।

কহার গম্ভীর আস্থানে সে যেন জাগিয়া চমকিয়া উঠিল ।

—ঋতুপর্ণ !

সম্মুখে স্থপতিশেখর রুদ্রদাস একা দাঁড়াইয়া । চারিদিকে অরণের তীব্র আলোক ।

রুদ্রদাস ক্ষুরস্বরে বলিলেন, ঋতুপর্ণ, তুমি কি করছ ! ভোর বেলা ঘুম ভেঙে মনে হল, যেন ছেদনীর শব্দ শুনিছি । একি কাণ্ড !

সারাদিন অলস-ভাবে কাটালে, আর রাতে তঙ্করের মত এসে পাবিত্র মন্দিরগাত্রে বিলাসিনী নারীমূর্তি—

সহসা স্থপতিশেখর স্তব্ধ হইলেন, অপূর্ব গঙ্গামূর্তির দিকে বিমুগ্ধ ভাবে রহিলেন।

ঋতুপর্ণ নীচায় উঠিয়া তখন রুদ্ৰদাসের পায়ের উপর পড়িয়া কাতর কণ্ঠে কহে, আচাযাদেব, আমি উন্মাদ ; রাত্রে কি অসহনীয় আয় উন্মত্ত হয়ে আমি এখানে এসে এই মূর্তি উৎকীর্ণ করেছি—সৃষ্টির প্রকাশের বেদনা—ওই শিলার মধ্যে এই নারী কাঁদছিল—আমাকে যে শাস্তি হয় দিন—আমি হয়ত উন্মাদ—

স্থপতিশেখর কিন্তু ঋতুপর্ণের কোন কথাই শুনিতেন না, আবেগের সহিত বলিয়া উঠিলেন, একি অমৃতনিষান্দিনী দেবী-মূর্তি ! মা গঙ্গা, তোমার একি রূপ দেখলুম ! ঋতুপর্ণ, এ রূপ তুমি কোথায় দেখলে, তুমি দিবাদৃষ্টি লাভ করেছ !

—গুরু, আমার শাস্তির বিধান করুন, তা না হলে আমি মনে শাস্তি পাব না। ..

—আর, আমার বক্ষে আয়, তোমার মত শিষ্য পেয়ে আমি গব্বিত।

—আমি কিছু বুঝতে পারছি না, আমার মস্তিষ্ক-বিকৃতি ঘটেছে।

—ঋতুপর্ণ, এ দেবীমূর্তি গড়ে ভারতের শিল্পেতিহাসের তুমি নবযুগ আনলে। আমিও এ মূর্তি পরিকল্পনা করতে পারতুম না। দেবীকে তুমি প্রেমে স্নেহে মানবী, মানবীকে তুমি সৌন্দর্যে মহিমায় দেবী করেছ ! তবে, এ মূর্তি রাজ-পুরোহিতের পছন্দ হবে না, আপত্তি হবে।



—আচাৰ্য্যদেব ! আমাকে পরিহাস করবেন না—আমার কি প্রাৰ্শ্চিত্ত, কি শাস্তি ?

•—তোমাকে কঠিন শাস্তিই দেব ।

—বলুন, আমি অন্তরে শাস্তি পাই ।

—বলভীপুরে যে মন্দির নিৰ্ম্মাণ করবার বন্দোবস্ত আছে, সে মন্দিরনিৰ্ম্মাণের সমস্ত ভার তোমার উপর, তুমি হবে সে মন্দিরগঠনের প্রধান ও শ্রেষ্ঠ স্থপতি !

—এ কি পরিহাস !

—পরিহাস নয়, বৎস, সত্য । বাও, বলভীপুরে মন্দির নিৰ্ম্মাণ কর, তা'হলে তুমিও বুঝতে পারবে, আমার অন্তরে কত স্বপ্ন, কত কল্পনা জাগে, প্রকাশের কত ব্যথা, কিন্তু চারিদিকে বাধার জন্ত মনের মত করে সৃষ্টি করতে পারি না !

—সৃষ্টির, প্রকাশের বেদনা—শিলার মধ্যে কোন নারী বসে কাঁদছে—আচাৰ্য্যদেব, আমি—

জয়ন্তের ঘুম ভাঙিয়া গেল । গভীর রাত পর্য্যন্ত ষ্ট ডিওতে কাজ করিতে করিতে সে ইঁজি-চেয়ারে ঘুমাইয়া পড়িয়াছিল ।

তাহার নাম ঋতুপর্ণ নয় । বিংশ শতাব্দীতে বাঙলায় সে ভাস্কর জয়ন্ত ।

জাগিয়া ইজি-চেয়ার হইতে সে উঠিল। জানালার কাছে  
 ভাবে ~~সে~~ <sup>সে</sup> আলো। ষ্টুডিওর চারিদিকে মাটির তাল,  
 প্যাস্টার ~~সে~~ <sup>সে</sup> প্যারিস, অর্কফোদিত প্রস্তরমূর্তি, নানা  
 জিনিষ ছড়ান।

তাহার ~~সে~~ <sup>সে</sup> হইল, এখনি বুঝি স্থপতিশেখর রুদ্রদাস তাহার  
 সম্মুখে আসিয়া বলেন, বলভীপুরে মন্দিরনিষ্কাশের ভাব  
 তোমার ওপর।

হায়, এ যুগে কেহ মন্দিরনিষ্কাশ করে না!

বিংশ শতাব্দীর জীবনকে মূর্তি দিতে হইবে। মানবের স্বপ্ন,  
 বেদনা, সংগ্রাম, আনন্দ।

ষ্টুডিওর জানালা, দ্বার সে খুলিয়া দিল। প্রভাতের আলো  
 ষ্টুডিওর চারিদিক দীপ্ত করিয়া তুলিল।

## ভেরনল

উত্তর-ভারতের নানা স্থানে ঘুরতে ঘুরতে নৈনিতালে এসেছি। নভেম্বরের শেষে নৈনিতাল প্রায় জনহীন। আমাদের হোটেলের দোতালায় আমি আর একজন বাঙ্গালী প্রৌঢ় ডাক্তার, দু'জন আছি। হোটেলটি পাহাড়ের মাথায় বনের ধারে, নীচে নীল হ্রদ পাহাড়-ঘেরা, কখনো মরকতমণির মত ঝকঝক করে, কখনো গলিত পোখরাজের মত। রৌদ্রতপ্ত স্ননির্মল দিন, জ্যোৎস্নাময় স্নশীতল পাণ্ডুর রাত্রি, চারিদিকে অপূর্ব নিস্তরতা।

সমস্ত দিন হ্রদটি চিত্রিত দর্পণের মত স্থির ছিল, রঙীন বাঙোর সারি, সবুজ বন, নীলাকাশ, মেঘের স্তূপ, তার ওপর নানা রূপ ও বর্ণের প্রতিবিম্ব। সন্ধ্যাবেলায় পশ্চিমাকাশে মেঘপুঞ্জের রঙের সঙ্গে রঙের ঠেলাঠেলি, দিগ্বধূরা হোলিখেলায় মেতে উঠল, হ্রদ স্ফবর্ণবর্ণ। তারপর পাইন-বনের পিছনে চাঁদ উঠল, পাহাড়ের তলায় ঘন অন্ধকারময় হ্রদ রহস্যময়ী নারীর কালো চোখের মত।

ডিনার খেয়ে যখন ঘরের সামনে কাচ-ঘেরা বারান্দায়

বসলুম, বিষ্টি পড়ছে, চারিদিক সজল অন্ধকার, দেবদারু-বন  
আন্দোলিত করে ঝোড়ো বাতাস উঠছে ক্ষুদ্র ক্রন্দনের  
মত

বারান্দায় একা গেল না, ঝড়ের জগ্নু নয়, দাঁতে অসহ  
বেদনা অনুভব করলুম। বাঁ মার্টির শেষে একটু ব্যথা দু'দিন  
ধরে রয়েছে, সহসা মাঝ রাত্রে ঝড়ের মধ্যে ব্যথা অসহ মনে  
হল, দাঁতের স্নায়ুগুলি যেন ছিড়ে যাচ্ছে, ভয়ঙ্কর যন্ত্রণা! ঘরে  
টুকে দেখলুম, এ্যাস্পিরিন্ বা বেদনা-নাশক কোন ওষুধ সঙ্গে  
নেই। রাত বারোটাই হবে, বাহিরে ঝড় উঠেছে। ওষুধের  
জগ্নু কোথায় যাওয়া যায়?

মনে পড়ল, আমার ঘরের পরে দুটি খালি ঘর, তার পরের-  
টাতে প্রোচ ডাক্তার সরকার আছেন। তাঁর কাছে নিশ্চয়  
কোন ওষুধ পাওয়া যাবে। ডাক্তারের সঙ্গে একদিন সামান্য  
আলাপ হয়েছিল। অদ্ভুত মানুষ মনে হয়। তিনি সমস্ত  
পৃথিবী দু'বার পরিভ্রমণ করেছেন। কোনদিন দেখি, বারান্দায়  
বেতের ইঁজিচেয়ারে স্তর বসে আকাশে মেঘের লীলা হৃদে বঙের  
খেলা দেখছেন, কোনদিন দেখি মোটা চাবুক হাতে ঘোড়ায়  
চড়ে ছুটে চলেছেন ভীমতালের দিকে। ছ'ফুট লম্বা দীর্ঘ দেহ,  
সুঠাম, দৃঢ়, বৃদ্ধ শালগাছের মত, সব সময়ে ছাই রংএর একটা  
সুট পরে, চোখে কালো কাচের চশমা, রেখাক্রান্ত মুখে আরক্তিম  
ভাব, নাকেরডগায় লাল ছাপ কাঁচকড়ার ফ্রেমের নীচে  
টকটক করে।

দাঁতের যন্ত্রণা অসহনীয় হয়ে উঠল। ডাক্তারের ঘরে যাওয়া ছাড়া উপায় নেই।

করিডরের এক কোণে একটি আলো য়ুহ জ্বল্ ডাক্তারের ঘরের দরজার ওপর তিনটে টোব: লুম,—ডাক্তার সরকার !

ভেতর হতে উত্তর হল,—আত্রে ! (দরজা খুলে আসুন)

দরজা ভেজান ছিল, একটু ঠেলতে খুলে গেল।

ঘরে প্রবেশ করে দেখলুম, স্প্রিং-গদিওয়াল। রেঙ্কিন-মোড়া লম্বা সেতিতে ডাক্তার সরকার অর্ধশয়ানভাবে সামনের জানালার দিকে চেয়ে ; জানালার কাচের ওপর বৃষ্টি-ঝড় আছড়ে পড়ছে ক্ষুন্ন সমুদ্রতরঙ্গোচ্ছ্বাসের মত। বাহিরে ঝঞ্জার আর্তনাদ কিন্তু ঘরের ভেতর অদ্ভুত স্তব্ধতা।

সেতির পেছনটা দরজার দিকে, ডাক্তার সরকার আমার প্রবেশ দেখতে পাননি, তিনি বলে উঠলেন, আসুন হের রোজেনবেয়ার্গ, আপনার প্রতীক্ষা করছিলুম।

হের রোজেনবেয়ার্গ ! এ হোটেলে কোন জার্মানকে ত কখনও দেখিনি। চাঁচিয়ে বল্লুম, আমি—কিছু মনে করবেন না—দাঁতের অসহ যন্ত্রণা—

চমকে তিনি লাফিয়ে উঠে দাঁড়ালেন, চশমার কালো কাচ ঢাকা চোখ দেখা গেল না, কুঞ্চিত কপালের ওপর কালো সাদা চুলগুলি চক্চক্ করতে লাগল।

ও, আপনি ! কি চাই ?

দেখুন, দাঁতে বড় ব্যথা, যদি আপনার কাছে কোন ওষুধ থাকে, ~~এই~~ গোস্‌পিরিন—

ব্যথা! ~~এই~~ ত ব্যথা পাবেন জীবনকে তত গভীর ভাবে অনুভব করবেন। যার যত বেদনা-বোধ সে তত উচ্চস্তরের জীব।

দেখুন, ডাক্তার যদি দার্শনিক হয়ে ওঠেন, রোগীর অবস্থা বড় সঙ্গীন হয়।

হা! হা! ডাক্তার-দার্শনিক! কোথায় ব্যথা, বলুন?

দাঁতে, এই বাঁ মাড়িতে, স্নায়ুগুলি কে ছিঁড়ে—

থাক, ব্যথার বর্ণনা করতে হবে না, আমি বুঝেছি। বসুন, বসুন, ওই সোফায়। কি লিকার আপনি ভালবাসেন, কুয়েল, বেনেডিক্‌টিন্—আমার এখানে কয়েক রকম আছে মাত্র।

সামনের ছোট টেবিলে নানা বর্ণ ও আকৃতির বোতল ও ছোট বড় লিকার-গ্লাস।

না, আমি কিছু খাই না!

খান না? হা, হা, খেলে দাঁতের ব্যথা হত না। খুব যত্নগা হচ্ছে দেখছি আচ্ছা, দেখি একটা ওষুধ আছে।

ডাক্তার সরকার লেখবার টেবিলের ড্রয়ার থেকে একটি ছোট শিশি বের করলেন। শিশি হতে দুটি চ্যাপ্টা বডি এক মাঝারি গ্লাসে রাখলেন, তারপর একটা বড় বোতল হতে সোনালী তরল পদার্থ গ্লাসে ঢেলে দিলেন। গ্লাসটা নেড়ে আমার হাতে দিয়ে বললেন, খেয়ে ফেলুন, একটু হালকা বোর্দো

দিলুম, ওতে ওষুধের কাজ ভালই হবে, আর আমার ঘরে জল নেই, চাকরটা সন্ধ্যা থেকে পলাতক। ওষুধের অনুপান হচ্ছে দক্ষিণ ফ্রান্সের সূর্যালোকপুষ্ট রস।

ব্যথা দূর করবার জন্য তখন কেউ হাতে দিলেও খেয়ে ফেলতে পারতুম। বড়ি-মিশ্রিত বোর্দো এক চুমুকে খেয়ে ফেল্লুম।

ডাক্তার সরকার আমার মুখোমুখি বসলেন স্নেহে হেলান দিয়ে। ছোট গ্লাস হাতে এক চুমুক সারক্ৰজ খেয়ে বলেন, কেমন মনে হচ্ছে ?

বেদনা কম মনে হচ্ছে।

বাস, তাহলেই হল। বেদনা হয়ত আপনার আগেকার মতই আছে, তবে ওই যে মনে হচ্ছে বেদনা নেই তাহলেই হল। আসল হচ্ছে মনে, আর মন দিয়ে ঋ অনুভব না করি তাই মিথ্যা। বসুন, গল্প করা যাক, এ ঝড়ের রাত কি আর এখন ঘুম হবে !

বেশত, আপনি একটা গল্প বলুন, আপনার জীবনে অনেক অভিজ্ঞতা, কত দেশ কত রকম মানুষ দেখেছেন, তার ওপর আপনি ডাক্তার, কত রকম রোগী—

ডাক্তারের রোগী দেখা, clinical eye দিয়ে দেখা, সত্যিকার দেখা নয়, যে দেখায় বেদনা নাই, হৃদয়ের ব্যথা নাই, আতঙ্ক নাই, সে দেখা সত্যি দেখা নয়।

কিন্তু দেখায় আনন্দও ত থাকতে পারে।

ই, কিন্তু সব গভীর আনন্দানুভূতির সঙ্গে তীব্র বেদনা রয়েছে। সুপ মনের ব্যথা নয়, দেহের ব্যথাকেও যত রকম ভাবে যত নূতন করে জানতে পারবেন, জীবনকে তত গভীর ভাবে বুঝবেন, প্রাণের মর্মস্থলে গিয়ে পৌঁছবেন। এই দেহ মনের বেদনার অভিজ্ঞতার আমাদের সত্তা গড়ে ওঠে, আমাদের ব্যক্তিত্ব প্রকাশিত হয়।

আপনার জীবনে বহু অভিজ্ঞতা আছে মনে হয়।

ই, নব নব অনুভূতিনাভের ত্রুষ্ণ আমাকে সারা জীবন দিশাহারা করেছে। ডাক্তাররূপে আমাকে দেখতে হয়েছে মানুষের দেহ-মনের ভাঙনের রূপ, তার পরম বেদনার মূর্তি। সেজন্য প্রকৃতির বা মানবসৃষ্ট পরিপূর্ণ সৌন্দর্য দেখবার জন্য আমি দেশ হতে দেশান্তরে ঘুরেছি, দেহের সমস্ত স্নায়ু শিরা উপশিরার রক্তশ্রোত দিয়ে প্রাণের গতি উল্লাস আনন্দময় অভিব্যক্তি অনুভব করতে চেয়েছি। এম্মি ঝড়ের রাতে আমি সাতার পদ্মাপার হয়েছি, বন্যায় নগরগ্রাম ভেসে যেতে দেখেছি, কারাকোরাম পর্বতের সতের হাজার ফিট ঊঁচুতে তুষার-নদী পার হয়ে কাশ্মীর হতে খোটান গেছি, মোটরকারে সাহারার নরুভূমি অতিক্রম করেছি, উগাণ্ডার জঙ্গলে সিংহ মেরেছি। কত অপূর্ব বস্তু কত অপকূপ দৃশ্য চোখের সামনে ভেসে ওঠে, শ্রীনগরে ডাল্ হুদে রঙীন সন্ধ্যা; শীতের স্তইজার-ল্যাণ্ডে জ্যোৎস্নারাত্রে তুষার-শুভ্রতায় শ্লেজ্‌চালান; লিডোতে ভূমধ্যসাগরের সমুদ্র তীরে সূর্যালোক পান, নিউইয়র্কের পঞ্চম



এঁভনিউর জনতা, জঙ্গলবেষ্টিত একোঁর-ভাট ; বেলজিয়ামের যুদ্ধ ট্রেঞ্চ ; অন্ধকার রাতে তাজমহল ; প্রয় : কস্তমেলো ; মিসিসিপির ঘন অরণ্য ; প্রশান্ত মহাসাগরের : রোপ্সেন । এ সব অভিজ্ঞতা আমার আত্মাকে মূর্ত করেছে বটে কিন্তু আমার সত্তার বিকাশ হয়েছে মানব অন্তরের বেদনাময় অনুভূতিতে ।

ডাক্তার সরকার চুপ করলেন । ঝোড়ো বাতাসে কাচের জানালা ঝন্ঝন্ করে উঠল । অন্ধকার আকাশের এক প্রান্ত হতে অপর প্রান্ত বিদ্যুৎ চমকে গেল । ঘন নীলপর্দা ঘেরা আলো কেঁপে কেঁপে উঠল ।

আমি ধীরে ব্লুম, আচ্ছা আপনি হেরু রোজেনবেয়ার্গ নামে কার আগমনের প্রতীক্ষা করেছিলেন ?

ডাক্তার সরকার চমকে সোজা হয়ে বসলেন ; তাঁর চশমার কাচ চক্চক্ করতে লাগল অন্ধকার রাতে কালো বাঘের চোখের মত । বোতল থেকে একটু সুরা ঢেলে পান করে কিছুক্ষণ চুপ করে বসে রইলেন ।

তারপর আমার দিকে চুরুটের বাক্স এগিয়ে দিয়ে বলেন, একটা চুরুট ধরান । গল্পটা আপনাকে তাহলে বলি—

মানসেনে ডাক্তারি পরীক্ষায় পাশ করে আমি কিছুদিন

## ভেরনল

সুইজারল্যান্ডে ডাভোসে এক যক্ষ্মা-শ্রানোটোরিয়মে কাজ করি।  
এমি নভেম্বর মাসের শেষাংশে একবার ডাভোস থেকে  
প্যারিসে গারতলিয়ঁতে যখন নামলুম, রাত এগাখটা  
হবে। ক্যালি জর্নিষ বুঝিয়ে দিচ্ছি, ওভারকোটের ওপর  
কে খাপড় মারলে—হের ডক্টর!

ফিরে দেখি রিচার্ড রোজেনবের্গ, আমাদের শ্রানোটোরিয়মের  
একটি রোগী। লোকটির বয়স চল্লিশের কাছাকাছি হবে,  
দেখতে আমার চেয়েও লম্বা, বহুদিন রোগে ভুগে শীর্ণ শুষ্ক  
মুখ, চোখে একটা তাঁর ক্ষুধিত দৃষ্টি। তার বা পায়ের  
গোড়ালির এক হাড়ে যক্ষ্মা, ছ'বছর শ্রানোটোরিয়ম বাসের  
পর প্রায় সেরে গেছে, এখন ক্রাচের (crutch) সাহায্যে  
বা পা তুলে খটখট করে ঘুরে বেড়ায়। লোকটি জাতিতে  
সুইস, তাঁর পূর্বপুরুষ এসেছিলেন নরওয়ে থেকে। জুরিকের  
এক ধনী মহাজনের একমাত্র সন্তান।

বিস্মিত হয়ে বল্লুম, আপনি এখানে? পরশু আপনার জ্বর  
হয়েছিল, আপনারত শ্রানোটোরিয়ম হতে বার হওয়া বারণ।

আমি পলাতক, হের ডক্টর। প্রাণ হাঁপিয়ে উঠছিল।  
আপনি কোন হোটেলে যাচ্ছেন?

ল্যাটিন কোয়ার্টারে আমার এক জানা সস্তা হোটেল আছে,  
সেখানে ঘর রাখতে লিখেছি।

চলুন, আপনার সঙ্গেই যাব। একা বড় হোটেলে গিয়ে  
থাকতে ভাল লাগবে না। ছাত্রদের থাকবার হোটেল ত?

পথে ট্যাক্সিতে রোজেনবেয়ার্গ বল্লেন, তাঁর মাথার মাঝে মাঝে অসহ্য যন্ত্রণা হয়, তাঁর বিশ্বাস তাঁর মস্তিষ্ক ক্যানসার হ'চ্ছে ; জুরিকে এক ডাক্তার নাকি বল্লেন ... একটা টিউমার হতেও পারে। প্যারিসে বড় ডা. ... দেখাবার জন্য তিনি স্ত্রীনাটোরিয়ম থেকে অনুমতি নিয়ে এসেছেন। তাঁর বিশ্বাস, একটা ক্যানসার কোথায়ও হ'চ্ছে।

কথাটা আমি বিশ্বাস করলুম না। আমার হোটেলে আমার ঘরের কাছেই বোজেনবেয়ার্গের জন্য ঘর ঠিক করে দিলুম। শোবার উদ্যোগ করছি, টেপের স্ট বদলে সাজসজ্জা করে রোজেনবেয়ার্গ আমার ঘরে এসে ঢুকলেন, বল্লেন,—চলুন, একটু বেরোন ষাক।

আমি বড় শ্রান্ত।

ছ'বছর পরে প্যারিসে এলুম. এরমধ্যেই শোব! Tender is the night—

আপনি ঘুরে আসুন, আমি কাপড় জামা ছেড়ে ফেলেছি।

সেন-নদীর তীরে একবার ঘুরে আসতে না পারলে রাত্রে ঘুম হবে না। আচ্ছা, বনুই!

বিছানাতে শুয়ে শুনে লাগলুম, হের রোজেনবেয়ার্গ সরু সিঁড়ির কাঠের ওপর ক্রাচের খট খট শব্দ করে দ্রুত নেমে চলেছেন, প্যারিসের পথে আনন্দ লাভের সন্ধানে।

পরদিন সকালে খবর নিয়ে জানলুম, রোজেনবেয়ার্গ অকাতরে ঘুমোচ্ছেন, রাত তিনটের সময় মত্তাবস্থায় হোটেলে ফিরেছিলেন।

এরপর সাতদিন রোজেনবেয়ার্গের সঙ্গে দেখা হয় নি।

রাতে পুষ্টি টস্কা দেখে অপেরা-প্রাসাদ হতে, রাস্তায় বের হয়েছি, ওর ওপর এক খাপড় মেরে কে বল্লে—হের্ ডক্টর ! পিছন ধরে দেখি, রিচার্ড রোজেনবেয়ার্গ !

হের্ ডক্টর, কেমন লাগল অপেরা ?

চমৎকার।

চলুন, কাছে ইটালীয়ান রেস্টোরাঁ। আমার জানা আছে, চমৎকার মোজেল মদ রাখে ? ১৯১৩ সালের যুদ্ধের ঠিক আগের বছরের মোজেল মদ, না এলে আমি সত্যিই দুঃখিত হব।

অপেরার সঙ্গীত লহরী শ্রবণে অন্তর ডখন উল্লসিত। শালিয়াপেনের স্বরদীপ্ত মহান কণ্ঠধ্বনি কানে বাজছে। বল্লম, চলুন আজ রাত্রে একটু হলা করা যাক।

রেস্টোরাঁতে কিছু খেয়ে আমরা অপেরার কাছে এক কাফেতে এসে বসলুম। পথের ফুটপাথের অর্ধেক জুড়ে টেবিল চেয়ারের সারি, পাশ দিয়ে নানা সজ্জার নরনারীশ্রোত অবিরাম চলেছে।

রোজেনবেয়ার্গ, প্যারিসের জীবন কেমন উপভোগ করছ ? বড় বেদনা, মাথার মধ্যে অসহ্য বেদনা হয়।

পকেট থেকে সে একটি ছোট শিশি বের করে ছোট টেবিলের ওপর রাখলে। কিছুক্ষণ পর শিশি থেকে দুটো বড়ি বার করে কফির সঙ্গে খেয়ে ফেলে।

. দু'ঘণ্টা অন্তর এই এ্যাস্পিরিন খাচ্ছি ; না খেলেই যন্ত্রণায় মরে যাব ।

•কোনও ডাক্তার দেখালে ?

দেখালুম বই কি, ডাক্তার লেভি বললেন, =য় নয় পেটে, লিভারের কাছে টিউমার মনে হচ্ছে, ক্যানসারের পূর্বলক্ষণ হতে পারে । তবে আমি জানি ক্যানসার. ও ক্যানসার হবেই । ক্যানসারে আমার আ মরেছেন । ও! সে কি অসহ যন্ত্রণা !

সহসা সে থামল । দেখলুম জ্বালাময় তীক্ষ্ণ দৃষ্টিতে পথের সুসজ্জিতা বারবিলাসিনীদের দিকে চেয়ে আছে । তিনটি রূপাজীবা চলেছে শিকারের সন্ধানে । রোজেনবেয়ার্গের চেয়ারের পাশে খাড়া করা ক্রাচ দু'টির দিকে বক্র দৃষ্টিতে চেয়ে তারা চলে গেল । রোজেনবেয়ার্গের শীর্ণ মুখ আরও কালো হয়ে উঠল ।

বল্লুম, ডাক্তাররা ত নিশ্চিতরূপে কিছু বলছেন না ?

নিশ্চিতরূপে কে কি বলতে পারে ? অহর্নিশি এই যে অসহ ব্যথা অনুভব করছি ! ক্যানসার রোগীকে দণ্ডে দণ্ডে পলে পলে মরতে আমি দেখেছি, তার সব সিম্‌টম্ আমি জানি । গার্স, আরও দু'গ্লাস । আচ্ছা আপনি ডাক্তার, ক্যানসারের কোন চিকিৎসা আছে ?

এখনও পর্য্যন্ত আমাদের জানা নেই, নানা পরীক্ষা চলছে ।

শুধু রোগী অসহ যন্ত্রণা ভোগ করে মরে ।

একদিন ত আমাদের প্রত্যেককে মরতে হবে ।

ক্যানগারের রোগী যদি আত্মহত্যা করে, তাতে দোষ কি ?

প্রাণ ~~আ~~ গাণকে আমরা এখনও সৃষ্টি করিতে পারিনি, স্বইচ্ছায় তাকে ~~শ~~ শ করার অধিকার আছে কি ?

শুধু যন্ত্রণা ভোগের অধিকার আছে । আমি আত্মহত্যা করতে পারি, আমার মা নেই বাবা দু' মাস হল মারা গেছেন, কিন্তু এক বুড়ী দিদিমা আছেন, তিনি মনে বড় আঘাত পাবেন । গারসঁ, এই নোটটা ভাঙিয়ে আন দেখি ।

কাফের এক খিদমৎগার এগিয়ে আমাদের কাছে এল । রোজেনবেয়ার্গ তার বৃকের পকেট থেকে এক মোটা মনি-ব্যাগ বের করলে, নানা রংএর নোটের ভরা । নোটের তাড়া থেকে একখানি একহাজার ফরাসী ফ্র্যাঙ্কের নোট বের করে গারসঁর হাতে দিলে । তারপর মনিব্যাগটা খুলেই টেবিলের ওপর রাখলে । শুধু কাফের নয়, রাস্তার লোকেও দেখতে পেলে নোটভরা মনিব্যাগ টেবিলের ওপর পড়ে রয়েছে ।

ব্যাগটা তুলে রাখ, রিচার্ড ।

হঁ ! এব্যাগে মার্ক-ফ্র্যাঙ্ক-পাউণ্ড-ডলারে ত্রিশ হাজার ফরাসী ফ্র্যাঙ্কের বেশী আছে ।

রোজেনবেয়ার্গ কথাগুলি এত উচ্চস্বরে বলল যে রাস্তার লোকও শুনতে পেলে । কাফের লোকেরা আমাদের টেবিলের দিকে অবাক হয়ে চেয়ে রইল ।

আস্বে, এত চেঁচামেচি করছ কেন। ব্যাগটা পকেটে রাখ। এত টাকা পকেটে নিয়ে প্যারিসের রাস্তায় একরকম ভারে ঘোরার মানে কি ?

হঁ, মানে কি ? বেশ বলেছ ডক্টর, তোমাকে ধাঁধা দেওয়া যাচ্ছে, উত্তর দাও ; একটা লোক ত্রিশ হাজার ফ্র্যাঙ্ক পকেটে নিয়ে সবাইকে দেখিয়ে প্যারিসের রাস্তায় ঘুরে বেড়াচ্ছে, কেন ? হা হা, জীবনটা একটা গোলকধাঁধা নয় কি, একবার প্রবেশ করলে সব সময়ে তা থেকে বের হবার পথ খুঁজে পাওয়া যায় না।

দেখ এর চেয়ে কম টাকার জন্য প্যারিসের পথে লোক খুন হয়েছে।

বা, বেশ বলেছ। শোন ডাক্তার, তোমার সঙ্গে আমার দেখা হল ভালই হল, আমার যে রকম শরীরের অবস্থা, যে কোন সময়ে কিছু ঘটতে পারে, আমার যদি হঠাৎ মৃত্যু হয়, দেখ আমি এখন লক্ষপতি, আমার সম্পত্তির অর্ধেক আমি এক ক্যানসার রিসার্চ হাস্পাতালে দিয়ে যেতে চাই, আমার একটা উইল আছে, শ্রানার্টোরিয়মে আমার ঘরে নয়, এক জায়গায় লুকোনো আছে, সেটা তোমায় বলে যেতে চাই—

সহসা রোজেনবেয়ার্গ চুপ করে পথের দিকে চাইলে। আমাদের কাছ দিয়েই একটি যুবক ও যুবতী যাচ্ছিল, যুবকটি কদাকার ভীম প্রকৃতির দেখতে, প্যারিসের গুণ্ডাদের মনে হয়, যুবতী কিন্তু পরমাসুন্দরী, স্ফুটিত শ্বেতপদ্মের মত স্নিগ্ধ লীলায়িত মূর্তি !

রোজেনবেয়ার্গ দাঁড়িয়ে তাদের দিকে চেয়ে ডাকলে,—  
মাদলেন! মেয়েটি হেসে এগিয়ে এল, আমাদের টেবিলে  
আমাদের দু'জনের মাঝে চেয়ারে এসে বসল। যুদ্ধটি  
কিন্তু কোথায় পড়ল।

এ্যালো মাদলেন! কি খাবে?

চল, এক রেস্টোরাঁতে যাওয়া যাক, সন্ধ্যা থেকে খাইনি,  
বড় ক্ষিদে পেয়েছে।

মাদলেনের দুই চোখে কৌতুকময় হাসি, রোজেনবেয়ার্গ  
তার দিকে মন্ত্রমুগ্ধের মত চেয়ে। ধীরে সে বলল, আমরা  
এই খেয়ে এলুম, এই নাও, কাল সকালে খেও।

রোজেনবেয়ার্গ আবার ব্যাগ বের করে মাদলেনের হাতে  
একখানা পাঁচশ ফ্র্যাঙ্কের নোট দিলে। ব্যাগে নোটের  
তাড়া রাস্তার লোক শুদ্ধ দেখতে পেল। মাদলেনের নয়ন  
দু'টি বিহ্বৎপর্ণ।

আমি বলুম, অনেক রাত হয়েছে, এবার যাওয়া যাক।

আমরাও যাব, চলো মাদলেন।

টাগিলিতে মেয়েটি বসল আমাদের দু'জনের মাঝখানে।  
আমি চুপ করে বসে রইলুম, রোজেনবেয়ার্গ অনর্গল বকে  
যেতে লাগল।

দেখ ডাক্তার, আজকাল রাত্রে ভেরনল না খেলে আমার  
ঘুম হয় না। আচ্ছা, কোন ভাল ঘুমের ওষুধ তোমার জানা  
আছে? তুমি দিতে চাও না, বুঝতে পারছি।



মেয়েটি হেসে বলে উঠল, আমি জানি।

আবেগের সূত্রে রোজেনবেয়ার্গ বলে, কি ?

মেয়েটি উচ্চ হেসে বলে, সে বলব না।

তারপর সমস্ত পথ রোজেনবেয়ার্গ আমার সঙ্গে ভেরনলের গুণ ও ক্রিয়া সম্বন্ধে আলোচনা করতে করতে এল,—সে তিন থেকে চার ট্যাবলেট খায় ; ক'টা ট্যাবলেট খেলে হত্যা হবার সম্ভাবনা, ডাভোসে কে কবে ভুলে বেশী ভেরনল খেয়ে মরেছে, ইত্যাদি।

হোটেলে ঢুকে রোজেনবেয়ার্গকে একটু আড়ালে ডেকে বললুম,—মেয়েটি কে ? সে অবাক হয়ে বলে, কে ? আমি কি ওকে জানি ? ওকে আমি চিনি না। বিস্মিত হয়ে বললুম, তা'হলে তুমি ওকে জান না ! তোমার সঙ্গে এত টাকা রয়েছে, ব্যাগটা না হয়—দেখলুম, আমাদের ট্যাক্সির পেছনে আর একটা মোটরকার আসছিল।

রোজেনবেয়ার্গের বিশীর্ণ পাণ্ডুর মুখে অদ্ভুত হাসি খেলে গেল।

হেঁর ডক্টর, এই পৃথিবীতে আমরা কে কাকে জানি ?

মেয়েটিকে নিয়ে রোজেনবেয়ার্গ তার ঘরে গেল। আমি আমার ঘরে গিয়ে কোচে ক্লান্ত হয়ে বসে পড়লুম ; বাইরে টিপ টিপ বৃষ্টি পড়ছে, শূন্য কালো গলিতে বাতাস বইছে ক্যাপা কুকুরের অবিশ্রান্ত আর্ন্তনাদের মত ; সমস্ত হোটেল নিঝুম নিদ্রিত।

এ রাত্রে ঘুমোবার আশা নেই ! ফায়ার প্লেসের উপর

অষ্টাদশ শতাব্দীর পুরাতন ঘড়িটা শূন্য ভাবে চেয়ে রইল।  
মোপাসাঁর ঘড়িটা গল্পের বই নিয়ে পড়তে বসলুম।

কখন খুঁজতে পড়েছিলুম জানি না, জানালার সারির বন্  
বন্ শব্দে ঘুম ভেঙ্গে গেল। ঝড় উঠেছে, তার সঙ্গে ঝড়  
তুষারপাত।

বাহিরে উন্মত্তা প্রকৃতি, গর্জমান অন্ধকারে বিদ্যুতের  
ঝিকঝিক, কিন্তু হোটেল অস্বাভাবিক নিস্তব্ধ।

চমকে উঠলুম, রোজেনবেয়ার্গের ঘরে কি হয়েছে কে  
জানে? মেয়েটি নিশ্চয় কাজ শেষ করে চলে গেছে। পাশে  
স্নানের ঘরে জলের কল ভাল করে বন্ধ হয়নি, জলের ফোঁটা  
টপ্ টপ্ করে পড়ছে।

মনে হল, কে যেন আমায় ডাকছে, ডক্টর, হের ডক্টর!  
কাঠের দরজার ভেতর দিয়ে অন্ধকার করিডর পার হয়ে সে  
আহ্বান আসছে।

ধীরে উঠে ঘরের দরজা খুললুম, অন্ধকার করিডর,  
রোজেনবেয়ার্গের ঘরের দরজা একটু ফাঁক করা, সেই ফাঁক  
দিয়ে আলোর রেখা পথের তমিস্রপুঞ্জ এনে পড়েছে।  
আলোর রেখা দেখে মনে সাহস হল।

চকিতপদে করিডর পার হয়ে রোজেনবেয়ার্গের ঘরে প্রবেশ  
করলুম। স্তব্ধ ঘর, রোজেনবেয়ার্গ বিছানাতে চাদরের ওপর  
স্থির হয়ে শুয়ে আছে। স্মৃতি ছেড়ে রাতের পোষাকও পরেনি।  
অতিস্থির শুয়ে, চোখে অচঞ্চল দৃষ্টি; পাশে ছোট মার্বেল

টেবিলে ভেরনলের শূন্য শিশি, দুটি খালি বোতল ও খালি  
গেলাস। মেয়েটি কোথায়ও নেই।

ডাকলুম,—রোজেনবেয়ার্গ! রিচার্ড!

কোন সাড়া নেই। কোথায় একটা খটখট শব্দ হল।  
কপালে হাত দিয়ে দেখলুম, তুষার-শীতল। হাত ধরে নাড়ী  
দেখলুম, কোন স্পন্দন নেই। জামা খুলে বুকের ওপর কান  
চেপে শুনতে চেষ্টা করলুম, বুকের ধুকধুকানি একটু আছে  
কিনা। চিরদিনের মত হৃৎপিণ্ডের স্পন্দন থেমে গেছে।  
বাহিরে ঝোড়ো বাতাস গর্জন করছে।

বুঝলুম আমার আর কিছু করবার নেই। ধীরে চোঁখ  
দু'টি বন্ধ করে, গায়ের ওপর একটি চাদর ঢাকা দিয়ে দিলুম।

নিজের ঘরে পরিশ্রান্ত হয়ে সোফায় বসতে শীতের রাত্রে  
গায়ে ঘাম দিল।

আবার মনে হল, কে আমায় ডাকছে, ডক্টর! হেব  
ডক্টর! অন্ধকার করিডর পার হয়ে কাঠের দরজার ভেতর  
দিয়ে সে ডাক আমার সমস্ত ঘর ধোয়ার মত ভরে তুলেছে।  
একটা সিগারেট ধরালুম, একটা জানালা খুলে দিলুম, যদি  
বাহিরের ঝোড়ো বাতাসের গর্জনে ঘরের এ ডাক ডুবে যায়।

আহ্বান অতি মৃদু ছিল, তীব্র উচ্চ হয়ে উঠল। শুধু  
আমার নাম ডাকা নয়, একটা খটখট শব্দ, সিঁড়ির কাঠের  
ধাপের ওপর ক্রাচের খটখট শব্দ। সুষুপ্ত হোটেলের স্তব্ধতা  
কৈপে উঠেছে।

ক্রাচের শব্দ সিঁড়ি দিয়ে উঠে ঘরের সারি পার হয়ে অন্ধকার 'করিডর অতিক্রম করে আমার ঘরের সম্মুখে এসে থামল, ঘরের বজার উপর তিনটে টাকা পড়ল—হের ডক্টর !

তখন আতঙ্কে মূর্ছা যাওয়া উচিত ছিল। কিন্তু আমি আতঙ্ক-রস অনুভব করতে চেষ্টা করছিলুম। রিচার্ড রোজেনবেয়ার্গের প্রেতাত্মা দেখতে আমি প্রস্তুত।

বলুম,—আত্রে !

ধীরে দরজা খুলে গেল। অন্ধকার পটভূমিতে ছবির মত রিচার্ড রোজেনবেয়ার্গের মূর্তি ফুটে উঠল, মোটা কালো ওভার-কোট পরা, মাথায় ধূসর টুপি, দুই বগলে লম্বা ক্রাচ ! মুখের ওপর ঘরের আলো পড়ে কাচের মত চক্চক করচে। চোখে ক্ষুধিত তীব্র দৃষ্টি নেই, বড় শ্রান্ত বিমানো ভাব।

যেন বেতার-যন্ত্র হাতে কথাগুলি কানে এল। হের ডক্টর, আমি বাইরে যাচ্ছি, উইলের কথা বলতে এলুম, উইলটা আছে আমাদের স্তানাটোরিয়মে, ফ্রাউ মায়ারের ঘরের টেবিলের তৃতীয় ড্রয়ারে আছে। আচ্ছা, বন্ধুই, অনেক দূর যেতে হবে।

মূর্তি মিলিয়ে গেল। অন্ধকারে বিমূঢ় চোখে চেয়ে রইলুম। খটখট শব্দ দূর হতে চলে যাচ্ছে।

এতক্ষণে গা শিরশির করে উঠল, হাত পা ঠাণ্ডা হয়ে আসছে, নিজের বুকের ধুকধুকানি শুনতে পাচ্ছি। দু'ঘরের পরে রোজেনবেয়ার্গের মৃতদেহ !

সহসা করিডরে কে আলো জ্বললে, চোখ ঝলসে উঠল।  
সিঁড়িতে যুবকদলের হাস্য, যুবতীদের চঞ্চল পদধ্বনি।  
একদিন চৈনিক ছাত্রছাত্রী হাস্যে গল্পে সিঁড়ি মুখর করে  
উঠছে। রাত দুটোর আগে তারা সাধারণত ফেরে না।

ছাত্রের দল যে যার ঘরে দরজা বন্ধ করে দিলে। আমিও  
আমার ঘরের দরজায় চাবি দিলুম। হোটেল আবার  
সুপ্ত শুরু।

ঝড় থেমেছে, নিঃশব্দ শুভ্র তুষার পতন হচ্ছে, যেন কে দোলন-  
চাঁপা ফুলের পাপড়ি ছিঁড়ে ছিঁড়ে চারিদিকে ছড়িয়ে দিচ্ছে।  
খোলা জানালার কাছে একটা সিগারেট ধরিয়ে বসলুম  
প্রভাতের আলোর আশায়।

ডাক্তার সরকার চুপ করলেন। আমি নিঃশব্দে চুরুট  
টানতে লাগলুম। বাইরে ঝড় বৃষ্টি থেমেছে, মৃদু জ্যোৎস্নায়  
আকাশ থম থম করছে।

ধীরে উঠে দাঁড়ালুম।

ডাক্তার সরকার বলে উঠলেন, মিষ্টার ঘোষ, আজ রাতেও  
আমার ঘুম হবে না দেখছি। এখন রাতে ভেরনল না খেলে  
আমার ঘুম হয় না।

কথাগুলি শুনে কোন অজানা ভয়ে চমকে উঠলুম। এ  
যেন ডাক্তার সরকারের কণ্ঠস্বর নয়।

দেখুন ত ওই খানে একটা শিশি আছে, ই্যা—ওই হলে 'শিশিটা। আমি আর উঠতে পারছি না। পায়ে কেমন ব্যথা হয়েছে। কয়েকটা ট্যাবলেট শিশি থেকে এই গেলাসে রাখুন।

ভীতস্বরে জিজ্ঞাসা করলুম, কটা ?

কটা ? ও এই পাঁচ ছ'টা। ওতে কিছু হবে না আমার। ওর কমে ঘুম হয় না। আপনি 'হয়ত ছ'টা খেলে—

মস্তচালিতের মত ছ'টা ট্যাবলেট গেলাসে ফেলে তার সঙ্গে একটু মদ মিশিয়ে ডাক্তার সরকারকে দিলুম। তিনি এক চুমুকে সবটা খেয়ে বল্লেন—একটু বসুন। তারপর চোখ বুজে সেভাবে হেলান দিয়ে শুয়ে পড়লেন।

আমি চুপ করে বসে রইলুম। পা যেন নাড়তে পারছি না। ঘরে স্তব্ধতা পাথরের মত ভারী; জানালার কাচ ঝকঝক করছে অবগুণ্ণিতা নারীর ভীতিব্যাকুল দৃষ্টির মত।

কতক্ষণ বসেছিলুম জানি না। কালের স্রোত যে বয়ে চলেছে, সে অনুভূতি হারিয়ে ফেলেছিলুম।

মনে হল, খটখট শব্দ আসছে, কাঠের মেজের ওপর ক্রাচের খটখট শব্দ। সে শব্দ সিঁড়ি দিয়ে উঠে আমার ঘরের পাশ দিয়ে বারান্দা পার হয়ে ঘরের সামনে এসে থামল, দরজার ওপর তিনটে টোকা, টক্ টক্ টক্ !

ভয়ে শিউরে উঠলুম। চোঁচিয়ে উঠলুম—ডাক্তার সরকার !

কোন সাড়া নেই।

প্রাণপণে চেষ্টালুম—ডাক্তার সরকার ! ডাক্তার !

নিঃসাড়, স্পন্দহীন দেহ ।

ডাক্তার সরকারের হাত ধরে ঝাঁকুনি দিলুম বরফের মত  
কনকনে হাত, নাড়ী খুঁজে পাওয়া গেল না ।

নাকের কাছে হাত রাখলুম, বুকের উপর কান দিয়ে  
শুনতে চেষ্টা করলুম, নিশ্চল হৃদপিণ্ড, দেহে রক্তচলাচল নেই ।

ডাক্তার সরকার মৃত ? হয়ত ভেরনলের মাত্রা আমি  
অধিক দিয়েছি । বিবর্ণ মুখ সাদা মুখোসের মত ।

আতঙ্কে বিহ্বল দৃষ্টিতে দরজার দিকে তাকালুম । দরজার  
ওধারে রিচার্ড রোজেনবেয়ার্গের প্রেতাঙ্গা, আর এধারে  
ডাক্তার সরকারের মৃতদেহ ।

কালো চশমার কাচের পেছনে চোখ দু'টো নড়ে উঠল ।  
শিউরে উঠলুম ।

ডাক্তার সরকার বলে উঠলেন, কি মিষ্টার ঘোষ ! আবার  
দাঁতের ব্যথা হচ্ছে নাকি ?

না ।

তবে ভয় পেয়েছেন । না আমি মরিনি, অত সহজে  
মৃত্যু হয় না ।

আমার মনে হচ্ছিল—

হুঁ, সে রাতে প্যারিসের হোটেলে কি রকম আতঙ্ক অনুভব  
করেছিলুম তার কিছু আভাস পেলেন বোধ হয় ।

আপনি চমৎকার অভিনেতা দেখছি ।

অভিনয় করতে পারি বলেই ত এতদিন বেঁচে আছি ।  
আচ্ছা আপনি শুতে যান, আজ রাত্রে আর রোজেনবেয়ার্গ  
এল না । আপনি নিশ্চিন্ত হয়ে শুতে যান । একটু খেয়ে  
যান, ভাল ঘুম হবে । শুুন, গল্পের শেষটুকু আপনাকে বলা  
হয় নি । পরদিন সকালে কিন্তু 'রোজেনবেয়ার্গের মৃতদেহ  
হোটেলের ঘরে পাওয়া গেল না' । দু'দিন পরে সেন-নদীর  
জলে মৃতদেহ পাওয়া গেল । লোকে বলে গুণ্ডারা রাতারাতি  
মৃতদেহ সরিয়ে নিয়ে গেছিল । কিন্তু আমার খিওরি হচ্ছে,  
মাদলেন ওকে মারেনি । আপনার মনে কি হয় ?

আমি কোন উত্তর না দিয়ে চলে এলুম । ঘরে এসে  
খোলা জানালার পাশে বসলুম । হৃদের জলে জ্যোৎস্নার  
ঝিকিঝিকি ।

ভাবতে লাগলুম, ডাক্তার সরকার কি উন্মাদ, না বানিয়ে  
গল্প বলতে ওস্তাদ !



## রাগুর ঠাকুরমা

পাড়ার সবই তাঁকে ডাকে রাগুর ঠাকুরমা বলে। সতীশ সরকারের সাত বছরের মেয়ে রাগু ও তার ঠাকুরমাকে পাড়ার সবাই চেনে, ভালবাসে। বস্তুতঃ রাগুর ঠাকুরমা কেবল রাগুর নন, তিনি পাড়ার ঠাকুরমা।

বয়স ষাট বছরের ওপর হবে, পাতলা ছিপছিপে শরীর বেঁটে শক্ত গড়ন, বৃদ্ধা হলেও দেহে কিশোরীর কস্মক্ষমতা ; চুলগুলি ছোট করে ছাঁটা, মুখে শান্ত দিব্যভাব, চোখে করুণাময় মমতা, দেহের রং কাচা-সোনার মত, হাত দু'খানি সর্বদা সংসারের মঙ্গল কর্ষে রত, তপঃক্লিষ্টা পুণ্যময়ী নারী।

রাগুর ঠাকুরমা ছোটবেলায় বিধবা হয়েছিলেন, আপন বলতে তাঁর বিশেষ কেউ ছিল না। সতীশ সরকারের তিনি কোন দূর সম্পর্কের পিসী। সতীশবাবুর প্রথম পুত্র ক্ষিতীশের জন্মের সময় তিনি পাড়াগাঁ থেকে সহরে আসেন, তারপর বরাবর এই পরিবারেই আছেন। সে আজ বাইশ বৎসর পূর্বের কথা। ক্ষিতীশ এখন এম-এ পরীক্ষা পাশ করে ল' পড়ছে ও চাকরির সন্ধান করছে এবং ক্ষিতীশের মাতা তার জন্মে উপযুক্ত বধূর সন্ধান করছেন।

ক্ষিতীশের পর সতীশবাবুর স্ত্রী সরমার আরও সাতটি পুত্র-কন্যার জন্ম হয়েছে।

এই সকল শিশুদের সকল প্রকার সেবা লালন পালনের ভার ঠাকুমার ওপর। গৃহিণী সরমা সারাক্ষণ সংসারের নানা কাজে ব্যস্ত থাকেন। শিশুদের স্নান করান, খাওয়ান, ঘুম পাড়ান, অস্থিত হলে রাত ডাঙা ইত্যাদি সকল কাজ ঠাকুমা করে এসেছেন। একটি শিশুকে তিনি অতি যত্নে পরিশ্রমে দু'তিন বছরে সুস্থ সবল স্বাবলম্বী করে তোলেন, অগ্নি আর একটি অসহায় ক্ষুদ্র শিশু তাঁর তত্ত্বাবধানে আসে। কিন্তু সরমার সকল পুত্রকন্যাদের মধ্যে তাঁর ষষ্ঠ কন্যা রাগু, কি করে তাঁকে বিশেষ ভাবে অধিকার করে বসল, তা ঠাকুমা নিজেও বুঝতে পারলেন না। রাগুর মধ্যে প্রাণ উচ্ছ্বসিত, গিরিবার্ণার মত চঞ্চলা সে, তার চোখ-ভরা দুষ্টামি, মুখভরা কোতুক, কলহাস্ত্রে কথা বলে, সব সময়ে ছুটে চলে, সিঁড়িতে দু'ধাপ ডিঙ্গিয়ে লাফ দিয়ে নামে, দাদা দিদিদের কাছে মার খায়, মার কাছে বকুনি খায়, স্কুলে গিয়ে মারামারি করে, হাত পা কেটে ফ্রক ছিঁড়ে আসে, সেজন্য ঠাকুমার মন তার জন্য সব সময়ে উবেগপূর্ণ। তার চঞ্চলতা, দুষ্টামি কলহাস্ত্র ঠাকুমার বড় ভাল লাগে। অন্য নাতি নাতনীরা এসে বলে, ঠাকুমা, তুমি রাগুকে শুধু ভালোবাস, আমাদের মোটেই ভালবাস না। রাগু তাঁর গলা জড়িয়ে উত্তর দেয়, ঠাকুমার খুসি আমায় ভালবাসবেন, তোমরা আমায়

মারো কেন? ঠাকুমা ভাবেন, হয়ত তিনি রাগুকে বেশী ভাল-  
বাসেন। অন্তরের দুর্বলতা তিনি জয় করে উঠতে পারেননা।

শুধু সরমারী ছেলেমেয়েরা নয়, পাড়ার ছেলেমেয়েরা, তাঁর  
নাতিনাতিদের স্থলের বন্ধুবান্ধবেরাও তাঁর আদরের দাবী  
করে, আবদারের অধিকার জানায়।

তার কারণ, রাগুর ঠাকুমা চিষ্ঠায় আধুনিক মহিলা। বর্তমান  
যুগের প্রগতির সঙ্গে তিনি তুল ফেলে চলতে চান। তাঁকে  
কেউ কখনও মালা অপতে দেখেনি; ভোরবেলা উঠে স্নান করে  
পূজা আর্হিক সেরে নেন; দিনের বেলা নানা কাজে সময়  
কোথায়? সকালে স্ব-পাক ভাতে ভাত আহার, রাতে ফল,  
মিষ্টি ও দুধ তবে বিকেলে এক কাপ চা চাই। পাড়ারগাঁ থেকে  
যখন এসেছিলেন অতি সামান্য লেখাপড়া জানতেন, এখন  
বান্ধলা বই ও পত্রিকা পড়ে বান্ধলা ভাষায় যতদূর শিক্ষা সম্ভব  
তা হয়েছে, প্রতিদিন দুপুরে বান্ধলা খবরের কাগজ পড়া চাই।  
পাড়ার মেয়েরা আসে তাঁর কাছে সেলাইর 'কাট', প্যাটার্ন শিখতে  
ছেলেরা আসে দেশের রাজনীতির তর্ক করতে, তারপর ছোট  
নাতিনাতিদের দলও সন্ধ্যায় ঘিরে বসে গল্প শুনতে। ঠাকুমা  
তাদের শুধু রূপকথা বলেন না, নানা বৈজ্ঞানিক গল্প করেন,  
এরোপ্নেনে কে সাগর পাড়ি দিল, মোটরকারে কে কত মাইল  
চলেছে, পাখীরা কেমন করে নীড় রচনা করে, মৌমাছির  
কেমন করে মধু সঞ্চয় করে, এই সব নানা কথা।

ঠাকুরমার ভয়ানক অসুখ। সতীশবাবুর টানাটানির সংসার

হলেও চিকিৎসার কোন ক্রটি হচ্ছে না। পাড়ার যুবক ডাক্তার দল চিকিৎসার ভার নিয়েছে, পাড়ার মেয়েরা এসে পাল্লা করে রাত জাগছে। রাগু ত স্কুল যাওয়া ছেড়ে দিয়েছে। মাঝে মাঝে বাবার বকুনিতে যেতে হয়।

যমে মানুষে টানাটানি চলেছে দশদিন ধরে। দু'দিন হল ঠাকুমা সংজ্ঞাহীনা।

রাত গভীর, সমস্ত বাড়ী নিঝুম, পাড়া নিদ্রিত। চতুর্থীর চাঁদ কখন নারিকেল গাছের আড়ালে অস্ত গেছে। অন্ধকার আকাশে অগণিত তারা মাতৃহারা শিশুদের চাউনির মত। পূর্বদিক থেকে শীতল মৃদু বাতাস বইছে, শেফালি বন হতে স্নিগ্ধ গন্ধোচ্ছ্বাস বারান্দায় ভেসে আসছে।

ঠাকুমা ধীরে বিছানা থেকে উঠলেন, অবাক হয়ে ঘরের চারদিকে চাইলেন। ইলেকট্রিক ল্যাম্পের উপর ঘন নীল সিল্কের ঘেরটোপ কোথা থেকে এল? স্বল্পালোকিত ঘরে চারিদিকে অদ্ভুত আবছায়া। একি, দিকুদের বাড়ীর বেগু এখানে মেজেতে ঘুমোচ্ছে কেন আর রাগু, রাগু এই দরজার চৌকাটের ওপর শুয়ে অকাতরে নিদ্রা যাচ্ছে! জানালাগুলো বন্ধ করলে কে?

দরজা পেরিয়ে ঠাকুমা করিডরে এসে দাঁড়ালেন। সিঁড়ির

বারান্দায় সব আলো জ্বলছে, চাকরগুলো মরেছে নাকি, আলো নেভাতেও ভুলে যায়।

ঠাকুমা দেখলেন সরমা আসছেন তার ঘরের দিকে, উদ্বিগ্ন ক্লান্ত মুখ।

ঠাকুমা ডাকলেন, বোমা বোমা। কোন উত্তর নেই। আবার চোঁচিয়ে ডাকলেন, অ বোমা! কোন সাড়া নেই। সরমা নিঃশব্দে তাঁর পাশ দিয়ে চলে গেলেন।

সহসা বাড়ীতে একটা ক্রন্দনের রোল উঠিল। অন্ধকারপুঞ্জ আঙুনের নৃত্যময় শিখার মত রাত্রির নিস্তব্ধতা কাঁপিয়ে ক্ষুর আর্তনাদ। সমস্ত বাড়ী জেগে উঠেছে।

ঠাকুমা চকিত্তপদে ঘরে প্রবেশ করলেন। লাল পেটেন্ট ষ্টোনের মেজের ওপর সাদা বিছানাতে এক বৃদ্ধা শুয়ে, তার চারিদিকে নানা বর্ণ ও আকৃতির ঔষধের শিশি, গেলাস, বই। বৃদ্ধা নিশ্চল নিঃসাড় শুয়ে আর তাঁর চারদিক ঘিরে স্বাই কাঁদছে। সরমা তাঁর বুকের ওপর মুখ গুঁজে পড়েছেন, রাগু ভীত বিকস্মিতভাবে দাঁড়িয়ে, তার দুই চোখ দিয়ে জল টস্ টস্ করে পড়ছে!

কে এ বৃদ্ধা? ইনি মৃত্যু মনে হচ্ছে।

ঠাকুমা চমকে উঠলেন, এ যে তাঁরই দেহ। তা হলে তিনি মরে গেছেন। এখন তিনি বিদেহী আত্মা, সে জন্ম কেউ তাঁকে দেখতে পাচ্ছে না। সে জন্মই সরমা তাঁর আস্থানে উত্তর দেন নি।

আচ্ছা দেখা যাক তিনি মরে গেলে কে কেমন ভাবে শোক করে, তাঁকে কে সব চেয়ে ভালবাসে।

ধীরে ভোর হয়ে এল। উষার পাণ্ডুর আলোয় সমস্ত পাড়া জেগে উঠেছে। ঠাকুরমার ঘরে ভয়ানক ভিড়।

ঠাকুরমা দেখতে লাগলেন, ধীরে কান্নার বেগ থামল। এবার মৃতদেহ নিয়ে যেতে হবে। সন্তীশবাবু এসে বল্লেন, পিসিমা মরলেন ত এই সোমবার দেখে মরলেন, কাল মরলে আর আফিস কামাই হত না।

মৃতদেহ গরদের কাপড়ে জড়ান হল। এক ঘণ্টার মধ্যে এত ফুল এল কোথা থেকে। কি সুন্দর স্তম্ভ প্রস্ফুটিত শুভ্র পদ্মগুলি, ফুলে ফুলে বিছানা ভরে গেল।

সবাই ঠাকুরমার পায়ের ধুলো নিয়ে চোখ মুছলেন। খাটিয়া যখন তুলছে, এমন সময় রাণু ঘরের কোণ থেকে ঝড়ের মত ছুটে এল, এতক্ষণ সে রোদন-অরুণ-নয়নে নির্ঝাক মন্ত্রাহতের মত দাঁড়িয়েছিল! খাটিয়ার ওপর শ্বেত পদ্মদলের মধ্যে সে আছড়ে পড়ল,—কোথায় তোমরা নিয়ে যাচ্ছ ঠাকুরমাকে, আমি দেব না যেতে। চোখে অশ্রু নেই, শুধু বালিকা-কণ্ঠে করুণ স্কন্ধ গর্জন।

সরমা তাকে টেনে তুলে নিলেন, সে চেঁচাচ্ছে, হাত পা ছুঁড়ছে—দেবো না, নিয়ে যেতে দেবো না। সে বুঝি একটা কাণ্ড বাধায়। আবার খাটিয়ার ওপর ছুটে গিয়ে পড়ে।

তার বাবা তাকে জোর করে ধরে রাখলেন। এবার সে কাঁদতে আরম্ভ করলে, শ্রান্ত হয়ে মেজেতে লুটিয়ে পড়ল। তার

কান্না দেখে তার ছোট ভাই-বোন সব পাড়ার ছেলেমেয়েরা সমস্বরে কেঁদে উঠল। শিশুদের কান্নায় প্রভাতের স্থানিস্থল আলোক করুণ সজল।

ফুলভরা খাটিয়া নিয়ে পাড়ার ছেলেরা বাড়ী থেকে রাস্তায় বার হল। যুবকসজ্জ মৃতদেহ সংকারের ভার নিয়েছে। সতীশ-বাবুকে কিছু দেখতে হবে মা, তাঁকে কিছু করতে দেবে না। সতীশবাবুকে তারা বলে, আপু'ন বাড়ী থাকুন, রাগুকে দেখুন। পাড়ার কয়েকজন বালিকা বলে তারাও যাবে মৃতদেহের সঙ্গে শ্মশানে, শুধু পায়ে দল বেঁধে যাবে, তাদের মা রা আপত্তি করতে পারলেন না। কয়েকজন প্রৌঢ়াও দলে জুটলেন, সকালে গঙ্গাস্নান করে আসা যাবে। বালিকা-বৃদ্ধা নিয়ে দল ধীরে ধীরে চলল।

কে একজন বলে উঠল, ওরে ডাক্তারের সার্টিফিকেট? দলের একজন নবীন ডাক্তার বলে, আমি লিখে দেব, কিন্তু ঠাকুমার নাম কি?

ঠাকুমার নাম কেউ জানে না। তিনি রাগুর ঠাকুমা, এই সবাই জানে।

একটি যুবক ছুটিল সরমার কাছে, ঠাকুমার নাম জানতে!

প্রভাতের কোলাহলময় সহরের পথে সবাই ধীরে চলছে।

ঠাকুমাও চলেছেন তাঁর মৃতদেহের শোভাযাত্রার সঙ্গে।

নগরের পথ-দৃশ্য মিলিয়ে গেল।

শরৎকালের প্রভাত। নানা ফুলে ভরা অপক্লপ উদ্যান। পূব-আকাশে খণ্ড মেঘগুলি রাঙিয়ে আলোর ধারা গলিত সোনার মত চারিদিকে ঝরে পড়ছে। চারিদিক শেফালি, কবরী, টগর, স্থলপদ্ম, অপরাজিতা, বিচিত্র বর্ণের ফুলে ছাওয়া। ডূরে শাড়ী পরে একদল ছোট মেয়ে ফুল তুলছে, খেলা করছে, কেউ আঁচলে শেফালি ফুল ভরছে, কেউ মাথায় রঙ্গনফুল পরছে, কেউ হাতে স্থলপদ্ম নিয়ে হাসছে।

তাদের মধ্যে একটি মেয়ে খয়ের রংএর শাড়ী পরে, একটু গম্ভীর প্রকৃতির। সে ফুল তুলছে না, এক বকুলগাছের তলায় পা ছড়িয়ে বসে শরতের সোনার আকাশের, শোভা দেখছে। মেয়েরা বলল, চল ভাই আমরা নদীর ধারে খেলতে যাই। খয়ের রংএর শাড়ী পরা মেয়েটিও উঠল নদীর ধারে যাবার জন্যে। এমন সময় চাপা রংএর ফুক পরে একটি মেয়ে এল, ছেঁড়া ময়লা ফুক, ছুঁটামি-ভরা চোখ, এক হরিণ শিশুর গলায় দড়ি ধরে টানতে টানতে সে এল।

খয়ের রংএর শাড়ী-পরী মেয়েটির হাত সে চেপে ধরলে, জোর করে টেনে বললে,—তুমি ওদের সঙ্গে যেতে পারবে না, তুমি আমার সঙ্গে খেলা করো, তুমি আমার হরিণকে ঘাস খাওয়াও।

আবদার মন্দ নয়।

ঠাকুমা দেখলেন সে চাপা রংএর ফুক পরা মেয়েটি হচ্ছে রাগু, তার আবদার অগ্রাহ করে তিনি অন্য মেয়েদের সঙ্গে নদীর ধারে



নৌকা চড়তে যেতে পারলেন না। রাণুর হরিণকে নিয়ে তিনি ঘাস খাওয়াতে লাগলেন।

দৃশ্য বদলে গেল।

শ্রাবণের নদী কানায় কানায় ভরা! আকাশে মেঘের গুরু গুরু ধ্বনি। বর্ষার অপরাহ্ন কখনও ক্ষণিক সূর্যালোকে দীপ্ত কখনও সঘন বারিপাতে সজল। গ্রাম্য পথ এক অতিবৃদ্ধ বটগাছের পাশে নদীর ধারে শেষ হয়েছে। নদীতে কয়েকটি নৌকা তুলছে টলছে, মাঝিরা হাঁকাহাঁকি করছে,—আরও দেবী হলে দহেতে রাত হয়ে যাবে, বড় নদীতে পড়তে কাল দুপুর, তাহলে রুণপুরে পরশু পৌঁছাবে।

বটগাছের তলায় দুই পালকী এসে থামল, এক পালকীতে বর, আর এক পালকীতে নব-বিবাহিতা বালিকাবধু, শ্রাবণ শ্রোতস্বতীর মত তার দুই নয়নে অশ্রু চলছিল করছে, অজানা স্বপ্ন আশা আকাঙ্ক্ষায় হৃদয় তুলছে।

পালকী থেকে নেমে এবার নৌকায় উঠতে হবে। পল্লীনারী-গণ চারিদিকে নব-বধূকে ঘিরে দাঁড়াল, অবগুষ্ঠনের প্রান্তে অমঙ্গল অশ্রুজল গোপন করল। শুভ-শঙ্খ ধ্বনিত হল, শ্রাবণ আকাশের তলেশূন্য নদী তীরে সে শঙ্খধ্বনি বড় করুণ শোনাল!

বটগাছের নীচে একটি ছোট মেয়ে বসেছিল, চাপা হঃএর ফ্রক পরা, এতক্ষণ সে এক কাঠবেড়ালীকে পেয়ারা খাওয়াচ্ছিল।

ঝড়ের মত সে ছুটে এল ; ছেলেমেয়েদের ভিড় ঠেলে সে নববধুর লাল চেলির আঁচল টেনে ধরলে । দীপ্তকণ্ঠে বললে, কোথায় যাচ্ছ তুমি, তুমি যেতে পারবে না ।

সত্ত্ব বিবাহিতার বুক দুৰু দুৰু করছে, সে স্নান হেসে বললে, ইগারে রাগু, তুই কি আমার শ্বশুর-বাড়ীও যেতে দিবি নি ?

কৌতুকভরা চোখ নাচিয়ে রাগু বললে, দেবনা ত, বা, পরশু, আমার পুতুলের বে, সব যোগাড় করবে কে ? বর-বউকে বরণ করে কে তুলবে শুন ! আর সেই বাঘের গল্পটা তোমার শেষ হয় নি । চলো আমার সঙ্গে ।

রাগু ঠাকুরমার বাঙাশাখা পুরান হাত টেনে গায়ের পথে চলে গেল ; আলতাপরা পায়ে পথের কাঁদা মাড়িয়ে নববধু বাঁশের বনের আড়ালে অদৃশ্য হল ; তার আর শ্বশুর-বাড়ী যাওয়া হল না ।

শ্রাবণ অপরাহ্ন, অন্ধকার করে বৃষ্টি এল, চারিদিকে হৈ চৈ পড়ে গেল ; নৌকাগুলো ভরানদীর চঞ্চল জলে নৃত্য করতে লাগল ।

নদীতীরের ছবি মিলিয়ে গেল ।

সমতল বিজন বক্ষহীন প্রান্তর, যোজনের পর যোজন বিস্তৃত, অসীম দিগন্তে গিয়ে মিশেছে, দক্ষ তৃণ, রক্তিম পৃথিবী, উপরে জ্যেষ্ঠের মধ্যাকাশে সূর্য্য বিরটি অগ্নিপিশুর মত । শূন্য প্রান্তরমধ্যে লালমাটির পথ এঁকে বেঁকে গেছে দীপ্তিচ্ছ ভূজঙ্গের শ্রায় ।

অনল-ভরা জনহীন উদাস পথ দিয়ে একটি নারী চলেছে, সাদা কাপড় পরা, দেহে কোন অলঙ্কার নেই, অন্তরে অনির্বাণ-জ্বালা, সম্মুখে অনন্ত বিস্তৃত পথ, লক্ষ্যহীন আশাহীন যাত্রা ; কণ্ঠে দারুণ পিপাসা, কোথাও একটু জল নেই, সূর্যালোকিত প্রান্তর মরীচিকার মত মাঝে মাঝে ঝিকমিক করে, আলেয়ার মত জলে ওঠে । নিস্তরু আকাশ রৌদ্রদহনে ঝিমঝিম করছে ।

সহসা কে তাকে ডাকল । চমকে নারী চাইল । তার সামনে সুন্দর দীঘি, দীঘির পারে আমবন, জামবন, কত ফুল ফলের গাছ, শীতল জল, স্নিগ্ধ ছায়া, পরমা শান্তি । এ দৃশ্য তার চোখেই পড়ে নি, সে শূন্য নয়নে এ স্থান পার হয়ে চলে যাচ্ছিল ।

একটি ছোট মেয়ে তাকে ডাকছে । চাপা রংএর ফ্রকপরা ছোট মেয়ে কঁকড়া চুল ছুলিয়ে সরু সোনার চুড়িগুলি বাজিয়ে তাকে ডাকছে,—ডাবের শাস খাবে, ভারি মিষ্টি ?

নারীটি স্নান হেসে মেয়েটির দিকে এগিয়ে গেল । রাণু তাকে হাত ধরে টেনে নিয়ে গেল তালগাছের তলায়, সাতটা তালগাছ মিলে সুন্দর কুঞ্জ রচিত হয়েছে ।

ও, তোমার হাত কি গরম, মাথা যে রোদে পুড়ে গেছে, তুমি এখানে স্থির হয়ে বাসো, আমি তোমাকে মিষ্টি তালশাস দিচ্ছি ।

তালশাস খেতে খেতে ঠাকুরমার মনে হল, একি স্বপ্ন ! জীবনের এ মাধুর্য কোথায় লুকান ছিল ।

রাণু বলে, আচ্ছা টিকটিকিরা কোথায় থাকে জানো ?

আমাদের ঘরের ছবির পেছনে তাদের বাসা, আর দেওয়ালে পোকা দেখলেই বাসা থেকে ছুটে বেরিয়ে আসে খেতে।

রাগু তাকে নিয়ে গেল কত অসম্ভবের রাজ্যে, কত রূপকথার দেশে। সে দেশে কত বিস্ময়, কত কৌতুক, কত আনন্দ!

সেদিন রাগুর স্কুলে হাফ হালুডে হয়েছিল। রাগু শীগগির স্কুল থেকে এসে বইয়ের বাগটা টেবিলের উপর ছুঁড়ে ফেলে ঠাকুরমার ঘরের দিকে ছুটেছিল। রাগুর মা তাকে বল্লেন, রাগু এখন চুপ ক'রে শো দেখি, ঠাকুরমার ঘরে যেয়ো না, তিনি এখন ঘুমোচ্ছেন।

বা, ঠাকুরমা বুঝি ছপুয়ে কখনও ঘুমোন। এখন তুঁটার বই পড়া হচ্ছে।

না আজ তাঁর শরীর তেমন ভাল নেই, তিনি এখন বিশ্রাম করছেন।

আচ্ছা, বলে রাগু মায়ের পাশে বিছানাতে একটু শুল, তারপর উঠে চারিদিক ঘুরঘুর করতে লাগল। কাকাতুয়ার সঙ্গে খানিকটা খুনসুটি করলে, মিনি বেড়ানটাকে জ্বালাতন করলে, ড্রয়িংরুমের লাল মাছগুলিকে ময়দার গুলি খাওয়ালে। সময় যেন কাটতে চায় না।

আধঘণ্টা পর সে ঠাকুরমার ঘরে হাজির হল। ঘর নিঝুম, সবাই নিদ্রিত। খাঁচায় কেনারি-পাখীগুলো ঘুমুচ্ছে, টিকটিকিটা

এক বড় গঙ্গা ফড়িং খেয়ে নাক ডাকাচ্ছে, ঠাকুরমা বিছানাতে ঘুমুচ্ছেন । •

রাগু ঠাকুরমার পাশে মেজেতে বসল, খুটখাট, শব্দ করলে । তার আর ধৈর্য্য থাকে না । অবশেষে অধীর হয়ে ডাকল—ঠাকুরমা, কত ঘুমোবে ?

ঠাকুরমা জেগে উঠলেন । তাঁর চোখে তখনও কোন্ বন-হ্রদের মায়া জড়ান । রাগুর সঙ্গে তিনি শাল বনের ভেতর দিয়ে পাহাড় পার হয়ে নীল হ্রদের তীরে এসেছেন ।

ঠাকুরমা জেগে চমকে চাইলেন । রাগু ! তাঁর সামনে রাগু ! যেন কোন অচেনা মেয়ে বসে । স্বপ্নের কথা তাঁর মনে হল । মৃদু মধুর হাসি খেলে গেল সমস্ত মুখে ।

# নিমাই

কোন স্থানে দীর্ঘকাল ধরিয়া টিকিয়া থাকা নিমাইএর ভাগে; সয় না। জন্ম হইতেই তাহার ভবঘুরে জীবন আরম্ভ হইয়াছে। আতুড়ঘরেই তিন দিনের ছেলে রাখিয়া তাহার মা মারা গেলেন, মাতৃকোল হতে সে ধাত্রী-কোলে স্থানান্তরিত হইল। একমাস যাইতে না যাইতে তাহার ঝি বুড়ী মার অস্থখের নাম করিয়া তাহাকে ফেলিয়া দেশে চলিয়া গেল। মাতা বসুন্ধরা নিমাইকে আপন বিরাট কোলে তুলিয়া লইলেন।

যে রক্ষস্বভাবা কলহপ্রসিদ্ধা বিধবা ভগিনী পত্নীহীন ভ্রাতার সংসারের ভার আপন স্কন্ধে তুলিয়া লইতে ছুটিয়া আসিলেন, তিনি সংসারের বৃহৎ বোঝার সহিত এই ছোট শিশুটির ভার লইলেন বটে, কিন্তু তাহার দেখিবার সময় কোথায়? সকালে উঠিয়া পূজা-আহ্নিক করিতে কয়েক ঘণ্টা কাটে; তার পর ঝির সহিত বকুনি, নূতন রাধুনির সহিত ঝগড়া, আর গোবরজল দিয়া বাড়ীর সব ঘর শুদ্ধ করিয়া তুলিতে, সকালটা কাটিয়া যায়। দুপুরে একবার সমস্ত পাড়া ঘুরিয়া ইন্স্পেক্ট না করিয়া আসিলে নয়। বিশেষতঃ, দিন-দিন চারিদিকে যেরূপ অনাচার বাড়িয়া উঠিতেছে। সন্ধ্যায় মালা করিতে, আর কত কষ্ট সহিয়া কত টানাটানি করিয়া যে এই অকর্মণ্য ঝি-চাকর লইয়া সংসার চালাইতে হইতেছে তাহার গল্প বলিতেই কাটিয়া যায়।

কিন্তু সব অযত্ন সহিয়াও মাতা পৃথিবীর জল-হাওয়ায় নিমাই ঠিক বাড়িয়া উঠিতে লাগিল। যাকে বাঁচিতেই হইবে, তাহার দুখে জল ঢালিয়া দুধের দাম ব্রাহ্মণ-দক্ষিণায় দিলেও সে মরিবে না। শিশু নিমাই এ উপেক্ষা বড় গ্রাহ্য করিত না। মলিন দূষিত কাথার উপর নিশ্চিন্ত মনে ঘুমাইত। মাঝে-মাঝে ক্ষুধা পাইলে কাঁদিয়া উঠিত বটে, কিন্তু একটু ঘোলা ঠাণ্ডা দুধ পাইলেই শান্ত হইত। যখন তাহার অন্ধকার ঘরের ছোট জানালা দিয়া রোদ আসিয়া পড়িত, পাশের গাছগুলি বাতাসে ঢুলিয়া মরুমরু শব্দ করিত, কয়েকটি ঘুঘু অবিশ্রান্ত ডাকিয়া সমস্ত আকাশ মুখর করিয়া তুলিত, নিমাই সকল অনাদর ভুলিয়া প্রাণ খুলিয়া হাসিয়া উঠিত। সেই শূন্য ঘরে মাতৃহীন শিশুর বক্ষ মাতা বসুন্ধরা আনন্দ-স্বধার ভরিয়া দিতেন। আর রাত্রি-বেলা হঠাৎ জাগিয়া পিতা যখন ঘুমন্ত শিশুর মুখে চুম্বন করিতেন, সে কি সুখের স্বপ্ন দেখিতে দেখিতে হাসিয়া উঠিত।

এ পিতার আদরও বেশী দিন সহিল না। তখন সে প্রায় দুই বছরের। পরম প্রতাপশালিনী পিসিমায়ের তীক্ষ্ণ কণ্ঠ একেবারে অগ্রাহ্য করিয়া, মাতালের মত টালিয়া সে এঘর ও-ঘর ঘুরিয়া বেড়ায়,—ছোট বাড়ীতে এই শিশু আবিষ্কারক চারিদিক পর্যটন করিয়া যেন কোন্ নূতন দেশের সন্ধান লইবে। মাঝে মাঝে সহসা পিতার পথরোধ করিয়া, হাসিয়া অস্ফুট স্বরে ডাকিয়া উঠিত,—বাবা। কিন্তু যখন জনহীন ঘরে জানালার গরাদে ধরিয়া দাঁড়াইয়া, আকাশ মাঠ-আলোর দিকে চাহিয়া আপন মনে

ডাকিত, বা,—রা, আর হাসিত, হাসিত আর ডাকিত,—সে  
 আহ্বান কাহার জন্ম, ঠিক বোঝা যাইত না। , হয়ত সুন্দরী  
 প্রকৃতি মাতার শোভায় পুলকিত হইয়া আনন্দধ্বনি করিত।  
 দুই বৎসর বয়সের সময় তাহার বাবা তাহার ভার পৃথিবী-মাতার  
 হাতে দিয়া ইহলোক হইতে চলিয়া গেলেন। পিসিমা সংসারের  
 পাপের মোহ বন্ধনে বাঁধা থাকিতে কিছুতেই চাহিলেন না,—  
 পুণ্যক্ষেত্র বারাণসীতে তীর্থ করিতে এই মায়ার জাল লইয়া  
 কি করিয়া যাইবেন? নিমাইকে তাহার এক বোনের বাড়ী  
 জোর করিয়া ফেলিয়া দিয়া, কাশীর নাম করিয়া বাহির  
 হইয়া কলিকাতায় তাঁহার মেজ চেলের বাড়ীতে আসিয়া  
 উঠিলেন।

ধীরে ধীরে নিমাই জেঠাই, খুড়ি, পিসি, মাসি, দিদি, নানা-  
 জনের নানাঘরে ঘুরিয়া ঘুরিয়া অনাদর সহিয়া তবু ঠিক বড়  
 হইয়া উঠিতে লাগিল। বকুনি সে মোটেই গ্রাহ্য করিত না।  
 পড়িয়া গেলেও লজ্জায় কাঁদিতে পারিত না। আর ক্ষুধা পাইলে  
 খাবার, কি রান্নাঘরে গিয়া যাহা পাইত, মুখে পুরিত।

যতদিন নিমাই ছোট ছিল, সে খাইত কম; কাপড় জামার  
 কোনও দরকার ছিল না। আপন মনে হাসিত, কাঁদিত, কোনো  
 হাঙ্গামা ছিল না। কিন্তু বয়স বৃদ্ধির সহিত তাহার অভাব-বৃদ্ধির  
 বোধ বাড়িতে লাগিল। খাইতে না দিলে সে কাঁড়িয়া খাইত;  
 কিছু পরিতে না দিলে, সে তাহার কোনো পিসতুতো বা  
 খুড়ততো ভাইবোনের কাপড় জামা অন্নান বদনে পরিয়া, পাড়ার



ছেলেদের সহিত খেলিতে পলাইত ; তাহার পরে কাপড় জামায় ধুলা লাগাইয়া, ছিড়িয়া, হারাইয়া আসিত। বিকলে সে গ্রাহ করিত না। খুব মারিলে গুম হইয়া শুইয়া ধুলায় লুটোপুটা খাইত। দিন-দিন তাহার দুষ্টামি বাড়িয়া যাইতেছিল।

তাহার বয়স প্রায় সাত হইবে। তখন সে তাহার ছোট কাকীর ঘাড়ে গিয়া পড়িয়াছিল। ছোটকাকী এই দুঃস্থ ছেলেটিকে শীঘ্রই শান্ত করিয়া, কি করিয়া ছেলে শাসন করিতে হয়, তাহার দৃষ্টান্ত সকলকে দেখাইবার জন্ত, কিছুদিনের জন্ত নিমাইএর ভার লইয়াছিলেন। নিমাই পূর্বা দিন ইাড়ি হতে তেঁতুল, আচার চুরি করিয়া, তাহার মেয়ের একখানি কাপড় পরিয়া কোথায় গিয়াছিল, কাপড়খানি হারাইয়া আসিয়াছে। ছোটকাকী বলেন, ওর সব বজ্জাতি, সে কাপড় ও কাকে দিয়ে এসেছে। বাস্তবিক নিমাই কাপড়টি এক চাষার মেয়েকে দিয়া আসিয়াছিল ; কিন্তু কিছুতেই স্বীকার করিতে চাহিল না। ছোটকাকী তাহাকে সারাদিন কিছু খাইতে না দিয়া, এক ঘরে পুরিয়া, দরজায় শিকল দিয়া রাখিয়াছিলেন। নিমাই কিছুক্ষণ দরজায় লাথি মারিল, কিছুক্ষণ জানালার গরাদ ধরিয়া চেষ্টাইল, তার পর শান্ত হইয়া মেঝেতে শুইয়া ঘুমাইয়া পড়িল।

বিকলে নিমাইএর এক গ্রাম-সম্পর্কের মাসি তাহাকে দেখিতে আসিয়াছিলেন। তিনি ব্যাপারটা জানিতেন না। বিকলে উঠিয়া ক্ষুধিত হইয়া নিমাই খুব জোরে দরজায় লাথি মারিতে ছিল, তিনি শব্দ শুনিয়া খুলিয়া দেন। দরজা খুলিতেই সে

উন্মত্তের মত ছুটিয়া বাহির হইয়া, তাঁহার আঁচল ধরিয়া টানিয়া ছিড়িয়া এক কাণ্ড বাধাইয়া দিল। ছোটকাকী কাছে ছুটিয়া আসিতেই, তাঁহার চুল ধরিয়া টানিয়া, অভদ্র ভাবে গালাগালি দিল। ছোটকাকী ক্রোধে আত্মহার হইয়া নিমাইএর গালে সজোরে এক চড় মারিলেন। সারাদিন না খাইয়া সে খিন্ন হইয়াছিল; চড় খাইয়া সে অজ্ঞান হইয়া পড়িল। ছোটকাকী তখনও ক্রোধে গর্জন করিতেছিলেন; এক লাথি মারিয়া অচৈতন্য নগ্ন, বুকু বালকটিকে নন্দমার দিকে ঠেলিয়া দিয়া সংসারের কাজে চলিয়া গেলেন।

সেই সন্ধ্যায় গ্রামের মাসী নিমাইকে বৃকে তুলিয়া আপন ঘরে লইয়া গেলেন। বাড়ীর কেহ কিছু বলিল না; আপদ বিদায় হইল। বিধবা মাসির এক ছোট মেয়ে ছিল বটে কিন্তু কোন পুত্রসন্তান না থাকায় তাঁহার মনে বড় খেদ ছিল, এতদিনে তাহা দূর হইল। মাসির বাড়ী গিয়া নিমাই কিছুদিনের জন্য শান্ত হইল। পাড়ার ছেলেদের দলে তাহাকে বড় দেখা যাইত না, মাসির পিছনে-পিছনে বডিগার্ডের মত সে ঘুরিত, ঘরকন্নার নানা কাজে সে সাহায্য করিত, আর মাসির ছোট মেয়েটির বাহকপদে নিযুক্ত হইল। তাহাকে আদর করা, আবোল-তাবোল বকিয়া নানা সুর করিয়া ঘুম পাড়ানো, কত কাজ সে মাসির হাত হইতে কাড়িয়া লইয়া নিজে করিতে আরম্ভ করিল।

মাসির ঘরও তাহার বেশীদিন সহ হইল না। দত্তদের বাড়ীতে কালীপূজা উপলক্ষে গ্রামে এক যাত্রার দল আসিয়া উপস্থিত

হইয়াছিল। নিমাইএর কাণে কথাটা পৌছাইতেই, সে লুকাইয়া গিয়া যাত্রার দলের ছেলেদের সহিত ভাব করিয়া আসিল। রাত্রে আসিয়া বায়না ধরিল যাত্রা শুনিতে যাব। কিন্তু ছোট বোনটির যে অসুখ, যাত্রা শোনা স্থগিত রহিল। দুইদিন পরে ছোট বোনটি সারিয়া উঠিলে সে তাহাকে কোলে করিয়া মাসিকে লইয়া যাত্রা শুনিতে গেল। যাত্রা দেখিয়া-শুনিয়া সে মুগ্ধ হইয়া উঠিল। ছোট ছেলেরা কেমন সখি সাজিয়া গান করে, জুড়ীবা কত রকম মুখভঙ্গী করে। আর যখন অর্জুন তীর ছুড়িল, ভীষ্মের বুক হইতে রক্ত ঝলকে-ঝলকে উঠিতে লাগিল, সে লাফাইয়া চেঁচাইয়া বলিল, ওরে মেরে ফেললে। মাসি মুখে হাত দিয়া থামাইয়া বলিলেন, চুপ্ চুপ্, ও রক্ত নয়, লাল জল। আশ্বস্ত হইয়া সে ছোট বোনটিকে বুকে চাপিয়া ধরিল।

ঘরে আসিয়া নিমাই বলিল, মাসি, আমি যাত্রা করবো।

কোরবে বাবা, বড় হও।

না মাসী, ওই যাত্রার দলে আমার চেয়েও ছোট ছেলে আছে, আমি ওদের সঙ্গে চলে যাবো।

ছিঃ বাবা, আমায় ছেড়ে চলে যাবে, খুকি কাঁদবে, দেখবে কে ?

তাও তো বটে। সমস্ত রাত নিমাই ভাবিল, সে চলিয়া গেলে খুকির বাস্তবিক কোনো কষ্ট হইবে কি না। কেন, সে ত হাঁটতে পারে, কথা কহিতে শিখেছে। আর মাসিই ত তাকে স্নান করায়, খাওয়ায়, ঘুম পাড়ায়, সে আর কি করে !

সমস্ত দিন সে খুকির কাছে কাটাইল। সন্ধ্যার সময়ে চুপে-চুপে বাহির হইয়া, যাত্রার দলের নৌকায় গিয়া, লুকাইয়া তাহাদের গ্রাম ছাড়িয়া বাহির হইয়া গেল।

যাত্রার দল প্রথম-প্রথম তাহার খুব ভাল লাগিত। নূতন-নূতন ছেলেদের সঙ্গে ভাব করিয়া, তাহাদের সহিত খেলা, গল্প করিয়া বেশ মজায় দিন কাটিতে লাগিল। কিন্তু একটু পুরাতন হইয়া গেলে অধিকারী যখন জুংসনা করিতে আরম্ভ করিল, যাত্রার সময় যুমাইয়া পড়িলে মারিয়া জাগাইয়া তুলিত, গাইতে ভুল হইলে বা ঘুমের ঘোরে কথা তুলিয়া গেলে অনশনের বা অর্দ্ধাশনের ব্যবস্থা হইত, তখন যাত্রা-জীবনের উপর তাহার কোনো আকর্ষণ রহিল না। মাসিমায়ের স্নেহ-আদর মনে পড়িত, খুকির হাসি-চাউনি, ছোট ছোট নরম হাত দুটির কোমল স্পর্শের কথা ভাবিয়া তাহার চোখ জলে ভিজিয়া যাইত।

অনেক জায়গায় ঘুরিয়া যাত্রার দল এক বড় জমিদারের বাড়ী আসিয়া পৌঁছিয়াছে। সে রাত্রির পালায় নিমাই একটা গান বড় করুণ স্বরে গাহিতেছিল। গান গাহিতে-গাহিতে খুকির কথা বার বার মনে পড়াতে, তাহার গলা ভিজিয়া আসিতেছিল, স্বর তাহার বৃকের তারগুলি ছিড়িয়া ছিড়িয়া বাহির হইতেছিল। শ্রোতারা সব অভিভূত হইয়া উঠিল। প্রোট পিতার গা ঘেসিয়া বসিয়া জমিদারের ছোট মেয়ে আবেগদীপ্ত নিমাইএর মুখের দিকে চাহিয়া, চোখের জল রাখিতে পারিতেছিল না। সে গানের সব কথা বুঝিতে পারিতেছিল না বটে,

কিন্তু কিসের ব্যথায় তাহার ছোট মন উথলিয়া উঠিতেছিল।  
 পরদিন দুপুরে :জমিদার বাড়ীর পুকুরের ঘাটে নিমাই গুণ্গুণ  
 করিয়া গান গাহিতেছিল, সে মেয়েটি আসিয়া বিস্ময়-করুণ  
 নয়নে তাহার দিকে তাকাইয়া রহিল। নিমাই স্নিগ্ধ চোখে  
 চাইতেই ছোট নোলোক দুলাইয়া কাছে আসিয়া সে  
 চুপে চুপে বলিল, তুমি বেশ গান গাইতে পার ত  
 ভাই।

তোমার ভালো লেগেছে ?

ভারি ভালো লেগেছে।

এখন গাইব ? কোন্ গানটা ?

না ভাই, এখন গেলো না, তোমার সে গানটা শুনলে আমার  
 কান্না আসবে।

তুমি এই জমিদারের মেয়ে না ?

হাঁ, তোমার নাম কি ভাই ?

নিমাই।

তোমার ?

লক্ষ্মী। আচ্ছা, আমার ভারি গান শিখতে ইচ্ছে করে।

শেখ না কেন ?

কে শেখাবে ?

আমি।

তুমি শেখাবে ?—তুমি ত যাত্রার দলের সঙ্গে চলে  
 যাবে।

না, যাবো না। আমি আর এই যাত্রার দলের সঙ্গে থাকব না। ওরা মারে, খেতে দেয় না।

তবে কোথায় থাকবে ?

তা জানি না—ওদের কাছ থেকে পালিয়ে যাবো !

আমাদের এখানে থাকবে ?

তোমরা জমিদার, তোমরা রাখবে কেন ?

আমি বাবাকে বলব,—আমার গান শেখাবে।

হঁ !

আচ্ছা ভাই, আমি বাবাকে ঠিক বলব।

ছোট মল বাজাইয়া লক্ষ্মী ধীরে চলিয়া গেল। নিমাই যাত্রার দলে থাকিবার ঘরগুলির দিকে বৃদ্ধাঙ্গুলি দেখাইয়া, কতকগুলি টেল কুড়াইয়া পুকুরের জলে ছুড়িতে আরম্ভ করিয়া দিল।

আধুরে মেয়ের আকার বৃদ্ধ পিতা ঠেলিতে পারিলেন না। জমিদার-বাড়ীর নানা পোষ্য অপবর্গের মধ্যে নিমাইও অন্তর্ভুক্ত হইয়া গেল। জমিদার ও তাহার মোসাহেবদের তামাক সাজিয়া, ফরমাস্ খাটিয়া, লক্ষ্মীকে গান শুনাইয়া, গল্প করিয়া, তাহার দিন বেশ কাটিতে লাগিল। মাঝে মাঝে বাড়ীর মেয়েরাও তাহাকে ডাকিয়া গান শুনিতেন, অভিনয় দেখিতেন, অন্তরমহলে তাহার খাতির বাড়িয়া গেল। দ্বিপ্রহরে সম্মুখের আশ্র-বাগানে গিয়া নিমাই ও লক্ষ্মী নানা প্রকার কুপথ্য তৈরী করিয়া খায়, ও নানা প্রকার কুরুচিকর সঙ্গীত গায়। নিমাই বাড়ীর নিষ্কর্মা ও

তোষামোদকারীদের অঙ্গভঙ্গী ও চাটুবাদে ব্যঙ্গ করে, আর লক্ষ্মী হাসিয়া হাসিয়া লুটাইয়া পড়ে। ব্যাপার গুরুতর হইতেছে দেখিয়া জমিদারবাবু নিমাইকে নিকটের এক স্কুলে ভর্তি করিয়া দিলেন। স্কুল বস্তুটি কিরূপ জানিবার জন্ত নিমাই প্রথম প্রথম স্কুলে যাইত। কিছুদিন গিয়া যখন দেখিল, স্থানটা বড় অস্ববিধার নয়, কয়েক ঘণ্টা ঘানির গরুর মত বাধা থাকা, পড়া না করিয়া গেলে মার খাওয়া, এ সব তাহার বেশীদিন সহ হইল না। স্কুলঘরের অপেক্ষা স্কুলে যাইবার পথের দুই ধারে বাগান ও পুকুর লোভনীয়, মোহনীয়। লক্ষ্মী ছিল নিমাই-এর ব্যাঙ্ক। সে পিতার নিকট প্রায়ই টাকা পাইত। নিমাই সেই টাকা লইয়া কতকগুলি স্কুলের ছেলেকে বশ করিয়া আপনি দলপতি হইয়া স্কুল পালাইয়া বাগানের পর বাগান ঘুরিয়া বেড়াইতে লাগিল। মালিরা যথামত ঘুষ পাইয়া কাহাকেও কিছু জানাইত না।

এইরূপে কোনদিন স্কুল পালাইয়া পরের বাগান ভাঙ্গিয়া, পরের পুকুরে স্নান করিয়া, ছেলের দল লইয়া হলা করিয়া, পাড়া মাতাইয়া, কোনদিন স্কুলে গিয়া পড়া না পারিয়া মাষ্টারের সহিত ঝগড়া করিয়া হেড-মাষ্টারের মার খাইয়া, কোন ছুটির দিন লক্ষ্মীর সহিত তাহাদের বাগানে লুকাইয়া গল্প করিয়া, জমিদার বাড়ীর সকলের আদর-অনাদর সহিয়া, সকলের ফরমাস্ আবদার পালন করিয়া, পরম সুখে নিমাই-এর কয়েক বছর কাটিয়া গেল। ধীরে-ধীরে লক্ষ্মী বড় হইয়া উঠিল; বালক-বালিকার সরল খেলা ভাঙ্গিয়া গেল, আর নিমাইএর কাছে সে তেমনি সহজ হাসিয়া আসে না, তেমনি আদরে, আব্দারে,

কথা কয় না, তাহার বড় লজ্জা করে। তাহার পর একদিন জমিদার বাড়ীতে বিবাহের নহবৎ বসিল, নিমাই-এর কিশোর-প্রাণ উদাস করিয়া সানাই বাজিতে লাগিল, কোথা হইতে এক অজানা-লোক বরবেশে আসিয়া লক্ষ্মীকে বিবাহ করিয়া লইয়া চলিয়া গেল।

বিবাহের পরদিন নিমাইকে আর কেহ সেই গ্রামে দেখিতে পায় নাই। রাত দুইটার সময় লগ্ন পড়িলে সে লক্ষ্মীর পিড়ির একধার ধরিয়া তাহাকে ছাঁদনা-তলায় লইয়া আসিয়া সাতপাক ঘুরাইল; শুভদৃষ্টি হইয়া গেলে বিবাহ-সভায় লক্ষ্মীকে বসাইয়া, জমিদার-বাড়ী ছাড়িয়া, অন্ধকার পথে বাহির হইল। সেই রাতেই ষ্টেশনে গিয়া সম্মুখে যে ট্রেন পাইল উঠিয়া বসিল। কোন্ ক্লাসে উঠিতেছে তাহা দেখিল না, ট্রেন কোথায় যাইবে তাহা জিজ্ঞাসা করিল না। শূন্য-মনে চলন্ত গাড়ীর জানালার পাশে বসিয়া রাত্রির অন্ধকারের দিকে ভাহিয়া রহিল। সকালে ট্রেন তাহাকে কলিকাতায় নামাইয়া দিল। ০

সন্ধ্যা হইয়া আসিয়াছে। সারাদিন পথে-পথে ঘুরিয়া নিমাই শ্রান্ত হইয়া পড়িয়াছিল। এক বক্র সঙ্কীর্ণ গলির মধ্যে ঢুকিয়া সে বাহির হইবার পথ খুঁজিয়া পাইতেছিল না। বৈশাখী সন্ধ্যা ঝঙ্কা-ঘন হইয়া উঠিল। ঝোড়ো হাওয়ায় ধূলি-বালি উড়াইয়া তাহার চোখ-মুখ ভরিয়া দিল। আকাশে মেঘ ছাইয়া পথের আলো নিভিয়া গেল। তার পর ঝুটি নামিল। নিমাই-এর বড় রাগ হইল।



সারাদিন সে প্রায় কিছুই খায় নাই। যা কিছু পয়সা ছিল, টিকিট-কলেক্টর নিয়াছে, বাকী পয়সা এক ভিখারীকে দিয়া দিয়াছে। ভাবিয়াছিল, এখানে কোনো নূতন পিসি কি মাসি পাইবে। কিন্তু এ যে জনপূর্ণ মরুভূমি, এ পাষণ-পুরীতে কোথায় স্নেহের নীড় মিলিবে? তাহার উপর এরূপ ঝড়-জল আসাতে তাহার বড় রাগ হইল। জোরে কয়েকবার পথের খোয়ার উপর লাথি মারিল। তাহার পর সামনে যে বাড়ী পাইল, তাহার বন্ধ-দ্বারে সজোরে আঘাত করিতে লাগিল। কেহ দ্বার খুলিয়া দিল না। দুয়ারে জোরে লাথি মারিতে আরম্ভ করিল। বাহিরে তখন বজ্র হাঁকিতেছে, বিদ্যুৎ চম্কাইতেছে।

কিছুক্ষণ পরে একটি দশ এগার বছরের মেয়ে দরজা খুলিয়া দিতেই, সে জোরে ঢুকিয়া প্রায় তাহার ঘাড়ের উপর গিয়া পড়িল। তাহার দিকে ক্ষোভের সহিত চাহিল, কেন সে এতক্ষণ দরজা খোলে নাই। মেয়েটি পিছনে সরিয়া দাঁড়াইয়া বলিল, কি, কি চাই? নিমাই চুপ করিয়া নিনিমেষ নয়নে তাহার দিকে তাকাইল। তাহার গা হইতে জ্বল ঝরিয়া পড়িতেছে। মুখে ক্রোধ, বিস্ময়, আনন্দ জড়াইয়া কিসের ভাব ফুটিয়া উঠিতেছে। নিমাই-এর মূর্তি, তাহার চোখের চাহনি দেখিয়া মেয়েটি হাসিয়া ফেলিল। হাসিতেছে! হঠাৎ ক্রোধে অধীর হইয়া, নিমাই মেয়েটির মুখে এক চড় বসাইয়া দিল। মেয়েটি চোঁচাইয়া উঠিল, মাগো, মেরে ফেললে।

কি—কে বলিয়া মেয়ের মাতা ছুটিয়া আসিলেন। হঠাৎ চড় মারিয়া অতি লজ্জিত হইয়া নিমাই সক্রমণ নয়নে মেয়ে ও তাহার

মাতার দিকে চাহিল। মা আসিয়া ক্রুদ্ধ কণ্ঠে জিজ্ঞাসা করিলেন, কে তুমি? তাহার হাতে একখানা হাতা ছিল, চোর আসিয়াছে ভাবিয়া প্রস্তুত হইয়া আসিয়াছিলেন। ভীত নয়নে 'ছাতাটির দিকে চাহিয়া কাতর-কণ্ঠে নিমাই বলিল, আমার বড় ক্ষিদে পেয়েছে যে। তাহার কণ্ঠ শুনিয়া মাতার মন গলিয়া গেল, মেয়েটি হাসিয়া উঠিল। মাতা জিজ্ঞাসা করিলেন, কে তুমি?

আমি নিমাই।

কোথায় তোমার বাড়ী?

বাড়ী নেই।

কোথায় গাকো?

কোথাও থাকি না,—ঘুরে ঘুরে বেড়াই।

তোমার বাপ নেই?

না।

মা?

না।

কেউ নেই?

কেউ না।

কি জন্মে দরজা ঠেলছিলে?

আমি কোথায় যাব, পথ দেখতে পাচ্ছিলুম না যে।

মাতা ধীরে দরজা বন্ধ করিয়া দিলেন; মেয়েকে বলিলেন, কমলা, একটা কাপড় নিয়ে আয় ত?

চোর যদি হয় মা?

না রে না, ও চোর হতে পারে না।

কমলা তাড়াতাড়ি বাবার কি দাদার কোন কাপড় খুঁজিয়া পাইল না, নিজেরই একটা পাছাপেড়ে লাল সাদী আনিয়া হাজির হইল। নিমাই তাড়াতাড়ি কাপড় বদলাইয়া প্রসন্ন মুখে রান্নাঘরে ঢুকিয়া খাইতে বসিয়া গেল। খাওয়ার পর তৃপ্তির সহিত কমলার দিকে চাহিয়া গল্প জুড়িয়া দিল। কমলা তখন কি তরকারী কুটিবে জোগাড় করিতেছিল,—সে তাড়াতাড়ি বাঁটিটা টানিয়া লইয়া, আলু ও বেগুন কুটিয়া, বেলুন লইয়া বলিল, লুচি আর ভাজ্বে মাসিমা ?

পরদিন হইতে নিমাই কমলাদের পরিবার-ভুক্ত হইয়া গেল। সে দেখিতে সুশ্রী, বুদ্ধিটাও মোটা নয়। বংশ ভালো, এ কণ্ঠাদায়-গ্রন্থ যুগে সে পরে কাজে লাগিতেও পারে। কমলার বাবা নিমাইকে এক স্থলে ভক্তি করিয়া দিলেন।

এখানে পুকুর নেই, আম-বাগান নেই। সেই খোলা মাঠ, দীঘির পাড়, ছুরন্ত ছেলের দলের জন্ত নিমাই-এর মন মাঝে মাঝে ব্যথিত হইয়া উঠিত। কিন্তু বসিয়া ভাবিয়া মন খারাপ করাটাকে সে মোটেই প্রশ্রয় দিতে পারিত না। সে সম্মুখে যাহাকে পায়, তাহাকে যেমন মনপ্রাণ, দিয়া নিশ্চিন্ত হইয়া ভালোবাসে, তেমনি যাহাকে ছাড়িয়া আসে, তাহাকে নিশ্চিন্ত ভাবে ভুলিয়া যায়। নূতন সাথীর সহিত মিলনের আনন্দকে বিগত-জনের বিচ্ছেদ বেদনার স্মৃতি দিয়া ম্লান করিতে চাহে না।

নূতন বন্ধু জুটাইয়া লইতে তাহার বেশী দেবী হইল না। ক্লাসের ছেলে বিদ্রোহী ছেলের দলের সে নেতা হইল। খেলার দলের

সেক্রেটারী হইল। আর মাঝে-মাঝে বন্ধুদের সহিত ঝগড়া করিয়া, কমলার সহিত সকাল-সন্ধ্যা খুনসুটি করিত। তা ছাড়া, মাসিমার বাজার করা, ভাঁড়ার ঘর গোছানো, ঘরের টেবিল চেয়ার সাজানো নিমাই না হইলে কিছুই হইবে না। ছোট ছেলে-মেয়েদের সে মাষ্টার হইল। তাহাতে তাহাদের পড়া শুনা বড় হইত না বটে, কিন্তু তাহাতে তাহারা কোনদিন দুঃখ প্রকাশ করে নাই; কেন না, ঘুড়ি তৈরি করিতে সে ওস্তাদ ছিল। লাটু ঘোরাইতে, মার্কেল খেলিতে, তাহার মত গ্রামের স্কুলের কেহ ছিল না, সহরে আসিয়াও সে অপ্রতিদ্বন্দ্বী রহিল। স্কুলের মাচের টাই তৈরি করিয়া, মাচ খেলিয়া, পাড়ার কনসার্ট-পার্টিতে বাঁশী বাজাইয়া, বছর বছর পাড়ার থিয়েটারে নায়িকা সাজিয়া, ও মাষ্টারদের বাড়ী-বাড়ী ইটিয়া কাঁদিয়া ক্লাসে উঠিয়া, কমলার নিমাই-দার কয়েক বৎসর বেশ সুখে কাটিয়া গেল।

কিন্তু সুখ তো তাহার ভাগ্যে নয় না। পাড়ার সকলে বলিতে লাগিল, সে বকাটে হইয়া যাইতেছে। স্কুলের মাষ্টারেরা বলিলেন, তাহার জন্ম স্কুলের ছেলেরা খারাপ হইয়া যাইতেছে। কমলার দাদা একদিন তাহাকে পথে সিগারেট খাইতে দেখিয়াছিলেন, 'আর একদিন কলিকাতার কোনো কুস্থানে কু-গলিতে ঘুরিতেও দেখিয়াছেন। তাহার বন্ধুর দলও বড় সুবিধার ছিল না। কমলার পিতা বারবার সাবধান করিয়া দিলেন; কিন্তু তাহার স্বভাবের, অভ্যাসের কোন পরিবর্তন দেখা গেল না। রাতে আড্ডা হইতে প্রায়ই সে খুব দেৱী করিয়া বাড়ী ফিরিত। কমলা চুপে চুপে দরজা খুলিয়া

দিত, তাহার জন্ম বকুনিও কম খাইত না। তাহার খাবার চাপা থাকিত। একদিন কমলার বাবা রাগিয়া তাহাকে বাড়ী হইতে তাড়াইয়া দিলেন। সে যেমন অসহায় ভাবে আসিয়াছিল, তেমনি অসহায় ভাবে চলিয়া গেল।

তাড়াইবার কয়েকদিন পরে একদিন রাতে দরজায় আসিয়া নিমাই ধাক্কা দিতেছে, কমলা ঘর খুলিয়া দিল না; সে পাশের জানালায় আসিয়া দাঁড়াইল। নিমাই অশ্রুসিক্ত স্বরে বলিল, কমলা, দরজাটা খুলে দাও,—জানো আমার দুদিন খাওয়া হয়-নি।

না, দরজা খোলা হবে না।

আমি বাস্তবিক খারাপ হইনি কমলা।

তা জানি নিম্নাইদা, লোকে মিথ্যা কথা বলে।

নিমাই মৃদু হাসিয়া বলিল, তবে দরজাটা খুলে দাও।

না, বলিয়া জানালা ভেজাইয়া দিয়া, কমলা আপন ঘরের বিছানায় মুখ গুঁজিয়া কাঁদিতে গেল। কমলা অনেক দিন নিম্নাইদার জন্ম অনেক বকুনি সহিয়াছে; কিন্তু আজ সকালে তার নামের সহিত নিম্নাইদার নাম জড়াইয়া দাদা যেরূপ ইঙ্গিত ও ব্যঙ্গ করিয়াছেন, তাহা শুনিয়া সে প্রতিজ্ঞা করিল, এ জন্মে আর নিম্নাইদার মুখ দেখিবে না।

নূতন আশ্রয় জুটাইয়া লইতে নিম্নাই-এর বেশী দেবী হইল না। স্কুলে যাইবার পথে নিম্নাই রোজ দেখিত, একটি মেয়ে একগাদা বই লইয়া বাড়ী হইতে বাহির হইয়া গাড়ী করিয়া পড়িতে যায়। মেয়েটিকে বেশ দেখিতে। যতক্ষণ সে বাড়ীর দরজা হইতে বাহির

হইয়া ফুটপাথ পার হইয়া গাড়ীতে উঠিত, নিমাই আনন্দের সহিত চাহিত; কিন্তু মেয়েটিকে দেখিতে বড়; খোঁজ লইয়া জানিয়াছিল সে কলেজে পড়ে, নাম মাধুরী, বয়সে তার চেয়ে বড় হইবে। কয়েকদিন কয়েক বন্ধুর বাড়ীতে খাইয়া কাটিয়া গেল। তার পর একদিন সটান সে মাধুরীদের বাড়ী ঢুকিয়া, চাকর দিয়া মাধুরীকে ডাকাইয়া পাঠাইল। মেয়েটি আসিলে, সে একটু মাথা নোয়াইয়া প্রণাম করিয়া বলিল, মাধুরী-দিদি, আমি তোমাদের বাড়ী থাকব। তাহার স্কুলের দু-একজন ছেলের নিকট হইতে সে কিছু আদব-কায়দা শিখিয়া লইয়াছিল। মাধুরী এরূপ এক অপরিচিত বালকের অদ্ভুত প্রস্তাব শুনিয়া ঈষৎ হাসিয়া বলিল, থাকবে কি রকম?

হাঁ মাধুরী-দিদি, আমার কেউ নেই, কোথায় থাকি?

তা বটে, তাহার কেহ নাই। সে যখন দিদি বলিয়া ডাকিয়া আসিতেছে, তখন থাকিবার অধিকারের দাবী করিতে পারে। মাধুরী বলিল, তোমার কেউ নেই কি? তুমি এতদিন কোথায় ছিলে?

আমি আগে যেখানে ছিলাম, সেখান থেকে তাড়িয়ে দিয়েছে।

তাড়িয়ে দিয়েছে? নিশ্চয় তুমি খুব ছুট,—তোমায় দেখে তাই বোধ হচ্ছে,—যাও, সেখানে ফিরে যাও।

নিমাই কাঁদিয়া ফেলিল, না মাধুরী দিদি, সেখানে আমাকে কিছুতেই নেবে না,—আমি কোন খারাপ কাজ করিনি, লোকে আমার নামে মিথ্যে লাগিয়েছে। একে দিদি বলিয়া ডাকা, তার পর কান্না, আর ছেলেটিও দেখিতে বেশ সুশ্রী। সুতরাং নিমাই মাধুরী-দিদির আশ্রয় লাভ করিল।

মাধুরী-দিদির বাড়ী আসিয়া নিমাইকে সব কুসঙ্গ, আড্ডা ত্যাগ করিতে হইল। দিদির শাসন এত কঠিন হইবে জানিলে সে হয়ত আসিত না, সে জীবনে এই প্রথম একজনকে একটু ভয় করিল। মাধুরীর বকুনিতে সে সতাই ভয় পাইত। মাধুরীকে বাথা দিতে তাহার মোটেই সাহস হইত না। কনসার্টের আড্ডা, চায়ের আড্ডা, খেলার আড্ডা, সব বন্ধ হইল। নিয়মিতরূপে সকালে-রাতে পড়িতে হইত। ছপুরে স্কুলে চুপচাপ পড়া শুনিতে হইত — একটু ছুটিয়া করিলেই ‘স্মার’ মাধুরী-দিদির কাছে রিপোর্ট পাঠাইবেন। কিন্তু এক বন্ধুর দল ছাড়িয়া, সে আর এক বন্ধুর দল লাভ করিল। মাধুরীর বাড়ীতে প্রায়ই তাহার সহপাঠী-বন্ধু মেয়েরা আসিত। বিকেলে চায়ের পার্টি, গানের বৈঠক, সাহিত্য-সভাও হইত। নিমাই মাধুরী-দিদির পারসোণাল অ্যাসিস্ট্যান্ট হইয়া উঠিল। পার্টির আয়োজন করা, কেক, বিস্কুট, ফুল কিনিয়া আনা, চেয়ার টেবিল সাজানো, আলো ঠিক করা ইত্যাদি নানা কাজে তাহার বিকেল কাটিত। তারপর মাধুরী-দিদির বন্ধুদের খুচরা ভিণিষ কিনিয়া আনা। প্রায়ই তাহাকে হন্-হন্ করিয়া মিউনিসিপ্যাল্ মার্কেটের দিকে ছুটিয়া যাইতে দেখা যাইত। পথে কোনো বন্ধু জিজ্ঞাসা করিলে সে বলিত, আরে ভাই, ভারি ব্যস্ত ; ভারি দরকার। কোনদিন সে বলিত, এই মিউনিসিপ্যাল্ মার্কেটের দোকানদারগুলো ডাকাত,—ডাকাত। কোনদিন সে বলিত, এই দেখো না, এইটুকু লেশ, তার দাম তিন টাকা,—এইটুকু পশম, এর দাম নিলে বারো আনা। আর খাবারওয়ানাগুলো সব



চোর চোর—পুলিসে দেওয়া উচিত—কাল কেবু কিনে নিয়ে  
 গেলুম ভাই, বাসি পরশুকার, একটু তাতিয়ে সাজিয়ে রেখে  
 দিয়েছে, খুন কোরতে পারে, খুন কোরতে পারে—

মাধুরী দিদির বাড়ীতে নিমাই-এর দিন বেশ আনন্দেই কাটিয়া  
 যাইতে লাগিল। সব চেয়ে আশ্চর্যের বিষয় এই যে, সে  
 প্রথম বিভাগে ম্যাট্রিক পরীক্ষায় পাশ হইয়া কলেজে ভর্তি হইয়া  
 গেল।

বয়স বৃদ্ধির সঙ্গে সঙ্গে মাধুরী দিদির শাসনের বিরুদ্ধে নিমাই  
 মাঝে মাঝে বিদ্রোহী হইয়া উঠিত, কিন্তু এই মাধুরীভরা মেয়েটির  
 সহিত পারিয়া উঠিত না, হার মানিতে হইত।

কিন্তু সুখ তো তাহার ভাগ্যে নাই—একস্থানে সে কি করিয়া  
 বেশী দিন টিকিয়া থাকিবে! দিন বেশ কাটিতেছিল, হঠাৎ  
 কোথা হইতে এক বিলাত-ফেরৎ আপদ আসিয়া জুটিল। সে-ই  
 মাধুরী-দিদিকে একেবারে দখল করিয়া বসিল! মাধুরী আর  
 বড় নিমাইএর খোঁজ লয় না; সে কখন বাড়ীতে আসে যায়, কখন  
 পায় না-খায় তাহার খবর রাখে না। মাধুরী দিদির সঙ্গে বিবাহের  
 সখ্যাবার্তা ঠিক করিয়া নাকি লোকটা বিলাত গিয়াছিল। দ্বারে  
 রসনচৌকি বসিল না বটে, কিন্তু নিমাই-এর অন্তর করুণ সুরে  
 ভরিয়া গেল, আকাশে-বাতাসে যেন কোন্ সানাইয়ের বিদায়-  
 রাগিণী বাজিতেছে।

বিবাহের পরদিন নিমাইকে আর কোথাও খুঁজিয়া পাওয়া  
 গেল না। মাধুরী বলিয়াছিল, নিমাই, আমার নূতন বাড়ীতে



গিয়ে তুমি থাকবে—আমার বাড়ী এখন সাজিয়ে, গোছাবে কে ?  
নিমাই অশ্রুসিক্ত স্বরে বলিয়াছিল, আমি চলে যাব মাধুরী দি,  
আর তোমাদের কাছে থাকব না।

পাগল ছেলে !

মাধুরী তাহার ভাবী স্বামীর সহিত নিমাই-এর ভাব করিয়া  
দিতে অনেক চেষ্টা করিয়াছিল ; কিন্তু কিছুতেই পারে নাই।  
কিন্তু সে যে এমনভাবে চলিয়া যাইবে তাহা ভাবে নাই।

তখন বাংলার কোন জেলায় দুর্ভিক্ষ লাগিয়াছে। নিমাই সেই  
দুর্ভিক্ষ-পীড়িতদের সেবা করিতে ছুটিল। ইহার পর নিমাইকে  
বড় কলেজে আর দেখা যাইত না। কলেজের একটা মেসে  
আশ্রয় লইয়াছিল বটে, কিন্তু খুঁজিলে তাহাকে কখনও পাওয়া  
যাইত না।

কোথায় দুর্ভিক্ষ—কোথায় বণ্ডা—কোথায় মহামারী—বাংলা  
দেশের গ্রামে-গ্রামে সে ঘুরিয়া দেশমাতার সেবা করিয়া বেড়াইত।  
একটা আস্তানা জুটাইয়া লইতে তাহার বড় বেশী বেগ পাইতে  
হইত না। ‘দিদি, মাসি, একটা সম্পর্ক পাতাইয়া, কোথাও এক-  
দিন, কোথাও একমাস, কোথাও এক বছর সে নিশ্চিন্ত মনে  
কাটাইয়া দিত। ‘মাঝে-মাঝে কলিকাতার কোনও মেসে তাহার  
দেখা পাওয়া যাইত বটে। সর্বদাই সে ব্যস্ত আর শ্রান্ত। দেখা  
হইলেই বলিত, ভাই, সর্বনাশ হ’ল—কি কোরছ ! সব সর্বনাশ  
হয়ে গেল,—না খেয়ে, রোগে ভুগে, লোকগুলো যে মারা গেল !  
তোমরা কি ভেবেছ ? কে তোমরা ?’ এই কটা ব্রাহ্মণ কায়স্থ ?

জাত যা, সে ত, ওই চাষীরা! দেখো দেশের সর্বনাশ হ'য়ে গেল।

কখনও বলিত, চামার, চামার,—পুরুষগুলো হচ্ছে পশুর অধম, কি কোরে রেখেছে মেয়েদের? আহা, আহা!

কখন বলিত, মরে গেল, দেশের ছেলেগুলো সব মরে গেল যে,—একমাস না হতেই যে হাজার হাজার ছেলে মরছে, কি কোরুছ?

দেশের সেবা করিয়া ও দেশের দুঃখ দেখিয়া তাহার দিন আগেকার মতই বেশ আনন্দে কাটিয়া যাইতে লাগিল। কেহ কখনও তাহার মুখে বিষাদ দেখে নাই; সর্বদাই সে চির-প্রফুল্ল। টাকা সে রোজগার করিত না বটে, কাহারও কাফে হাত পাতিয়াও চাহিত না, তবু সে কখনও অর্থের অভাব অনুভব করে নাই। মাঝে-মাঝে অনাহার বা অনিয়মিত সময়ে আহার হইলেও, কখন সে খাবারের জন্ত ভাবে নাই। জমিদারের বাড়ীতেই হোক, আর চাষীর ঘরেই হোক, বামুনের রান্নাই হোক, আর মুসলমানের হাঁড়িতেই হোক, আহার ঠিক সময়ে আসিয়া জুটিয়াছে। সকল জায়গায় সে সমান ভূমির সহিত আহার করিয়াছে। যখন তাহার একটা জামার দরকার, তখন হয়ত বেহ তাহাকে একটা কাপড় দিয়াছে। যখন তাহার কাপড়ের দরকার, তখন হয়ত কেহ একটা জুতা দিয়াছে। এরূপ লোকের দিবার ভুল মাঝে মাঝে ঘটিয়াছে বটে, কিন্তু প্রায়ই তাহার যখন যা দরকার হইয়াছে তাহা জুটিয়া গিয়াছে।

সে বলিত, বিশ্বরাজের রাজত্বে এই যে সারাদিন খাঁটি, তুমি কি ভাবো, তিনি আমার মাইনেটা নেহাৎ ফাঁকি দেবেন? না হে, সে সর্দার-মজুরটা অত জোচ্চর নন। কি জানো, পৃথিবী-লক্ষ্মী আমার ভাগের একমুঠো চাল যেদিন যার হাঁড়িতে ফেলে দেন, তার বাড়ীতে অন্ন আমার ঠিক জুটবে। আর তিনি যেদিন তাঁর অমৃতময় প্রসাদ দেওয়া বন্ধ করবেন, জগতের সব রাজাগুলোরও শক্তি নেই যে, আমায় কিছু দেয়। এই যে লোকে টাকা দেয়, সে কি জানো? জগতের যিনি খাজাঞ্চী, তিনিই তাঁর ছোট-ছোট চেকগুলো এদের হাত দিয়ে আমার কাছে পাঠিয়ে আমার পাওনা শোধ করে দিচ্ছেন। আমি দিন-মজুর, খাটি; আমাকে খাওয়া-পরানোর ভার সর্দারের।

মাধুরী দিদিকে ছাড়িয়া চলিয়া আসার পর প্রায় দশ বছর কাটিয়া গিয়াছে। সেদিন হন্ হন্ করিয়া পথে যাইতেছে দেখিয়া হাত দুইটি ধরিলাম, আরে নিমাই যে, কেমন আছ.?

ভাই, ভারি ব্যস্ত, ভারি ব্যস্ত।

নিমাই দেখিতে সেই আঠারো বছরের ছেলেটির মতই আছে, শুধু তাহার চোখের কোণে একটু কালি, আর কপালে একটু রেখা।

আরে খবর কি?

খবর কি ভাই, এতদিন পরে আটকা পড়ে গেছি।

কি রকম? বিয়ে-থা করলে না কি?

এখন কি আর ভাই বিয়ে করবার বয়স আছে,—এখন সব বিয়ে দিতে ইচ্ছে করে।

সামনের এক চায়ের দোকানে দুইজনে চুঁকিয়া বসিলাম।

নিমাই বলিল, ভাই, এতদিন পরে আটকা! এত সব বাঁধন এড়ালুম,—কিন্তু এই সাত বছরের মেয়েটা যা বেঁধেছে ভাই!

আমি হো হো করিয়া হাসিয়া বলিলাম, সে কি হে?

হাঁ হে, আর বোলো না, পুরুষগুলোর মাথায় ঝাঁটা মারতে ইচ্ছে করে, এই দেখোনা, বাপের একটা মেয়ে, বাপ দশ হাজার টাকা দিয়ে এক ফাষ্ট ক্লাস এম-এসসির সঙ্গে বিয়ে দিলেন। তিনি এখন এক আফিমের দোকান খুলে বসেছেন। আহা মালতীর কথা বলি নি—তার স্বামী বুলে—লোকটা রোজ রাতে একটা-দুটোর সময় মা খেয়ে বাড়ী ফিরবে, বলবে, জানো আমি একজন ফাষ্ট ক্লাস এম-এসসি, আফিমের দোকান করে পাঁচশো টাকা মাসে রোজগার। তা কি একা আসবে, সব বন্ধুদের নিয়ে আসবে, মালতীকে রোজ তাদের মদের চাট রেঁধে রাখতে হবে, লুচি, মাংস। তা সে একটা ঝি রেখেও দেয় নি। বলে, বিয়ে করেছি কি জন্তে, স্ত্রীকে-স্ত্রী, ঝিকে-ঝি, আজকাল যেমন খরচ—ঝি রাখা কি গেরস্থের ঘরে পোষায়! বেচারী একা সারা দুপুর সব বাসন মাজবে, উলুনে আগুন দেবে, সব রেঁধে ঠিক কোরে রাখবে, আর স্বামী-দেবতা রাত-দুপুরে ইয়ার-বন্ধু নিয়ে খেতে আসবেন। এ সমাজ উচ্ছন্ন

যাবে না? বলিতে-বলিতে তাহার মুখ রাগে লাল হইয়া গেল। আমি তাহাকে থামাইয়া বলিলাম, তা আটকা কোথায় পড়েছ ভাই?

ইয়া বলছি, সেই কমলাকে জানো না? তার বাবা আমায় তাড়িয়ে দেন, তা তাঁর দোষ ছিল না ভাই, আমি সত্যিই খারাপ হয়ে যাচ্ছিলুম। সেদিন পথ দিয়ে যাচ্ছি, উপরের জানালা দিয়ে কে ডাকলে। দেখি কমলা। দরজা খুলে দিলে। ভেতরে যেতেই প্রণাম কোরে বললে, ভারি রোগা হয়ে গেছ নিমাই-দা। কেঁদে ফেললে ভাই! আমিও জান তো, কেঁদে ফেললুম। তার ছোট ছোট মেয়ে,—বেশ ঘর-সংসার কোরছে। বললুম, স্বখে আছ তো? বললে ত, বেশ আছি। তারপর বললে, তোমায় পেয়েছি, আর ছাড়ছি না, নিমাই দা, তুমি কিছুদিন আমার কাছে থেকে একটু সেরে যাও। বললুম, তা তোর স্বামী কিছু বলবে না। বললে, না। তা সত্যি, ওর স্বামী খুব ভাল লোক। ওকে বলা-কওয়াতে তবু ছেড়ে দিতে চাইলে, ওর স্বামী এসে ত ছাড়তেই চান না। আমার নামটা ভাই শুনেই বুকে জড়িয়ে ধরলে, বললে, আমি যা দেশের কাজ করেছি। হাসিও এল! আমিও দেশের কাজ করছি? আরে এ কি দেশের কাজ? যাক, সেইখানেই ত আটকা পড়ে গেছি। কি জানিস্ ভাই, ঐ কমলার বড় আর ছোট মেয়ে দুটো 'নিমাইমামা' বলেছে, আর কি,—একেবারে ঘর ছেড়ে বেরুবার যো নেই। আচ্ছা দেখ্ দেখি, কি করি, ওই মালতীর স্বামীর সঙ্গে একদিন যুষোযুষিই হয়ে যাবে, কি জানিস্ নেহাৎ

মেয়েটা বিধবা হবে—না হ'লে সেদিন ওকে মেরে নর্দমায় পুঁতেই ফেলতুম। যাক্ ভাই, ভারি ব্যস্ত।

তোমার ব্যস্ততা আর গেল না—তা মাধুরী-দিদির খবর কি ?

মাধুরী-দিদি ?—গেছলুম ভাই, দেখা কোরতে। কি জানিস্ স্বামীটা এ্যরিষ্টোক্রাট্ ! ওই মাঝে মাঝে যে যাই, পছন্দ করে না। সব ছোট মন ; বিলেত ঘুরে এল্লে কি হয় ? কি দরকার অশান্তি বাড়িয়ে ? দিদি তো কত যেতেই বলে, না গিয়ে আর থাকতে পারি না, মাঝে-মাঝে যাই, না ভাই সন্দেহে আর নেই।

রাত প্রায় নটা হইবে। বাহিরে অবিশ্রান্ত রষ্টি ঝরিতেছে, বজ্র হুঁকিতেছে। কি একটা রূপকথা শুনিতে শুনিতে কমলার দুটি মেয়ে খোলা বইয়ে মাথা রাখিয়া শ্লেট বুকে জড়াইয়া ধরিয়া 'তক্তার ওপর ঘুমাইয়া পড়িয়াছে, আর মাষ্টার মহাশয়ও ইজি-চেয়ারে ঘুমাইয়া পড়িয়াছেন। মাঝে-মাঝে ঝোড়ো-হাওয়া দরজা জানালা-গুলো ধাক্কা দিতেছে। 'কে যেন সজাগ বাতাসে হাহা করিয়া আর্ন্তনাদ করিতেছে। নিমাই স্বপ্নে শুনিতেছিল, ঘস্ ঘস্—অবিশ্রাম কে ছাই ও ঝামা লইয়া বাসন মার্জিতেছে, পোড়া কড়া ঘষিতেছে, তারপর হঠাৎ ঝন্ঝন্ করিয়া সব বাসন যেন পড়িয়া গেল, ভাঁড়ার ঘরের মসলার টিনগুলো কে কাহার ঘাড়ে পড়িয়া চারিদিকে মসলা ছড়াইয়া গেল ; তার পরে কে মাতালের মত চীৎকার করিয়া

কাহার চুল ধরিয়া টানিয়া লইয়া চলিয়াছে—সে স্পষ্ট কিছু দেখিতেছিল না, স্বপ্নে যেন সব শুনিতেছিল।

বাহিরে ঝড়ের শব্দ বাড়িয়া উঠিতেছিল। কান্নার উদাস সুর নয় ; ঝোড়ো-হাওয়ায় কে যেন ক্রুদ্ধ ক্ষুব্ধ হইয়া গর্জিয়া উঠিতেছে। নিমাই বার-বার চমকিয়া উঠিল। পূর্বের স্বপ্ন মিশাইয়া গেল। আবার তন্দ্রাচ্ছন্ন হইয়া দোঁখতে লাগিল, কোন্ জলসিক্ত বিদ্যুৎ-বিদীর্ণ নিরঙ্ক অন্ধকারে সে পথ খুঁজিয়া-খুঁজিয়া ফিরিতেছে ; কিছুতেই রাস্তা পাইতেছে না। সহসা সে কোথায় দাঁড়াইল ; মুষ্টিবদ্ধ হস্তে কি এক কঠিন বস্তুর উপর ক্রোধের সহিত বার-বার আঘাত করিতেছে ; ঘুষি ছুঁড়িল, লাথি মারিল, দরজা কই খোলে না। ঘুমের ঘোরে চেঁচাইয়া শিহরিয়া উঠিতে লাগিল।

ধীরে কমলা আসিয়া ঘরে ঢুকিল। এই নিদ্রিতদিগের দিকে চাহিয়া তাহার চোখে জল ভরিয়া আসিল। আবেগের সহিত ঘুমন্ত দুই মেয়েকে স্নেহ-চুম্বন করিয়া নিমাই-এর দিকে চাহিল; ধীরে চেয়ারের পাশে আসিয়া ডাকিল, নিমাইদা।

নিমাই ধীরে চোখ মেলিল, বিস্মিত হইয়া চাহিল। আবার ভালো করিয়া চোখ রগড়াইয়া দেখিল, মুখে মৃদু হাসি খেলিয়া গেল। তাহার মনে হইল সে যেন একটা মস্ত বড় স্বপ্ন দেখিতেছিল। সেই যে ষোল বৎসর পূর্বে এক বৈশাখী-ঝড়ের অন্ধকার-সন্ধ্যায় এই মেয়েটি তাহাকে ঘরে ডাকিয়া লইয়াছিল, তাহার পর সে যেন ঘুমাইয়া পড়িয়াছে ; জীবনের এতগুলি বৎসরের ঘটনা যেন স্বপ্নে ঘটয়াছে। তাহাই যদি সত্য হইত, হে ও কমলা যদি সেই কিশোর-



কিশোরীই থাকিত, তবে কমলাকে পাওয়ার পর জীবনে সে যে সব ভুল করিয়াছিল, তাহা আর হয় ত করিত না। কিন্তু চোখে কমলার দিকে চাহিল।


স্নান হাসিয়া কমলা বলিল, খুকিরা খেয়েছে, চলো খেতে যাই।

কিন্তু আটকা সে থাকিতে পারিল না। কোথাও বাধা থাকা তাহার ভাগো যে সহ্যে না। এক সন্ধ্যা-বেলায়, একটু বেড়িয়ে আসি বলিয়া সে কমলা ও তাহার ছোট মেয়ে দুইটিকে ছাড়িয়া মাতা ধরণীর বুকুে কোন্ নূতন পরিচয়ের সন্ধানে চলিয়া গেল।

এখন সে কোথায় আছে জানি না; মাঝে-মাঝে উদ্ধার মত কলিকাতায় আসে; খেয়াল ও সময় হইলে কমলা, মাধুরী-দিদি ও অন্য সর বন্ধুদের সঙ্গে দেখাও করে। এবার এসে ঠিক থাকিব, বলিয়া আশ্বাস দিয়া আবার কোথায় চলিয়া যায়। সর্বদাই সে ব্যস্ত, আর পরিশ্রান্ত। লক্ষ্মী, কমলা, মাধুরী-দিদি, মাধুরী-দিদির বন্ধুদল—ইহাদের ফরমাস্ আর খাটিতে হয় না বটে, কিন্তু এখন যে 'সমস্ত দেশের ফরমাস্ খাটিয়া তাহাকে ঘুরিতে হয়। বাংলার গ্রামে-গ্রামে ফরমাস্ খাটিবার যাহাদের কেহই নাই, সেই দুঃখীদের ফরমাস্ খাটিয়াই হয় ত তাহার সমস্ত জীবন কাটিবে। কাজের ব্যস্ততায় প্রাণের আবেগে খেয়ালই থাকিবে না, কালো চুল সাদা হইয়া যাইতেছে, চোখের জ্যোতিঃ ক্ষীণ হইতেছে, মৃত্যুর পরোয়ানা শীঘ্রই আসিবে।



তারপরে একদিন হয় ত কোন নগণ্য গ্রামে ক্ষুদ্র নদীতীরে গরীব চাষীদের জীর্ণ-কুটারের সম্মুখে কোন শরৎ-সন্ধ্যায় পৃথিবী-মাতার শান্তিহারা ক্রোড়ে শান্ত হইয়া শুইয়া হস্ত-মুখেই সে মরিবে, তাহার কথা কেহ জানিতেই পারিবে না। শুধু কেবল কয়েকটি চাষী-মজুর যুবক মলিনমুখে তাহার মৃতদেহ শ্মশানে লইয়া যাইবে, কয়েকটি গ্রামের বধু নদীর ঘাটে বসিয়া অশ্রু জল ফেলিবে, কয়েকটি পল্লী-বিধবা চিতা-ধূমের দিকে চাহিয়া চোখের জল কিছুতেই রাখিতে পারিবে না; আর গ্রামের যে ছোট ছেলে-মেয়েরা সারাদিন খেলা ভুলিয়া নদীতীরে আসিয়া জমিয়াছিল, রাতে তাহাদের বারবার ঘুম ভাঙ্গিয়া যাইবে। আর হয় ত লক্ষ্মী, কমলা, মাধুরীর কাছে এ মৃত্যুর খবর কোনদিন পৌছিবে না; নিমাই যে আসিবে বলিয়া আশ্বাস দিয়া গিয়াছিল, সেই আশায় তাহারা প্রতীক্ষা করিয়া





## বিকাশের ডায়েরি

ল'কলেজে বিকাশ ছিল আমার বিশেষ বন্ধু। দেখতে কালো, লম্বা, সুপুরুষ বলা চলে না। কিন্তু তার মুখে এমন তারুণ্য, ব্যবহারে এমন সৌজন্ম ও চিন্তার এমন গভীরতা ছিল যে, তাকে আমার ভাল লাগত। তার মানসপ্রকৃতি যেমন কল্পনাপ্রবল তেমন সত্যনিষ্ঠ ছিল।

• বিকাশের সহিত তাহারি সমবয়স্কা এক বিবাহিতা যুবতীর বিশেষ পরিচয় ছিল। সাধারণ ভাষায় মনের এই গভীর যোগকে ভালবাসা বলা যেতে পারে। দু'জনেই কলিকাতায় থাকলেও তাদের দেখা হত কম, পত্র ব্যবহার চলত। বিকাশ তার আত্মার আত্মীয়কে অনেক চিঠিই লিখেছিল, কিন্তু অধিকাংশই পোষ্ট করে নি। সে চিঠিগুলি তার ডায়েরিতে লেখা রয়েছে।

আজ বিকাশ ভারত-গভর্নমেন্টের আফিসের একজন উচ্চপদস্থ কর্মচারী। আফিসের অগণিত চিঠি লেখা, হিসাব রাখা, বড় বড় ফাইল ক্লিয়ার করা ছাড়া জীবনে তার আর অন্য কোন উদ্দেশ্য নাই। তার বিগত যৌবনে ডায়েরিতে লেখা চিঠিগুলি পড়ে সে কখনও কল্পনা করতে পারবে না যে, এই চিঠিগুলি সে কোন দিন

নিজে লিখেছিল। এই ভরসায় বিকাশের ডায়েরি হতে কয়েক খানি পাতা ছাপতে দিলুম।

একটি যুবককে একটি তরুণী কেন ভালবাসে, তা কে বলতে পারে! সাধারণ লোকে যুবকটির মধ্যে কোন অসামান্যতা দেখে না। কিন্তু ওই সুন্দরী তরুণী যুবকের আত্মার কোন সুন্দর রূপ দেখেছে, সে মুগ্ধ হল। ভালবাসা একটা রহস্য, বোঝার চেয়ে না-বোঝার অংশই অধিক। মানুষ যদি মানুষকে বিবেচনা করে ভালবাসত বা ভালবাসার যোগ্য ভেবে ভালবাসত, তাহলে এ পৃথিবীতে ক'জন পেত এ অমৃতের স্বাদ। তুমি যে আমায় ভালবাস, একথা যেন আমি বুঝতে, বিশ্লেষণ করিতে চেষ্টা না করি।

ব্রাউনিং-এর এ কবিতাটি আমার বড় ভাল লাগে।

Room after Room.

I hunt the house through

We inhabit together.

কাল সন্ধ্যায় তুমি বাড়ী ছিলে না। কিন্তু ঘরের পর ঘর তোমার সন্ধান ঘুরতে বড় ভাল লাগল। শূন্য ঘরের পর ঘর খুঁজছি,

কোথায় তুমি? আলনাতে শাড়ী রাউজ সাজান, ডে স্কিং টেবিলের একটা ড্রয়ার খোলা, মেজেতে একটা ছেঁড়া চিঠি পড়ে, সন্ধ্যার রঙীন আলো ঘরের নীল দেওয়ালে, তুমি নেই। ভাড়ার ঘর বন্ধ, বেড়ালটা দরজার গোড়ার ঝিমোচ্ছে, বারান্দার আলসাতে ঝাড়া বাসাতে পাখীরা কিচির মিচির করছে, রান্নাঘরের আগুন নিভে গেছে, পশ্চিমাকাশ রাঙা হয়ে উঠল, তুমি নেই। ছাদের কোণে বেতের মোড়ায় চুপ করে বসলুম, নারিকেল গাছগুলির আড়ালে সূর্য্য অস্ত গেল, সন্ধ্যার বাতাসে করবীফুলের ঝাড় ছলে উঠেছে, একে একে তারা ফুটে উঠল, তুমি নেই।

Jealousyকে জয় করতে হবে। সেটা হচ্ছে প্রেমের অন্তরায়। ঈর্ষ্যাকে যারা বলেছে প্রেমের উল্টো দিক বা তার প্রতিক্রিয়া, তারা ভুল বলেছে, আসল প্রেমকে তারা জানে নি। একথা সব সময়ে মনে রাখতে হবে যে, তোমার ওপর আমার কোন অধিকার, দাবী নেই। প্রেমের রাজ্যে প্রত্যেকে স্ববার্ট। যদি তোমাকে পাই, তেনে স্ব-ইচ্ছায় আত্মমর্পণের আনন্দে পাই, সে পাওয়াকে একমাত্র আমার অধিকার বলে মনে না করি। জীবনকে নানা জনের পরিচয়ের মধ্য দিয়ে পূর্ণ করতে হবে। প্রতিজনের সঙ্গে যে সম্পর্ক হয়, তা বিশেষ সম্পর্ক। কিন্তু তোমার সঙ্গে আমার যে সম্বন্ধ, এই আত্মার যোগ সবিশেষ, ইংরাজীতে যাকে বলা যায় unique, তার

তুলনা নেই পৃথিবীতে। এই বিশেষ সম্পর্কের গভীর আনন্দে মগ্ন হয়ে যদি তুমি তৃপ্ত হও ত ভাল। তোমার জীবনকে নিয়ন্ত্রিত করবার আমার কি অধিকার আছে। ভালবাসার দোহাই দিয়ে লোকে কতৃৎ করতে চায়। প্রেম স্বাধীন থাকলেই এক জীবনের স্পর্শে আর এক জীবন নবজন্ম লাভ করে, ফুটে ওঠে গানের ফুল, জলে আনন্দের প্রদীপ, ভাবের সূতাস্থ কথার মালা গাঁথা হয়। নূতন সৃষ্টির রহস্য।

তারপর ছাড়াছাড়ি হয়। দুই জীবনধারা চলে যায় ভিন্ন শ্রোতে, অণু পথে। কিন্তু তাদের যে মিলন হয়েছিল, দিন কেটেছিল পাশাপাশি, রাত একই তারালোকের নীচে, এই আনন্দ-স্বর বাজে প্রভাতের জাগরণে, সন্ধ্যার বিজন উদাসতায়, রাত্রির নিদ্রাহারা গ্রহর ভরে।

এসব কথা তুমি বুঝবে কিনা জানিনা। নাই বা বুঝলে, তাতে ক্ষতি নাই। তুমি যদি না অন্তরে অনুভব করে থাক, তা হলে কথা দিয়ে আমি তোমায় কি বোঝাতে পারব? আমার মনে হয়, কথা মনের ভাব প্রকাশ করে না, আড়াল সৃষ্টি করে,—নান্ন অর্থের মিথ্যা বোঝার আড়াল।

অতি নিকটে নয়, অতি দূরেও নয়, তুমি শুধু কাছাকাছি থাক। যেন কক্ষের মধ্যে ক্লাস্তি লাগলে চোখ মেলেই তোমায় দেখতে পাই, যেন চিন্তায় চিন্তে অবসাদ হলে তোমার স্নিগ্ধ দৃষ্টিলাভ করি।

নিবিড় যে আলিঙ্গন, তাতে ক্ষণিকের জন্য তীব্র আনন্দানুভূতি কিন্তু তারপর ব্যথা জাগে। আনন্দকে ত অনন্তকাল ধরে সঞ্চারিত করা যায় না।

দূরে যদি যাও, কাজ থেকে মন চলে যায়, স্মৃতির চিত্রশালায় পথ হারিয়ে ভুলে আনমনা বেলা কাটে। কাছে যদি থাক, কাজ করবার শক্তি পাই। হয়ত তোমার পায়ের ধ্বনি পাশের ঘরে, আলমারি গোছাচ্ছ, টেবিল সাজাচ্ছ।

আজ বিকেলে ভেবেছিলুম, তুমি আসবে। সব কাজ ফেলে একা বসেছিলুম, বন্ধুদের দিয়েছিলুম বিদায় করে, যাদের আসবার কথা ছিল বারণ করে দিয়েছিলুম, যারা নিমন্ত্রণ করেছিল, বলেছিলুম আজ আমার সময় নেই।

• তুমি এলে না। কে তোমায় চায়ে নিমন্ত্রণ করেছে, সেখানে গেলে।

এই না-আসার মধ্যে আজ তোমাকে নূতন করে পেলুম • ভুল বুঝানা। আমরা যা পাই, তার দাম ত আমরা সব সময় দিই না, তার মূল্যও জানি না। তোমাকে আজ সন্ধ্যায় না-পাওয়ার মধ্যে তোমাকে পাওয়ার মূল্য বুঝছি।

বাইরে সন্ধ্যা • ঘরে ইজি চেয়ারে চুপ করে বসে। সূর্যাস্তের বর্ণোৎসব দেখতে ইচ্ছে করছে, কিন্তু আলশ্রু আর ওঠা হচ্ছে না। প্রদোষের ক্রমান্বয়কারমান ঘরটি বড় রহস্যময় অপূর্ব। স্কাই-লাইটের ঝাঁচের ওপর আলো যেন ঘুম পাওয়া ছেলের ক্লান্ত চাউনি। হলে দেয়ালের ওপর অস্পষ্ট আলোকে কি কাতরতা-ভরা, ছবিগুলি চেয়ার,

টেবিল সর্ব আবছায়াময়। সবচেয়ে বিচিত্র লাগছে ওই বড় কালো পিয়ানোটা, ওটার মধ্যে কত সুর ঘুমিয়ে আছে, ও যেন কোন রূপকথার দৈত্য গুঁড়ি মেরে বসে আছে চুপ করে, আঙ্গুলের ইসারায় আদেশ করলেই সঙ্গীতের অমৃতলোকে নিয়ে যাবে। ও কিন্তু আমার হুকুম মানতে চায় না, তোমার অঙ্গুলিগুলির বড় বাধ্য।

ছবিগুলি দেওয়ালের সঙ্গে প্রায় এক হয়ে গেছে। মধুর স্তব্ধতা, গভীর শান্তি। জালনার ফাঁক দিয়ে দেখা যাচ্ছে নারিকেল বৃক্ষগুলির উপর তৃতীয়ার চন্দ্র।

চুপ করে বসে আছি। তুমি এসে জ্বালবে আলো, পিয়ানোতে সঙ্গীত জেগে উঠবে প্রভাতী পাখীর আনন্দ ঝঙ্কারের মত।

তুমি এলে না, আমাকে আলো জ্বালতে হল। ইলেকট্রিকের আলো বড় তীব্র, অস্বাভাবিক, দিনের আলোর সঙ্গে তার কত তফাৎ। তার মধ্যে মিড় নেই, একটানা সুর, এ আলো জিনিষকে দেখায় কিন্তু উদ্ভাসিত করে না। বারান্দার অন্ধকারে এসে বসলুম।

আমার এ চিঠি তুমি কি বুঝতে পারলে? যদি কোন মধুর সঙ্ক্যায় আবছায়াময় ঘরে মায়ায় আলো-অন্ধকারে বসে প্রতীক্ষা করে থাক, তবেই বুঝতে পারবে।

কথা আমাদের অনুভূতিকে কতটুকুই বা ব্যক্ত করতে পারে। সাদা কাগজ ও পেন্সিল, এই হচ্ছে আমার হাতের যন্ত্র, শিল্পীর যেমন পট ও রঙের তুলিকা। সাদা কাগজের ওপর কালো আঁচড় টেনে চলেছি। শূন্য সাদা কাগজের ওপর পেন্সিলটা স্থির হয়ে দাঁড়িয়ে



থাকে। মন বলে, লেখ, লেখ। পেন্সিল কয়েকটি আঁচড় টানে, কথার পর কথা, তারপর কালো দাগগুলির পাশে সম্মুখের দীর্ঘ সাদা পথের দিকে চেয়ে শুরু হ'য়ে দাঁড়ায়। মন ভাবে, যা বলতে চাই তা ত লিখতে পারছি না। তেয়ি শুরু হয়ে আমি চেয়ে আছি রাতের অন্ধকারের দিকে, অনন্ত নীলাকাশের শুভ্র নীহারিকা-পথের দিকে।

শিল্পীদের সৃষ্টির প্রেরণার মধ্যে একটা গভীর বেদনা আছে, মনে হয়। তাঁদের, Inspired মুহূর্তগুলি কোন মর্ষগত বেদনার মগ্নচৈতন্যলোকের প্রতিক্রিয়া। বিটোফেনের সোনাটা, শেলীর কবিতা মানবের চিরন্তন বেদনা হতে উৎসারিত। আমাদের শাস্ত্রে বলেছে, বিশ্ব সৃষ্টির মূলগত প্রেরণা আনন্দ হতে। সে আনন্দ কেমন জানি না, কিন্তু সৃষ্টির মর্ষে যে বেদনা আছে, তা অনুভব করছি।

পেয়েও যে পাওয়া যায় না, কোথায় ব্যথা থাকে, দীর্ঘনিঃশ্বাস পড়ে। মন ভাবে, এ পাওয়া ক্ষণিক, এইখানেই হয়ত শেষ।

আজ বিশ্বপ্রকৃতির নাড়ীতে নাড়ীতে যে আনন্দের শিহরণ, জাগরণের আলোড়ন, সে আনন্দ আমাদের অন্তরে পরিব্যাপ্ত হোক। খোল, খোল দ্বার, বসন্ত-স্পন্দিত পৃথিবীর পুষ্পিত অঙ্গনে এস। চেয়ে দেখেছ কি, আকাশে আজ কিসের রং লেগেছে, গাছে গাছে রঙীন

ফুলের ভাঁয় ধরে না, পুষ্পস্বরভিময় বাতাসে জ্যোতির্ময় আলোক-  
ধারায় কি আনন্দময় প্রাণশ্রোত প্রবাহিত।

কিন্তু ইচ্ছা করলেই ত এ আনন্দশ্রোতে মগ্ন হওয়া যায় না,  
নানা ক্ষুদ্রতা, বিরুদ্ধতায় জীবন খণ্ডিত। তাদের যদি না জয়  
করতে পারি, আজকে তাদের যেন শাস্ত করতে পারি।

তোমার মন আমি জানতে চাই না। মনের কথা কে জানতে  
পারে? তুমি একদিন আমায় বলেছিলে, দেখতে ইচ্ছে করে  
তোমার মন। আমি বলেছিলুম, ভয় পাবে, সেখানে যে স্বর্গ ও  
নরক পাশাপাশি, সেখানে স্বর্গের পারিজাত ফোটে, সয়তানের  
চক্রান্ত হয়। মন জেনে দরকার নেই।

তোমার কথা ভাবতে বসলে আমার মন বদলে যায়, আমার  
সত্তার অপরূপ পরিবর্তন হয়। প্রতিদিনকার সহজ যে মানুষ, সে  
মানুষ আর থাকি না। যে মানুষ আজ চাকরকে বকেছি, ধোপার  
টাকা কেটেছি কাপড় হারানোর জন্ত, সে “মানুষ যেন লজ্জিত হয়ে  
পালাতে পারলে বাঁচে; আমার মধ্যে আর এক মহান অচেনা মানুষ  
জাগে, সে তার সব সঞ্চয় উজাড় করে দিতে চায়, কোন মহৎ  
দুঃসাহসিক কাজে আত্মোৎসর্গ করতে চায়।

কিন্তু প্রেমের জন্ত ত্যাগ করা অর্থাৎ আপনাকে জীবনের সহজ  
সরল সুখ হতে বঞ্চিত রাখা, “দেহমনকে বুতুকু রাখা, আমি বড় বলি

না। না-পাওয়ার বেদনা, আরও না-পাওয়া দিয়ে শান্ত হয় না।  
প্রেমের ত্যাগ হবে মিলনসমুদ্রের আনন্দোচ্ছ্বাস।

এ কথা তোমায় লিখেছি যে, jealousyকে জয় করতে হবে।  
কিন্তু সে ত সহজ নয়। আমাদের মনের মধ্যে যে ওথেলো আছে,  
সে সভ্য হয়ে উঠেছে। এখন তার ঈর্ষ্যা হত্যায় মূর্তিলাভ করে না,  
এখন সে তার ব্যথাকে পাঠিয়ে হৃদয় মনের মগ্নচেতন্যলোকে, কিন্তু  
সেখানে সে বেদনা চুপ করে বসে থাকে না, রহস্যময় অজ্ঞাত তার  
ক্রিয়া, হয়ত একদিন হঠাৎ সে জেগে উঠবে, তার সঞ্চিত শক্তি  
প্রকাশিত হবে মনের দারুণ ভূমিকম্পে। সেইজন্মে বলছি তুমি  
কার সঙ্গে নূতন বন্ধুত্ব করছ, সে কথা আমায় লিখ না। তোমার  
মনের অপূর্ব সুন্দর স্বচ্ছতা আছে, আমার মনের জানলা তোমার  
দিকে পূর্ণভাবে খুলে দিতে পারি, তোমার নির্মল চোখের আলোয়  
যা দেখবে তা অতি সহজ সরলভাবে দেখবে। কিন্তু আমার চোখে  
রয়েছে রঙীন মায়া, আমার মন রহস্যঘন, স্বেজন্ত তোমার মনের  
সকল কথা আমি জানতে চাই না।

অজস্তার পদ্মপাণি বোধিসত্ত্ব দেখেছ? অজস্তায়ত তুমি যাওনি,  
কিন্তু ছবিতে নিশ্চয় দেখেছ। অনিন্দ্যকান্তি দ্বিব্য জ্যোতিষ্মান  
ভগবান বুদ্ধদেবের পার্শ্বে এক কৃষ্ণ রাজকুমারী দাঁড়িয়ে আছে, ভূসার  
মত কালো দেহ, স্বল্পবস্ত্রপরিহিতা, পদ্মাক্ষী, ক্লান্ত মুখ করুণ  
বিহ্বলতায় ভরা। সে ব্যথিতা নারী লীলাকমল হাতে এসেছে  
শান্তির আশায়। এই শান্তি-তৃষিতা কৃষ্ণ রাজকুমারী আমার  
আত্মার রূপ। কে তাকে শান্তি দেবে? তার দীর্ঘ অক্ষি-পল্লবঘন,

নয়নের দৃষ্টিতে যে জীবনের কাতরতা রয়েছে, সে কাতরতা তুমি বুঝবে কি ?

আর্ট সখের বা সুখের জন্ম হতে পারে, এ আমি ভাবতে পারি না। আর্ট হচ্ছে আমাদের অন্তরের গভীর আবেগের প্রকাশ। সে আবেগ সুখের নয়। সুখ আত্মাকে গভীরভাবে স্পর্শ করে না। দুঃখ আমাদের সত্তার মর্মস্থলে নাড়া দেয়। এই মর্মের শতদলে বাণী অধিষ্ঠিত। সেজন্য দেখবে, জগতের সব বড় উপন্যাস, নাট্য, কবিতা হচ্ছে ট্রাজিডির। তাদের উৎস মানব-জীবনের দুঃখের গভীর অনুভূতিতে।

আমার জীবন আমার কাছে শিল্পের মত। তুমি যে মাঝে মাঝে আমাকে দুঃখ দেও, তা ব্যর্থ হয় না। জীবন-শিল্পের অপূর্ব সৃজন ক্রিয়া চলে।

সাহিত্য, চিত্র, সঙ্গীত সকল আর্টের value সম্বন্ধে আমাদের চেতনা সজাগ নয়। কিন্তু আর্টের প্রভাব আমাদের জীবনে থেকে যায়। একখানা ছবি দেখার, গান শোনার বা বই পড়ার আগের ও পরের আমি এক নই। তা যদি হয়, তাহলে বৃথাই ছবি দেখলুম, গান শুনলুম, বই পড়লুম। শ্রেষ্ঠ শিল্পীগণের আর্ট আমার জীবনকেও গড়ে তুলেছে। তোমাকে আমি আর্টের এক অপেক্ষিত সৃষ্টিকর্তা দেখি, তোমার মধ্যে ছবি, গান, গল্প, নৃত্য, ভাস্কর্য্য সকল যেন রূপ

ও কথায় পরিপূর্ণ হয়ে উঠছে বিকাশমান পদ্যের মত। কথাটা তোমাকে বোঝাতে পারলুম কি না জানি না। তোমার সঙ্গে আমার পরিচয়ে আমার সত্তা প্রতিদিন নবরূপে গড়ে উঠেছে। পণ্ডিতদের aesthetics গ্রন্থে আর্টে সৌন্দর্য্য সৃষ্টির মূলসূত্র খুঁজতে গেছলুম, সে মূলসূত্রের রূপ দেখলুম তোমার মধ্যে। এ আমার নব দৃষ্টিলাভ।

তুমি বলবে, আমাকে এ দৃষ্টিতে দেখ না, এ আমি চাই না; আমি সহজ রক্তমাংসের নারী, ভাবের কুয়াসায় তাকে ঝাপসা করে এমন মানসী মূর্ত্তি গড়া কেন? কেন মূর্ত্তি গড়ি, তা তুমি জান।

তোমার ছোট চিঠিখানি পেলুম। বড় সুন্দর তোমার রূপ দেখলুম। প্রভাতে স্নান করে তুমি চিঠি লিখতে বসেছ, ভেজা কালো চুল পিঠির ওপর ছড়িয়ে পড়েছে, রক্তকরবী রঙের জামার উপর কালো চুল ঝিকমিক করছে; স্তম্ভান-স্নিগ্ধ মুখখানি, চোখে একটু উদাসভাব। চেয়ারে বসে লেখনি, চেয়ার টেবিল নেহাৎ আফিসেব গন্ধ-ভরা। সোফায় বসে লিখে চলেছ। এ্যাম্বর রঙের ফাউন্টেনপেন দিয়ে হালকা নীল কাগজে কালো আঁচড় কেটে চলেছ মনের খুসীতে, সোনার নিব দিয়ে কাজলের মত কালো কালি ঝরে পড়ছে, তোমার চোখ একটু জ্বলজ্বল করছে কি!

রোঁভরা উদাস মধ্যদিনে তপ্ত বাতাসের দীর্ঘশ্বাসের মধ্যে তোমার এই মূর্তিটি ভেবে ভূপ্তি হচ্ছে।

আজ রাতে চাঁদের রূপ গেছে বদলে! নীলকান্তমণির পেয়ালা উপচে পড়ছিল চাঁদের আলো স্রাম্পনের ফেনার মত। আজ চাঁদের চোখে করুণ দৃষ্টি। আজ সে আমারি মত বিরহী।

রাত গভীর হল। এতক্ষণ এমিয়েলের জার্নাল পড়ছিলুম। এমিয়েল লিখছেন, জীবনে একটি মাত্র জিনিষ দরকার, ঈশ্বরকে পাওয়া। আমি বলব, প্রেমকে পাওয়া।

ছোট বেলা হতে প্রেমকে খুঁজে বেড়াচ্ছি পৃথিবীর বক্র দুর্গম পথে পথে জীবনের প্রদীপ জালিয়ে। সে প্রদীপ নিভিয়ে দিতে ইচ্ছে করে। স্তব্ধ অনন্ত আকাশের তলায় তারার আলোয় একাকী দাঁড়ালুম। চোখে জল এল। গভীর বেদনায় অনুভব করলুম, আমার অন্তরে রয়েছে তোমার প্রেম, সেখানে প্রেম ও ঈশ্বর এক হয়ে গেছে।

## আয়ন।

কলিকাতার এক বনেদী পাড়ায় অতি পুরাতন জীর্ণ প্রাসাদ। এই ভগ্নপ্রায় অট্টালিকা প্রাচীন কলিকাতার এক প্রসিদ্ধ ধনী বনেদী বংশের বসতবাড়ী ছিল। বনেদী পরিবারে ভাঙন ধ'রল—ভায়ে ভায়ে মামলা, পাওনাদারদের নালিশ, মর্টগেজ, রিসিভার, প্রিভি-কাউন্সিলে আপীল—শেষে এ বৃহৎ বাড়ী হাইকোর্টের নিলামে বিক্রি হ'ল, এক ধনী মাড়োয়ারী বাড়ীখানা কিনলে। সে তাতে বাস করলে না। বড়রাজারে তার কাপড়ের দোকানের উপর চারতলার খুপরি ঘর ছেড়ে এলে রাতে তার ঘুম হবে না।

মাড়োয়ারীটি তিনমহল বাড়ীখানা কিনে তিনভাগে ভাগ করলে; নানা দিকে বিভাগ-দেওয়াল তুলে, কোথাও দরজা ফুটিয়ে, কোথাও জানালা বন্ধ ক'রে বাড়ীটি এক গোলক-ধাঁধা তৈরী করলে। প্রথম অংশে আস্তাবল, দরওয়ানদের ঘর ইত্যাদি হ'ল চালের ও কাপড়ের গুদাম; যেখানে সরকারদের তেজী সুন্দর ঘোড়ারা নাল-বাঁধান পায়ের খটখট শব্দে জুড়ি-গাড়ী টেনে ছুটে যেত, গিলে-করা আদির পাঞ্জাবী প'রে সরকারদের মেজবাবু রাশ ধ'রে বসতেন, সেখানে রেঙ্গুন-চালের বস্তা ও জাপানী কাপড়ের

গাট খাবার জায়গা হ'ল। দ্বিতীয় অংশ, দোতলা বৈঠকখানা, চণ্ডীমণ্ডপ, নাচ-ঘরে এল প্রেস। হরিলাল নামে এক ভদ্রলোক এই অংশ ভাড়া নিয়ে তার খালধারের টিনের ঘরের পনের-বছর-পুরানো প্রেসটা তুলে আনলে। থাকোহরি নামে এক ভদ্রলোক তৃতীয় অংশ ভাড়া নিয়ে মেস ও হোটেলখানা খুললে। অন্যদের যে দরজা দিয়ে সরকারদের গিল্লীরা, বধুরা জড়োয়া-গয়না প'রে পর্দার আড়ালে পান্ধীতে উঠতেন, সে-দরজার উপর থাকোহরি লম্বা সাইনবোর্ড ঝুলিয়ে দিলে, "হিন্দু ভদ্রলোকদের আহারের স্থান"। দরজার দু'পাশে দুই লম্বা সাইন বোর্ড আঁটা—"কাত্যায়নী হোটেল"—ভাত এক খালা -/০, মাছ -/০, আলু ভাজা - .৫ ইত্যাদি; অর্ডার দিলে মাংসের চপ-কাট্‌লেট্‌ পাওয়া যায়।

হরিলালের প্রেস খুব বড় নয়। ঠাকুর-দালানে ছাপবার যন্ত্র ব'সল, জার্মান প্রেস; পূর্বে সেখানে প্রতি বছর সরকারদের দুর্গা পূজা, জুগদ্ধাত্রী পূজা হ'ত। তার দু'ধারে লম্বা বারান্দা কাচ দিয়ে ঘিরে টাইপ-বোর্ড, কম্পোজিটারদের কাজ করার জায়গা হ'ল, আর বৈঠকখানায় অফিস।

দোতলার বড় নাচ-ঘরটা হরিলাল তার শোবার ঘর করল। এক সময় সে-ঘরে বাড়-লঠনের প্রদীপ্ত আলোয় পারশ্বের কার্পেটের ওপর আগীর খাঁ শরদ বীণ বাজিয়েছে, কাশী-লক্ষ্মীর প্রসিদ্ধা বাইজীর নৃত্য-গীত হয়েছে, ম্যাকলীন কোম্পানীর বড় সাহেব, মেজ সাহেব হুইস্কি খেতে খেতে সে গান-বাজনা শুনে বলেছে, কেয়াবাং ! সে ষাট বছর পূর্বের কথা।



রিসিভারের হাতে বাড়ীখানি ছিল তিন বছর, কোন মেরামত হয় নি ; মাড়োয়ারীটিও এ জীর্ণ-বাড়ী সংস্কার করে কোন অতিরিক্ত অর্থ ব্যয় করতে নারাজ , হরিলালের ঘরের দেওয়ালে বালি খ'সে পড়েছে, কোণে কোণে ঝুল জমেছে, মেঝের সিমেন্ট উঠে গিয়ে নানা জায়গায় গর্ত হয়েছে। তার জন্তে হরিলালের কোন দুঃখ বা আপত্তি নেই। সে তার পিতার আমলের পুরানো বড় খাটটা ঘরের এক কোণে রাখলে ; বেতের ইজি-চেয়ার, ময়লা ক্যানভাসের ডেক্-চেয়ার ও দু'খানা চেয়ার রইল দেওয়াল ঘেসে ; তা ছাড়া একটা টুল ও একটি ড্রেসিং-টেবিল। বৃহৎ ভাঙা ঘরে এই আসবাব-পত্র এক কোণে, বাকী ঘর খা খা করতে লাগল।

দোতলায় আরো তিনখানি মাঝারি ঘর, সেগুলি প্রায় শূন্য পড়ে রইল। কারণ, হরিলাল অবিবাহিত, একা থাকে। তার এক ভুটিয়া চাকর আছে, সে হরিলালের দেখা-শোনা করে।

দেখা-শোনা তাকে বিশেষ কিছু করতে হয় না। সকাল বেলা চা, দুপুরে ভাত ও একটা মাছের তরকারি রেখে দেয় ; রাতে প্রায়ই থাকোহরির হোটেল থেকে ঝাল-মাংস ও রুটি আসে। রাতে হরিলালের আসল আহার হচ্ছে হুইস্কি, রুটি-মাংস অনুপান মাত্র।

হরিলালের জীবন রহস্যবৃত্ত ; জীবনের পূর্বভাগের ইতিহাস কেউ বিশেষ জানে না। কেহ বলে, সে বি-এ পাশ, এম-এ পড়তে পড়তে সন্ন্যাসী হয়ে চলে যায়। কেন সন্ন্যাসী হয়ে চলে যায়, তারও একটা গল্প শুনা যায়। সেই চিরপুরাতন গল্পের পুনরাবৃত্তি।

হরিলাল ব্যর্থ প্রেমিক, পাড়ার কোন মেয়েকে সে ভালবাসত, সে মেয়ে তার স্বজাতি নয়, সে ছিল এক ধনীর কন্যা।

সন্ন্যাস-জীবনের নেশা যখন কেটে গেল, দেশে ফিরে এসে হরিলাল দেখলে, তার বাবা-মা সব মারা গেছেন ; কোন আত্মীয় স্বজনের সন্ধান পেল না। তার একমাত্র বোন ছিল, তার বিয়ে পশ্চিমের কোন সহরে হয়েছে। বোনের কোন খোঁজ-খবর করলে না। কিছুদিন চাকরির উমেদারিতে 'অফিসে অফিসে ঘুরল ; তারপর বিরক্ত হয়ে এক প্রেসের কম্পোজিটার হয়। প্রেসের কাজ তাকে পেয়ে বদল ভূতের মত। নেশা লেগে গেল। এখন সে একটি ছোট প্রেসের মালিক। সকাল থেকে গভীর রাত পর্যন্ত সে প্রেসের অফিস-ঘরে গুম হয়ে বসে থাকে, অন্ধকার ঘর, দিনের বেলাতেও আলো জ্বালতে হয়।

হরিলালকে কেউ প্রেস-বাড়ীর বাহিরে যেতে দেখে নি। যকের মত সে প্রেস আগলে বসে থাকে। কম্পোজিটারদের বকে, প্রেসের মুসলমান কারিগরদের সঙ্গে ঝগড়া করে, খাতার উপর ঝুঁকে হিসাব লেখে : লাল কালি দিয়ে প্রফের ভুল কুটে, দিশাহারা প্রেতাচার মত প্রেস-বাড়ীতে দিনরাত ঘুরে বেড়ায়। কয়েকটি জমিদার-বাড়ী ও মহাজনের ঘর তার বাঁধা আছে। খাজনার রসিদ, তেজারতি, জমিদারী কাগজ-পত্র ইত্যাদি হাজার হাজার তাকে ছাপতে হয়, জেলা মিউনিসিপ্যালিটি, ইউনিয়ন বোর্ডের কাজও মাঝে মাঝে পায়। সে নিজে কোথাও যায় না। দালাল দিয়ে অর্ডার আনায়, অকাতরে খুস দেয়। সে ত' টাকার জন্য কাজ চায় না, প্রেসে কাজ

থাকলেই হ'ল, তাতে লোকসান দিতেও আপত্তি নেই। তবে গল্প-উপন্যাসের বই সে ছাপতে নেয় না। গল্প-উপন্যাসের প্রফ পড়তে চায় না; ও-সব মেকী ভালবাসার কথা পড়তে মেজাজ খারাপ হয়ে যায়।

• তবু লোকে বলে, হরিলাল বার্থ-প্রেমিক!

তার শীর্ণ দীর্ঘ দেহ, মলিন রেশ, অর্থেপ্সু ভাব, অদ্ভুত মৃতি দেখলে কেউ ভাবতে পারে না, এ-লোক একদিন ভালবেসেছিল, প্রেমের কবিতা পড়েছিল, বার্থ হৃদয়ে উদাসী হ'য়ে চলে গেছিল।

হরিলাল ভালবাসে দিনের চেয়ে রাতে কাজ করতে। রাতে তার ভাল ঘুম হয় না। অন্ধকার-সুন্ধ বৃহৎ বাড়ীতে একা প্রেতের মত ঘুরতে চায় না। কম্পোজিটারদের টাকার লোভ দেখিয়ে ওন্টার-টাইমে খাটায়, ছাপবার কাজ রাতের জন্তু রাখে; এজন্তু মাঝে-মাঝে গভর্ণমেন্টকে জরিমানা দিতে হয়েছে, তার জন্তু সে ক্ষুণ্ণ নয়। •

কিন্তু যে-রাতে হুইস্কির নেশা ভাল করে ধরে, সে রাতে সে ছাপবার যন্ত্রের ঘরঘর শব্দ সহ্য করতে পারে না; চেষ্টা করে ব'কে ছাপাখানার সবাইকে তাড়িয়ে দেয়। তারপর নিজের ঘরে আনো জ্বালিয়ে ডেসিং-টেবিলটার সামনে ইজিচেয়ার টেনে বসে। এই ডেসিং-টেবিল হচ্ছে তার যৌবন-স্বপ্ন, তার প্রেম-স্মৃতির রূপক!

অনেক ঘুরে এক পুরাতন আসবাবের দোকানে হরিলাল মেহগনি কাঠের এই বহুমূল্য ডেসিং-টেবিলটি কিনেছিল। কনকলতার ঠিক এইরকম একটা ডেসিং-টেবিল ছিল; ছাদের

কোণ থেকে, ঘরের জানলার ফাঁক দিয়ে, পথের বাঁক থেকে সে কতদিন দেখেছে, ড্রেসিং-টেবিলের সামনে কনকলতা চুল এলিয়ে দাঁড়িয়ে, কিশোরী মুখের অনূপম সৌন্দর্য্য কাচের ওপর বাফমক করেছে, সে-দীপ্তিতে হরিলালের অন্তরে আগুন লেগে গেল। পুড়ে ছাই হয়ে গেল জীবন।

রাত্রির বিনিদ্র প্রহরে প্রমত্ত রক্তনয়নে হরিলাল ড্রেসিং-টেবিলের মলিন কাচের দিকে চেয়ে থাকে। মাঝে মাঝে উঠে ময়লা তোয়ালে দিয়ে কাচ ঘসে পরিষ্কার করতে চেষ্টা করে, কাচ আরও অস্বচ্ছ হয়ে যায়, বালি-খসা দেওয়ালের ছায়া প'ড়ে। হায়, একবার কনকলতার মোহিনীরূপ ওই কাচে ভেসে ওঠে না!

গেলাসের পর গেলাস হুইস্কি পান ক'রে হরিলাল অচেতন হয়ে ইজিচেয়ারে ঘুমিয়ে পড়ে, ইজিচেয়ার থেকে মাথাটা শূণ্ণে ঝুলতে থাকে। কোন কোন দিন সে মেজের উপর লুটিয়ে প'ড়ে যায়।

নিশাথে প্রেসের খলোকেরা উপরতলা হ'তে একটা গৌঁ-গৌঁ আর্ন্তনাদ মাঝে মাঝে শুনতে পায়, তারা চমকে ওঠে, এ ভূতের বাড়ীতে আর রাতে কাজ করবে না ঠিক করে, আবার পয়সার লোভে পরদিন রাতেও কাজে থেকে যায়।

বারান্দায় ভুটিয়া চাকরটা কিন্তু অকাতরে নাক ডাকিয়ে ঘুমোয়।

আলো-ছায়াঘন নীলাকাশে মেঘ ও রৌদ্রের লীলা অপরূপ। কখনও আকাশ নীলকান্তমণির মত দীপ্ত, কখনও তরুণীর স্বপ্ন-ভরা কালোচোখের মত স্নিগ্ধ। প্রভাতের সূর্যালোকে কলিকাতার পথ, বাড়ী, জনশ্রোতও মাঝে মাঝে অপূর্ব সুন্দর হয়। কোন কাজে

মন লাগে না। আকাশে, আলোকে কোন্ সৌন্দর্য্য-লুপ্তীর হাসি, রঙীন দিগন্তে কোন্ অপরিচিতার হাতছানি! সঁহর ছেড়ে বেরিয়ে যেতে ইচ্ছে করে, শশ্যামল নদীতীরে বা হৃদ-শোভিত পর্বত-শিখরে, ধরিত্রীর সৌন্দর্য্যালোকে।

হরিলালের প্রেসের অফিস ঘরে কিন্তু এ-আলো পৌঁছায় না। মলিন ঘসা-কাচের মধ্য দিয়ে বাহিরের যে আলোটুকু আসে, তাতে মন শুধু বিষন্ন, অবসন্ন হ'য়ে যায়।

হরিলালের জীবনে কোন সঙ্গী নেই, বন্ধু নেই, সুখ-দুঃখের কথা বলবার, পরামর্শ দেবার লোক নেই। আজ প্রভাতে সেজন্তু সে বড় মুষ্কিলে পড়েছে। অফিস-ঘরে দু'খানি চিঠি খুলে সে গুম হ'য়ে বসে। একখানি চিঠি এলাহাবাদের একটি উকিল লিখেছে, আর একখানি চিঠি লিখেছে তার ভাগ্নী।

প্রতি বছর সে তার বোনের কাছ থেকে একখানি চিঠি পেত; পূজার পর বিজয়ার প্রণাম জানিয়েই তার বোন একখানি চিঠি লিখত; সারাবছর আত্মীয়-স্বজনের কাছ থেকে চিঠি পাবার মধ্যে সেই একমাত্র চিঠি। সে বোন পাঁচ বছর হ'ল মারা গেছে, সে চিঠিও বন্ধ হয়েছে।

এলাহাবাদের উকিলটি লিখেছেন, তার ভাগ্নীপতি হঠাৎ মারা গেছেন। মৃত্যুশয্যায় তিনি যে উইল ক'রে যান তাতে তিনি হরিলালকে উইলের একজন একজিকিউটার এবং তাঁর ষোলবছরের মেয়ে রেবা ও সাত বছরের ছেলে নিতুর গার্জেন্ট নিযুক্ত ক'রে গেছেন। রেবা এখানে স্কুলের শিক্ষা শেষ করেছে, এখন কলিকাতায়

হরিলালের তত্ত্বাবধানে কলেজে পড়তে চায়। নিতুও তার সঙ্গে যাবে, ও স্কুলে পড়বে।

রেবা অন্য আর একটি খামে চিঠি লিখেছে। পিতার মৃত্যুতে শোকোচ্ছ্বাস বিশেষ নেই। লিখেছে, নিতু ওঁ সে শীগ্গির কলিকাতায় যাচ্ছে। মামাবাবু যেন নিতুর জন্য ভাল স্কুল দেখে রাখেন। সে কোন বোর্ডিং-এ থেকে পড়া-শোনা করতে পারত কিন্তু তা'হলে নিতু কোথায় থাকবে? সেজন্য মামাবাবুর সঙ্গেই তাদের থাকতে হবে, মামাবাবু যেন সেই রকম ব্যবস্থা করেন।

চিঠি ছ'খান: হরিলাল ছ'বার পড়লে। না, তাদের এখানে থাকা চলবে না। ওই থাকোহরির মেসে না-হয় থাকবার ব্যবস্থা ক'রে দেবে। সরকারবাবুর সঙ্গে এ-বিষয়ে পরামর্শ করবে ভাব্ন্তে। সরকারবাবুকে ডেকে পাঠালে, কিন্তু চিঠি-সম্বন্ধে কোন কথা বললে না, 'বিল' সব আদায় হচ্ছে না কেন, ব'লে বকলে। • উঠে কম্পোজিটারদের গালাগাল দিয়ে এল। তারপর চিঠি ছ'খানা হাতে ক'রে দোতলার ঘরে গিয়ে গুম হ'য়ে বসল।

কাকে সে পরামর্শ জিজ্ঞেস করবে? তার প্রেসের লোকেরা তাকে ভয় করে, খানিকটা ঘৃণাও করে। তার সরকারবাবু, দালালরা তাকে সুবিধামত খোসামোদ করে।

হরিলালের চিঠির উত্তরের অপেক্ষা না করেই রেবা নিতুকে নিয়ে চ'লে এল। একদিন সকালে একটি ট্যাক্সি এসে প্রেস-বাড়ীর সামনে দাঁড়াল। রেবা নিতুকে নিয়ে নামল। সঙ্গে জিনিষপত্র

বেশী নয়, দু'টো বড় টিনের ট্রাক, দু'টো বইয়ের বাক্স ও বিছানা।  
অ-দরকারী সব জিনিষ তারা এলাহাবাদে বিক্রি ক'রে  
এসেছে।

পায়ে লাল-চামড়ার হিল-তোলা জুতা, সবুজ পাড় মাদরী  
রং-এর শাড়ী ঘুরিয়ে পরা, চোখে কাচকড়ার চশমা, হাতে চামড়ার  
ব্যাগ ঝুলছে। রেবা অতি সপ্রতিভ, স্মার্ট, কন্ভেন্টে-পড়া মেয়ে,  
তার সঙ্গে হাফ-প্যান্ট-পরা নিতু, গলা-খোলা সার্ট, হাতে বেতের  
ছোট ছড়ি।

হরিলাল গ্যালি-প্রফ হাতে বার হতেই তাকে তারা প্রণাম  
করলে।

—চ'লে ক্লুম মামাবাবু। আর এলাহাবাদ ভাল লাগছিল  
না। আমাদের টেলিগ্রাম পেয়েছিলেন ?

—আচ্ছা, আচ্ছা, ও রে, উপরে নিয়ে যা এঁদের। কি  
দরওয়ান, ইঁ ক'রে দাঁড়িয়ে আছি ক'ন ?

হরিলাল প্রফ হাতে তার অফিসে ঢুকল। দোতলায় দু'খানা  
ঘর পরিষ্কার ক'রে রাখা হয়েছিল। দরওয়ান ও ভূটিয়া চাকর  
জিনিষপত্রগুলো সেখানে টেনে তুললে।

বাড়ী ও ব্যবস্থা দেখে রেবা কিছুই দমলে না। দমবার মেয়ে  
সে নয়। মা মারা যাবার পর তাকেই সংসার দেখতে হ'ত।  
তা'ছাড়া কলিকাতায় আসার কৌতুকে, উৎসাহে, আনন্দে তার  
মন ভরপুর। যৌবন-স্বপ্ন তার চোখে। সে-স্বপ্নের ঘোরে ভাঙা  
বাড়ীও রাজপ্রাসাদ।

সাত দিনের মধ্যেই রেবা সব গুছিয়ে নিলে। নিতুকে পাড়ার স্কুলে ভর্তি ক'রে দিলে, নিজে কলেজে ভর্তি হবার ব্যবস্থা করলে, মেয়েদের কলেজে নয়, ছেলেদের কলেজে। এক ব্যাঙ্কে নিজের নামে একাউন্ট খুললে। দোতলার ঘরগুলো সাফ করে বাসযোগ্য ক'রে তুললে।

সরকারবাবু এসে বললেন, দিদিমণি, আপনার যখন যা টাকা দরকার হবে, আমার কাছ থেকে চেয়ে নেবেন, বাবু বলে দিলেন। এখন এই ত্রিশটা টাকা রাখুন। নিতুর স্কুলের মাইনে—

—সে আমি দিয়েছি, সরকারমশাই। বাবা যা রেখে গেছেন তাতে আমাদের লেখাপড়ার খরচ লাগবে না।

—আপনি ত' সংসারের ভার নিলেন—সংসারের খরচ—

—আচ্ছা টাকাগুলো রেখে যান টেবিলের উপর।

দরওয়ান দিনে চারবার সেলাম ক'রে দাঁড়ায়—দিদিমণি কিছু কাজ আছে ?

ভুটিয়া চাকরটা অকারণে হাসে। ধীরে তাকে বাবুচ্চি ক'রে তোলবার আশা রেবা একেবারে ত্যাগ করে না।

কিন্তু হরিলালের দেখা পাওয়া যায় না। সারাদিন সে থাকে অফিস-ঘরে ও প্রেসে। রাতে নিজের ঘরে প্রবেশ ক'রেই দরজা বন্ধ ক'রে দেয়।

রেবা মাঝে মাঝে তার সঙ্গে অফিস-ঘরে দেখা করতে যায়। হরিলাল চমকে চায়, কথা কয় না, কিছুক্ষণ পরে বলে, এখানে না, এখানে না, এখান থেকে যাও।



--মামাবাবু, সারাদিন এ অফিসের অন্ধকূপে থাকলে শরীর থাকবে কেন? চল, বেড়িয়ে আসি, সুন্দর সন্ধ্যাবেলা।

—না, আমার অনেক কাজ, প্রফর তাড়া দেখছ! এ-সব কম্পজিটরগুলো বদমাইস, সয়তান, সরেছি কি ফাঁকি দেবে, টাইপ চুরি করবে! এই ক'রে আমার বিশ বছর কাটল।

রেবা চ'লে আসে। লাল চামড়ার হিল-উঁচু জুতোর শব্দ মেঝেতে, সিঁড়িতে খটখট বাজে। হরিলাল কাজ করতে পারে না, অফিস-ঘর হতেও বার হ'তে পারে না। ভাবে, কনকলতার এই রকম চোখের চাহনি, এই রকম গলার স্বর ছিল বুঝি! কিছু মনে পড়ে না।

নিতুর সঙ্গে কিন্তু হরিলাল পেরে ওঠে না। সে প্রাণের খুসিতে ভরা দুর্দান্ত ছেলে। শাসন জানে না, বারণ মানে না। একমাত্র দিদির কথা শোনে।

—মামাবাবু, আমার নাম ছাপিয়ে নাও, বইতে কেটে মারব।

—মামাবাবু, আমি কম্পোজ করতে শিখব।

—মামাবাবু, আজ বড় ফুটবল ম্যাচ, আমায় নিয়ে যেতে হবে। দিদি যেতে চায় না।

হরিলাল তার কোন প্রার্থনা শোনে না, কিন্তু প্রেসের লোকেরা লুকিয়ে তার নাম ছেপে দেয়, দিদির নামও। সরকারবাবু লুকিয়ে তাকে ম্যাচ দেখিয়ে নিয়ে আসেন।

দিন দিন হরিলালের অন্তর অশান্ত হ'য়ে উঠল। এতদিন তার মন ছিল স্থির, পচা ডোবার বন্ধ জলের মত, অশান্তির অনুভূতি ছিল না।

এখন দিনের বেলায় কাজে মন লাগে না, প্রফে অনেক ভুল থেকে যায়। রাতে মদ খেয়ে অচেতন হ'য়ে না পড়লে ঘুম আসে না।

এই পুরাতন-বাড়ীতে নানা অপরিচিত শব্দে তাকে দিশাহারা করে। প্রেসের ঘড়ঘড় শব্দের সঙ্গে লালচামড়ার জুতোর হিলের খটখট শব্দ বাজে, উচ্ছ্বসিত হাসির ধ্বনি আসে, কারা গল্প করছে, তাদের উৎসাহপূর্ণ কণ্ঠের শব্দ শোনা যায়।

একদিন সন্ধ্যায় হরিলাল শুনল, ওপরে গ্রামোফোন বাজছে, গ্রামোফনের গানের সঙ্গে রেবা ও নিতু গলা মিলিয়ে গান গাইছে। অসহ! এরা লেখাপড়া করে না, গান-বাজনা করে! ইচ্ছা হল, ছুটে গিয়ে খানিকটা বকুনি দিয়ে আসে। শেষে বকুনিটা ছাপাখানার লোকদের ওপর হয়। শুধু সে সরকারবাবুকে ডেকে বললে—ওপরে ব'লে আয়, বাবুর মাথা ধরেছে, গ্রামোফোন বন্ধ করতে।

সে-রাতে ডেসিং-টেবিলের আয়নার সম্মুখে হরিলাল বহুক্ষণ ভ্রমিত নয়নে চেয়ে রইল—কনকলতা! তুমি উদিতা হও, তোমার অপরূপ মূর্তি একবার কি ওই আয়নাতে ভেসে ওঠে না!

একদিন বিকেলে হরিলাল অফিস-ঘর থেকে দেখলে, রেবার সঙ্গে একটি তরুণ যুবক গেট দিয়ে প্রবেশ করল; তারা হাসতে

হাসতে পাশের সিঁড়ি দিয়ে ওপরে উঠে গেল। রেবার মুখে কি  
অনুপম লাবণ্য, যুবকের মুখে কি অপূর্ব দীপ্তি !

না, এসব-বেহায়াপানা চলবে না। এরা পড়া শোনা করে,  
না খেলা করে ?

মাধবী রং-এর শাড়ী প'রে জুতোর হিলে সিঁড়িতে খটখট ক'রে  
রেবা চ'লে গেল যুবকটির সঙ্গে বেড়াতে। হরিলালের ইচ্ছা হ'ল,  
ছুটে গিয়ে সে রেবাকে বকুনি দেয়। চেয়ারে গুম হ'য়ে বসে রইল।

সে-রাতে সিঁড়ি দিয়ে উঠতে উঠতে সে মৃচ্ছিত হ'য়ে প'ড়ল।  
কপাল কেটে গেল। ডাক্তার এসে বললে, ব্লাড প্রেসার, অত্যধিক  
চিন্তা ও অপরিমিত মদ্যপানের ফল। মদ খাওয়া চলবে না।

পরদিন সন্ধ্যায় হরিলাল যখন ঘরে গেল, দেখলে তার হুইস্কির  
বোতল নেই। ভুটিয়া চাকরকে ডেকে চেষ্টা করে বাড়াই মাং করলে।

রেবা ছুটে এসে বললে, মামাবাবু ডাক্তার ত' খেতে বারণ  
ক'রে গেছে। আমি সরিয়ে রাখতে বলেছি।

—তুমি ! তুমি ! কে তুমি ! আমি তোমার গার্জেন, না  
তুমি আমার গার্জেন ? আমার ওপর গার্জেন-গিরি ফলাতে  
এসেছেন ! এসব বেল্লিকপনা আমার ষাড়ীতে চলবে না।

স্তম্ভিত হ'য়ে রেবা চ'লে গেল। ভুটিয়া চাকর হু'বোতল  
হুইস্কি আন্তে ছুটল।

সে-রাতে ঘরে আয়নার সামনে হরিলাল অনেক্ষণ কাঁদলে।  
বহুযুগ পরে কাঁদলে। কবে যে সে কেঁদেছিল, মনে পড়ল না।  
কেঁদে তার মন হালকা হ'ল।

শুধু সহপাঠী নয়, সহপাঠিনীরাও প্রায়ই রেবার সঙ্গে কলেজের পর বিকেলে আসে, সিঁড়ি দিয়ে চঞ্চলপদে উঠে যায়, নানারঙের শাড়ীর ঝলমলানি। হরিলালের পাশের ঘরে তারা গল্প করে, হাসে, গান গায়, গ্রামোফোন বাজায়, সমস্ত বাড়ী সচকিত পুনরুজ্জীবিত হ'য়ে ওঠে। ভাড়া দরজাটা উই-থাওয়া জানালাকে বলে. কোন্ মেয়েটি সবচেয়ে সুন্দর বল দেখি? জানালা উত্তর দেয়, দেখতে সুন্দর আমি বুঝি না, আমি চাই প্রাণ-ভরা মেয়ে, সে হচ্ছে রেবা। নাচ-ঘরের দেওয়ালগুলো বহু বৎসর পরে গীত শুনে উল্লসিত হ'য়ে বলে, ওরা যদি নাচত, আরও ভাল হ'ত। সিমেন্ট-ওঠা মেঝে বলে ওঠে, আমাকে কেন লজ্জা দেওয়া, এ ভাড়া মেঝেতে কি নাচ হয়?

সেতার বাজানর সঙ্গে মাঝে মাঝে গীতা ইরা-রা নাচ, সাপা-নৃত্য, যমুনা-নৃত্য, গরবা-নৃত্য।

হরিলালের মনে হয়, সে হয় ত উন্মাদ হ'য়ে যাবে। মাঝায় মাঝে মাঝে অসহনীয় ব্যথা হয়, বৃকের ভেতরটা জ্বলে।

এখন সে মাঝে মাঝে দরওয়ান বা সরকারবাবুকে নিয়ে প্রেসের অর্ডার আন্তে বাহিরে যায়। পথের ট্রাম, মোটর-গাড়ীর ধ্বনিতে জন-কোলাহলে আপনাকে ভুলতে চায়। জমিদারদের বাড়ী থেকে বেশী কাজ আর আসে না, বাহিরে নতুন কাজ সন্ধান করাও দরকার।

সেদিন দুপুরে সে সরকারবাবুকে নিয়ে হাওড়াতে এক অর্ডারের যোগাড়ে গেল। কি এক পর্কোপলক্ষে প্রেস ছুটি ছিল। বোর্টানি-

ক্যাল বাগানের কাছেই বাড়ী, সরকার-বাবুর নির্দেশমত ষ্টীমার ক'রে গেল। বহুদিন পরে গঙ্গা দেখে বড় ভাল লাগল।

বোটানিক্যাল বাগানে নেমে সে বললে, আসুন সরকারবাবু, একটু বেড়িয়ে যাওয়া যাক। সুন্দর বাগান ত'। সেই একবার ছেলেবেলায় এসেছিলুম।

ঘুরতে ঘুরতে সহসা সে চম্কে উঠল। এক তালকুঞ্জের পাশে সবুজ নরম ঘাসের উপর এক তরুণ ও তরুণী ব'সে। তারা ডালমুট না কি খাচ্ছে আর গল্প করছে। হাঁ, ও-ই ত' রেবা! রেবা পরেছে ঘন নীল শাড়ী, শরৎ আকাশের মত নীল, মাথায় কি লালফুল গৌজা, তার মুখে মায়া, চোখে বিদ্রোহ! তার পাশে সাদা পাঞ্জাবী-পরা যে ছেলেটি ব'সে, তাকে হরিলাল প্রায়ই রেবার সঙ্গে আসতে দেখেছে।

অসহ! এরা কলেজে না গিয়ে এখানে এসে হাসি-গল্প করে! সেদিন যে ছুটি হরিলালের খেয়াল ছিল না।

সে রেবার অভিভাবক, সে এবার তার দায়িত্বের, কর্তৃত্বের পরিচয় দেবে। লাঠি হাতে হরিলাল ছুটে গেল কুঞ্জের দিকে, সহসা তার মাথা ঘুরে গেল। সরকারবাবু ধ'রে না ফেললে সে রাস্তায় প'ড়ে যেত।

রেবাকে শাসন করা হ'ল না। সরকারবাবু তাকে গঙ্গার ধারে নিয়ে গেল, মাথায়, চোখে-মুখে জল দিলে।

শরতের স্বচ্ছনীল আকাশ ক্ষণিক অন্ধকার ক'রে এক পশলা বৃষ্টি এল।

সে-রাত্রে হরিলাল হুইস্কির বোতলের সামনে ইজিচেয়ারে চুপ ক'রে বসে থাকতে পারল না। ঘরে অস্থিরভাবে ঘুরতে লাগল,

খাঁচায়-পোরা বাঘের মত । মাঝে মাঝে সে চেঁচিয়ে উঠতে লাগল, তাড়িয়ে দেব, ছেলেটাকে মেরে তাড়াব, আর ওকে এবার মেয়ে-কলেজে ভর্তি ক'রে দেব, গাড়ীতে যাবে-আসবে, কোথাও যেতে পারবে না, কেউ আসতে পারবে না, আমি ওর গার্জেন্ট । আমার দায়িত্ব । তাড়িয়ে দেব মেরে ।

ভাঙা দরজাটা উই-খাওয়া জানালাকে বললে, এ বলে কি ! সেই পুরাতন ইতিহাসের পুনরাবৃত্তি হবে না-কি ?

সিলিং-এর মোটা ছক্কা শিউরে উঠল—না, না, না ।

বালি-খসা দেওয়াল কেঁপে বললে, এ হ'তে দেওয়া হবে না, তার আগে আমি ওর ঘাড়ে ভেঙে পড়ব ।

খড়খড়ি-ভাঙ্গা জানালা মূছ তুলে ব'লে উঠল, সে বেশ হবে ।

ঘরে ঘুরতে ঘুরতে হরিলাল চম্কে দাঁড়াল । দক্ষিণ দিকের দেওয়ালে এ বৃহৎ আয়না ত তার চোখে কোনদিন পড়ে নি । খুব বড় আয়না, সরকারদের আঁমলের ; তার গিল্টি-করা ফ্রেম কালো হয়ে গেছে, কাচও অস্বচ্ছ, কোণে কোণে মাকড়সা জাল তৈরী করেছে ।

সে আয়নায় এক ক্রুর-কর্ম্মার মুখ ভেসে উঠল, খাঁড়ার মত নাক, জলজলে চোখ, লম্বা-দুরু দাড়ি, লোকটা 'পাকা পরামর্শদাতা । সে হরিলালের কানে কানে বললে, ঠিক, মেয়েটা কি গোল্লায় যাবে, আজকাল এসব হচ্ছে কি ! তুমি অভিভাবক । পর্দা আর শাসন চাই ।

হরিলাল মনে জোর পেল, আরও খানিকটা হুইফি খেল । শাসন করতে হবে, চুলের মুঠি ধ'রে চাবুক মারলে তবে গায়ের জানা যায় । হাতে লাঠি তুলে নিলে ।

খড়খড়ি-ভাঙ্গা জানালা বন্ বন্ ক'রে উঠল, এ কি, সরকারদের

মেজবাবুর গলা, আবার তের বছর পরে শোনা যাচ্ছে! আবার একটা নারী-নির্ধাতন, আত্মহত্যা হবে না-কি!

সিলিং-এর বড় ছক কেঁপে ব'লে উঠল, আমার গায়ে দড়ি লাগিয়ে ঝুলে আর কেউ মরতে পারছে না। দড়ি বেঁধে একটু টান দিলেই আমি খ'সে পড়ব।

পুরাতন ঘড়ি টকটক করে বললে, কিন্তু সুরবালা যে রাতে তোমার গায়ে দড়ি বেঁধে গলায় ঝুলিয়ে মরেছিল, তখন ত' খ'সে পড়তে পার নি!

ছক নিঃশ্বাস ফেলে বললে, তখন আমি শক্ত ছিলাম, সরকার-বাড়ীর ঝাড়-লঠন আমি ধ'রে ঝুলিয়ে রাখতুম; সরকার-কর্তাদের মনের মতনই অটল দৃঢ় ছিলাম।

দেওয়াল বালি খসিয়ে বললে, কিছু করতে হবে না, আমি ঘাড়ে ভেঙে পড়ব।

নারী-শাসনের জন্ম হরিলাল তৈরী। বড় পুরানো আয়নার সামনে আবার দাঁড়াল। সে-লোকটা কানে কানে বললে, যাও বকুনি নয়, মার দিয়ে এসো, একটা চাবুক নেই? চাবুক চাই? দেখ, ওই কোণে রয়েছে।

আয়নার নীচে মেঝের ধুলোর মধ্যে হরিলাল একটা চাবুক খুঁজে পেলে। রূপো-বাঁধানো হাতল, চাবুকটা কালো সাপের মত।

সশব্দে শূন্য ঘরের ভাঙা মেঝেতে চাবুক মেরে হরিলাল লাফিয়ে উঠল। আয়নার লোকটির মুখে ক্রুর হাসি। বাতাসে হরিলাল চাবুকের শব্দ করল।

চাবুক হাতে হরিলাল প্রস্তুত। আয়নার লোকটি বললে, যাও, দেবী ক'রোনা দরজা হয়ত বন্ধ ক'রে দেবে।

সমস্ত ঘর শিউরে উঠল। মেজে কেঁপে হুলে উঠল, হরিলালের যেন মাথা ঘুরছে।

স্থির হ'য়ে দাঁড়িয়ে সে আয়নার দিকে চাইল। তার চোখ জ্বলছে, হাত কাঁপছে।

এ কি! এ কার মুখ আয়নায় ভেসে উঠছে। এ স্বপ্ন নাসত্য!

হরিলাল দেখলে তার চিরজীবনের ঈপ্সিত কনকলতার মুখ, কিন্তু সে-মুখে মায়াময় সৌন্দর্য নেই, দু'চোখে কি করুণতা, সমস্ত মুখে কি গভীর বিষণ্ণতা!

হরিলালের হাত থেকে চাবুক প'ড়ে গেল। উন্মত্তের মত সে আয়নার দিকে ছুটে গেল—কনকলতা! তোমার চোখে জল কেন, কনকলতা?

হরিলাল তার বুকে অসহনীয় বেদনা অনুভব করলে, হৃৎপিণ্ড বুঝি ছিন্ন স্তর হ'য়ে যেতে চায়।

দেওয়াল কেঁপে উঠল। সরকারদের বৃহৎ প্রাচীন আয়না ফেটে ঝন্ঝন্ করে ভেঙে প'ড়ল।

ভাঙা আয়নার টুকরার ওপর মেঝের ধুলোভরা গর্ভে হরিলাল মূচ্ছিত হ'য়ে প'ড়ল।

সমস্ত বাড়ী শিউরে উঠল। নীচে ছাপব'র কল ঘুরছিল, একটা ইঞ্জুপ ভেঙে ছিটকে পড়ল, কল অচল, নীরব হ'ল।

রেবা দরওয়ানকে দিয়ে ডাক্তার ডাকিয়ে পাঠালে। দেড়ঘণ্টা পরে ডাক্তার এসে হরিলালের মৃত্যু-সার্টিফিকেট লিখে চ'লে গেলেন।

